


BAKYUVU MPE BAMVUTU

NA ZULU YA MPEVE-SANTU

 Mpe na manima ya nkokila ya mazono beto nyonso kele kaka ya kufuluka. Mu me kuwa bansangu ya mbote bubu yayi na mingi ya bayina kuzwaka Mpeve-Santu. Mpe beto kele na kyese samu na yawu.

² Kyese na kuzwa Mpangi Graham na beto na nkokila yayi, mosi ya bampangi ya beto na kisalu awa na tabernacle, pasteur ya dibuundu ya busantu kuna na Utica. Mpe Mpangi Jackson, yandi vwandaka awa, mu banza ya vwandaka, mazono na nkokila, to yandi me vutuka kele awa na dibuundu kisika mosi ntangu yayi, muntu me tuba, na . . . Yinga, mu me mona Mpangi Jackson na manima na kati ya dibuundu ntangu yayi. Mpe—mpe Mpangi Rudell, yandi kele awa na nkokila yayi? Yina kele mosi yankaka ya bampangi ya beto na kisalu awa na nzila ya “62.” Beto kele na kyese na kuzwa bawu awa. Mpe na ya beto . . . Oh, Mpangi Pat, mpe bankundi nyonso yayi, beto kele—mpe bisika nyonso na kati ya dibuundu. Beto kele na kyese na kuzwa beno nyonso awa na nkokila yayi.

³ Ntangu yayi, kana mu zola, mu ke matisa mosi ya milongi ya mbote yayi awa samu na kuzonzila beno, samu ti ndinga ya munu me kawuka kaka na manima ya kuzwa ntangu mosi ya nene mazono na nkokila.

⁴ Ntangu yayi, kento ya munu, yandi kele yina ke sungikaka munu; beno zaba, bankundi, yina mu ke na kuzonzila. Yandi tubaka bantu na manima mazono na nkokila vwanda kuwa munu ve, samu ti mu vwandaka zonza na kima yayi. Mpe ntangu yayi, ntete mu banda, mu ke meka kima. Ntangu yayi, mu ke kumiyufula kana ya kele mbote. Ya kele mutindu ya mbote na manima kuna? To yayi kele mbote? Yayi kele mbote? Ntangu yayi, Cherie, yayi kele mbala ya ntete mu me nunga nge. Ntangu yayi, bawu me tuba ti ya kele mbote. Mbote mingi. Oh, la la! Yandi kele kento. Yayi kele mosi ya mbote, samu ti ya me sala bilumbu katuka mu me nunga mosi. Ntangu nyonso yandi ke nungaka.

⁵ Mbote, kieleka beto vwandaka me kuzwa ntangu ya nene na balukutakanu tatu ya nkokila yayi; munu ee. Mpe ntangu yayi, babande, nyonso kukondwa ya mazono na nkokila . . . Mu bokilaka Mpangi Goad mpe tubaka na yandi na kukwiza baka bande samu na tabernacle. Kasi ya lendaka vwanda ti mu vwanda me bakula ti Billy Paul bakaka ditoma ya yandi mpe kwendaka, na yawu bande kubakamaka ve landila mutindu mu me zabila. Na yawu beto me kondwa yina. Mu ke zola kubumba

yawu na dibuundu samu na mbote ya dibuundu samu—muntu tuba—yina beto ke kwikilaka.

⁶ Ntangu yayi, na nkokila yayi mu ke zonzila na *Kivwandu Ya Nene*, kana mu manisa na bakyuvu na ntangu. Mpe na manima, mbasi na suka ya kele na lukutakanu ya lunyakusu. Mpe beto ke sambila samu na bambevo. Na yawu, beto lenda pesa ve—to kukwenda kaka mpe kutuba, “Ntangu yayi, mu ke baka nge, mpe nge, mpe nge.” Yina ke vwanda ya kulunga ve. Kasi beto ke pesa lutangu mosi ya bakalati, mpe na kati-kati ya bakalati yango, mu ke bokila ndambu na zulu ya estrade. Mpe na yina, kana Mpeve-Santu banda na kulakisa, kuna Yandi ke kwenda na dibuundu mpe ke kuzwa bantu na kati ya dibuundu samu na lukutakanu ya lunyakusu. Mpe na yina, mbasi na suka, mu ke zonza, kana Mfumu zola, kaka ntete lukutakanu ya kubeluka ya nzutu.

⁷ Mu ke na kumona kento ya munu kuseka. Cherie, nge ke na kuwa munu ata fyoti ve? Oh, nge ke na kuwa munu. Mbote, ya kele mbote. Yandi me vwanda na manima kuna mpe kana ya ke—lenda kuwa munu ve, yandi ke ningisa yintu ya yandi, “Nge. . . Mu ke na kuwa nge ve, mu ke na kuwa nge ve.”

⁸ Na yawu kuna mbasi—mbasi na nkokila ya kele lukutakanu ya kumwangisa nsangu na lukutakanu ya mbotika ya maza. Mpe na manima, na ntangu yina mu ke manisa na kulonga mbasi na nkokila, beto ke benda balele mpe kuzwa mbotika ya maza awa mbasi na nkokila. Kana Mfumu zola, kana Mfumu me zola, na suka mu zola—to mbasi na nkokila mu zola kulonga na dilongi: *Kidimbu Kupesamaka*. Mpe na manima, kana beto kele awa Kilumbu ya tatu na nkokila, kana Mfumu pesa munu muswa ya kuvwanda awa na Kilumbu ya tatu na nkokila, mu zola kuzonzila na dilongi: *Beto Me Mona Mbwetete ya Yandi na Esete mpe Me Kwiza Sambila Yandi*. Ntangu yayi, ya ke vwanda kaka ntete kilumbu ya Nowele.

⁹ Mpe kuna, na mbala mosi na manima ya Nowele ya kele bakonze ya lumingu ya Nowele. Ya kele na ntangu yina beto ke bakaka mikanda nyonso. . . Mpangi Mercier mpe bampangi yankaka ntangu nyonso ke basisaka nyonso. Mpe beto ke tanda nyonso, mpe beto ke sambila na zulu ya mikanda yayi mpe kulomba Mfumu na kutwadisa beto wapi kisika na yinza ti beto ke kwenda.

¹⁰ Ntangu yayi, ya kele, Bantu ya Mumbungu ya Miklisto, me kubika ndandani ya balukutakanu, ya ke vwanda ntete na Floride na bilumbu fyoti samu na kivwandu ya bawu. Kukatuka kuna kukwenda na Kingston, na manima na Haïti, mpe na Porto Rico, na manima na Amerika ya Sude, na kuvutukaka na kulutilaka na Mexique.

¹¹ Kasi ya ke na kumonana mutindu ti Mfumu ke na kutwadisa munu na Norvège. Mu ke na kuzaba ve samu na yinki. Beno zaba mwa buku ya kubokila *Muntu Ba Me fidisa Na Nzambi?*

Ya kele nsamununu ya nsambulu ya kulutila nene na Norvège. Beno banza na yawu, na yina Mfumu salaka kuna. Mpe ntangu mu vwandaka kuna, ba bikaka ve ti mu tentika maboko na zulu ya bambevo. Mu vwandaka kuna bampimpa tatu. Mpe ba bikaka ve ti mu tentika maboko na zulu ya bambevo. Na yawu beno mona yina Nzambi lenda sala. Bantu vwandaka lutangu mingi ti ya lungaka ti ba baka bapulusu ya kumata, bampunda, mpe me katula bantu na babala-bala samu ti mu kuma na kisika. Mpe mu tentikaka ve maboko na zulu ya bambevo. Mu sambilaka samu na bawu; mu bikaka bawu kutentika maboko na zulu ya mosi na mosi.

¹² Na yawu . . . [Muntu ke na kuzonzaka na Mpangi Branham—Mu.] Yinga, na yina, kieleka mu ke sala yawu. Ntangu yayi, mbasi na suka . . . Ntangu yayi, na nkokila yayi, mu banza beto ke kota kaka na bakyuvu yayi, samu ti beto kele na mwa bayina kele kieleka ya mbote. Mpe mu zaba ve tii wapi ntangu Mfumu ke kanga beto na zulu ya yawu. Mpe kuna, mbasi na suka kana Billy Paul, Gene, to Leo, mosi, ke vwanda awa samu na kukabula bakalati ya bisambu na ngunga ya nana tii ngunga ya nana na ndambu. Ntangu yayi, bantu yina kele na ngaanda ya mbanza, mu ke vutukila dyaka yawu samu beno zimbana ve. Kana beno zola kukwiza na mulonga, beto ke zola kuzwa bantu yina kele na ngaanda ya mbanza kana ya lenda salama.

¹³ Ntangu yayi, bantangu yankaka awa na dibuundu beto ke kumaka na kisika ba ke tubaka, “Mbote . . .” Beto ke bakaka bantu yina kele na ngaanda ya mbanza, ke nata bawu na zulu . . . Muntu ke tuba, “Mbote, mu vwanda zaba ve yina vwandaka tambula mbote ve na bawu. Ba lendaka tuba kima ya yimbi.” Na yina beno ke baka bantu na kati ya mbanza; bawu ke tuba, “Oh, ya lenda vwanda ti beno zaba bawu.” Na yawu . . . Na yina bawu ke tuba—ba ke tubaka, “Mbote, mu ke tuba na beno, ya kele bakalati ya bisambu.” Mbote, wapi mutindu samu na bayina ti me kuzwa bakalati ya bisambu ve. Mpe ya me vwanda kilumbu na manima ya kilumbu ntangu ya . . .

Yinki nge me tuba? [Ba me lomba Mpangi Branham na kuvutuka manima na ntwala ya kinzonzolo—Mu.] Mu vutuka manima na ntwala ya kinzonzolo? Mbote, beno zaba, mu ntangu nyonso ke longaka na kati-kati ya nzila. Na yawu mu banza kubaka kaka yawu mutindu yayi. Ya kele mbote? Ya kele mbote. Ya kele mbote. Mu ke tuba na beno yinki ya kele. Ya beto—ya beto mutindu ya kubasisa muningu na ngolo kele yimbi mingi awa, yimbi mingi. Mpe beto ke na kumeka ve na kuzwa ya mbote ntangu yayi, samu ti beto zola ntete kutunga tabernacle ya malu-malu. Mpe yina ntangu beto ke kuzwa bivinga mingi (beno me mona?), kana beto lenda kuzwa awa mpe kukumisa kisika yayi mwa nene, mpe kusala mwa bisika mingi, mpe kukubama samu na balukutakanu ntangu beto ke kuzwa yawu awa.

¹⁴ Mpe ntangu yayi, beno bambuka moyo, na suka bampangi ya babakala, mosi to tatu ya bawu ke vwanda na kukabula bakalati na kati-kati ya ngunga ya nana na ndambu, to, na ngunga ya nana tii ngunga ya nana na ndambu. Yina ke pesa siansi na muntu nyonso na kuvwanda ya kuyilama. Mpe mu vwanda zonza na mutindu bawu ke kabulaka bakalati, samu na yinki beto ke salaka yawu. Ya kele samu muvusu vwanda ve. Beno me mona? Ntangu yayi, yinki kana mu kwiza awa, kaka mutindu malu-malu yayi mpe kutuba, “Ti kento *yayi*, kento *yayi*, mpe bakala *yina*, mpe kento *yayi* . . . ?” Beno me mona, yina ke vwanda mutindu mosi—yina ke vwanda mutindu mosi ya ngolo. Beno me mona? Mpe na manima, kana beno . . . Bambala mingi mu me salaka yayi. Mpe kana bawu kele mingi ve na suka yayi, mu banza kusala kima mutindu mosi. Mu ke tuba, “Bantu yikwa awa kele ya ngaanda ya mbanza yina kele na kima ke na kutambula ve na beno, beno telama.”

¹⁵ Mpangi Mercier, nge me kwiza sadisa munu. Nge ke sadisa munu? [Mpangi Mercier me pesa mvutu—Mu.] Oh, nge me kwiza . . . Yandi me kwiza samu na kusadisa yandi mosi. Mu vwandaka me zonza na petite amie ya nge bubu yayi. Ntangu yayi, nge fwana vwanda tsyelika mbote na munu. Beno me mona? Mbote mingi. Ya kele mbote. Mu—mu me zola kikesa yina Mpangi Leo. Ntangu ya kele ya kusungama ve, beto—beto sungika kaka yawu mutindu beto zaba mutindu ya kusala yawu, nyonso yina beto lenda.

¹⁶ Na yawu ntangu yayi kuna, kulomba kaka na bantu yina kele ya ngaanda ya mbanza na kutelemisa maboko ya bawu bayina kele na kima ke na kutambula ve na bawu. Mpe kuna kutelama kaka kuna, kukangama na zulu ya muntu mosi tii Mpeve-Santu ke banda, mpe ke baka dibuundu nyonso. Bantu yikwa vwandaka awa ntangu ba monaka yina kusalamaka na kati awa? Kieleka! Beno me mona, beno me mona? Na yawu ya ke sala ata mbote ve wapi kisika ya kele. Ya kele kaka . . .

¹⁷ Mu zola beno kubambuka moyo na yayi, mpe mu ke meka na kuvutukila dyaka yawu na suka. Bantu ya makanda, Nsangu ya mbote yina ba pesaka bawu kele Nsangu ya mbote ya lukwikilu, bisalu ata fyoti ve. Beno me mona? Mpe mutindu mu tubaka mazono na nokila. Ntangu Mpeve-Santu kubwaka na Pantekote, ntangu bawu kwendaka na ba-Juif (Actes 19:5), ya lungaka ti bawu tentika maboko na zulu ya bawu samu ti bawu kuzwa Yawu. Mpe ntangu bawu kwendaka na ba-Samaritain, ya lungaka ti bawu tentika maboko na zulu ya bawu. Kasi ntangu bawu kwizaka na Bantu ya makanda na yinzo ya Corneille, “Na yina Pierre zonzaka bampova yayi . . .” Ata kutentika ya maboko.

¹⁸ Ntangu mwa mwana ya kento kufwaka, mwana ya kento ya Jairus, nganga-Nzambi, tubaka, “Kwiza tentika maboko na zulu ya yandi, mpe yandi ke zinga.” Kasi ntangu mfumu ya

centurion ya basoda ya Rome, Muntu ya makanda, tubaka, “Mu kele ya kulunga ve ti Nge kota na yisi ya muludi ya munu, zonza dyambu.” Kaka yina. Beno me mona?

¹⁹ Kento ya Syro-Phénicienne, na kutala yandi vwandaka Grecque, ntangu yandi—ntangu Yesu tubaka na yandi, tubaka, “Ya kele ya kulunga na Munu ve na kubaka dimpa ya bana mpe kupesa yawu na bayimbwa.”

Yandi tubaka, “Ya kele kieleka, Mfumu; kasi bayimbwa na yisi ya mesa ke kudyaka mwa bitini ya mampa ya bana.”

Yandi tubaka, “Samu na dyambu yina, mpeve ya yimbi me bika mwana ya nge ya kento.” Na yina beno tuba mambu ya mbote. Beno tuba kima ya mbote samu na muntu. Beno zonza na yina me tala Yesu. Beno tuba dyambu ya kusungama, dyambu ya kieleka. Yina kele mutindu ya kukatukila bampeve ya yimbi. Ata mbala mosi ve ti Yandi tubaka—ata mbala mosi ve ti Yandi sambilaka samu na mwana ya kento. Ata mbala mosi ve ti Yandi tubaka dyambu na zulu ya kubeluka ya yandi; Yandi tubaka kaka, “Samu na dyambu yayi, samu na dyambu yayi . . .”

²⁰ Hattie Wright, kilumbu yankaka yina, yandi lombaka kima ve. Yandi vwandaka kaka ya kuvwanda kuna, kasi yandi tubaka dyambu ya kulunga, yina sepelisaka Mpeve-Santu. Mpe Mpeve-Santu na kuvutula zonzaka mpe tubaka, “Hattie, lomba nyonso yina nge zola, nyonso yina kele na nge mpe yina nge zola. Beno tala kana yayi kele kieleka to ve. Lomba nyonso (lunyakusu ya mwa mpangi ya yandi ya kento ya kikata yina vwandaka kuna nyonso ya kulemba; mafunda kumi ya ba-dollar na kukanga yandi na kutimuna na zulu ya myongo yina kuna; ti buntwenya kuvutuka na nzutu ya yandi ya kulemba); nyonso yina nge zola kulomba, lomba yawu malu-malu yayi. Kana Yandi kwiza ve mpe pesa yawu na nge malu-malu yayi ve, na yina mu kele profete ya luvunu.” Yina kele—yina kele yina kele dyambu, mutindu yina ve?

²¹ Yesu tubaka, “Beno tuba na mongo yayi . . .” Mpe beno kuwaka yina kusalamaka; ya kele na kisalu yina beto ke na kukotaka. Beto kele ntama na nzila ntangu yayi. Nkwizulu ya Mfumu Yesu kele ntama ve. Mpe beto fwana kuzwa lukwikilu ya enlevement na kati ya Dibuundu yina lenda soba na mwa ntangu landila kukanga ya disu samu na kukwenda, to beto ke kwenda ve. Kasi beno tala mpasi ve, ya ke vwanda kuna. Ya ke vwanda kuna. Mpe ntangu ngolo ya dibuundu *yayi* ke telama, ya ke nata bankundi ya yandi; ngolo ya dibuundu *yina* ke telama, yawu ke nata bankundi ya yandi; ngolo ya dibuundu *yina* ke nata bankundi yankaka; na manima ya ke vwanda na mvumbukulu ya bantu ya kufwa ya nene. Mpe beto ke na kutala na yawu.

²² Ntangu yayi, beno zimbana ve, bakalati ya bisambu na suka na ngunga ya nana tii ngunga ya nana na ndambu. Kuna mu me lomba bawu ata lutangu ya bantu, kuna beno sukisa na

kukabula bakalati, mpe beno kwenda na manima, mpe beno kwenda vwanda (beno me mona?), samu ti bawu ke kabula yawu nyonso mu banza na ntangu yina na mutindu nyonso, to lutangu beto ke lenda kubokila. Bampangi ya babakala ke kwiza, ke yukisa bakalati nyonso kaka na ntwala ya beno, na yina kana beno zola mosi, beno zola mosi, to nyonso mutindu yina . . . Na yina ntangu mu ke kwiza, mu ke kaka . . . Numelo nyonso yina Mfumu ke tuba na kubokila . . . Mpe kana Yandi tuba, “Kubokila ata fyoti ve,” mu ke bokila bawu ata fyoti ve (beno me mona?), kaka nyonso yina ya kele.

²³ Mpe mu . . . Kisalu yango ke na kuzimbanaka na mutindu nyonso; ya kele na kima ya kulutila nene yina ke na kwiza. Beno bambuka moyo, ntangu nyonso yina ti ba tubaka na zulu ya estrade yayi to na zulu ya chaire yayi, mpe ata mbala mosi ve ti ya me kondwaka ntete. Beno ke bambuka moyo na kisalu landila diboko? Beno me mona yina yawu salaka? Mabanza ya ntima, beno me mona yina yawu salaka? Ntangu yayi beno tala yayi mbote: zonza Ndinga, mpe mona yina Yawu ke sala. Beno me mona? Mu tubaka na beno awa bamvula me luta—dibuundu (mu ke na kuzonza na tabernacle)—bamvula me luta, bamvula tatu to yiya me luta, kima vwanda yilama samu na kutalana; ya vwanda yilama samu na kubakila kisika. Mpe awa yawu ntangu yayi ke na kupasuka kaka na . . . Yawu ke na kubakaka nzutu. Ntangu yayi, beto kele na luzabu samu na yawu. Oh, mutindu beto ke vutula matondo. Kaka na kyese mingi.

²⁴ Ntangu yayi, beto me kuzwa bakyuvu mosi kieleka ya mpasi awa, mpe beto zola kaka kukota na yawu. Muntu mosi talaka na babuku nyonso yina vwandaka na munu. Mu tubaka, “Mbote, muntu ya mayela mingi ke vwanda kaka na nsatu ya mosi.” Kasi mu kele muntu ya mayela mingi ve. Mu fwana kuzwa mingi ya yawu samu na kutala. Mbote, yayi kele Diaglott, mpe yayi kele Biblia, mpe yayi kele concordance. Na yawu ya kele . . . Beto ke lomba kaka Mfumu na kusadisa beto mpe kutwadisa beto na kupesa mvutu na bakyuvu yayi kaka landila luzolo ya Yandi ya Kinzambi mpe Ndinga ya Yandi.

²⁵ Na yawu ntangu yayi, beto kulumusa bayintu ya beto mwa ntangu fyoti samu na kusambila. Mfumu, beto ke vutula matondo na Nge na kati ya ntima ya beto samu na yina Nge me sala samu na beto landila bankokila tatu yayi yina me luta. Oh, kumona milongi kukutana na manima kuna na kati ya kivinga mpe kupesana maboko, mpe na lukwikilu ya kuvutikila, mpe—mpe ndyatulu ya malu-malu na kukwenda. Ke bokila na alo-alo . . . Mpe bantima ya beto ke yangalala, mpe bantu kuzwa Mpeve-Santu na manima ti bawu me vwanda—me mona Ndinga ya Nge, mutindu Yawu ke tuba kaka malembe-malembe mutindu ya kuzwa Mpeve-Santu ya Nge. Beto me vutula matondo samu na yawu, Mfumu.

26 Nge ke salaka bima ya kukondwa mpasi samu na beto, samu ti beto kele bantu ya mpasi ve. Mpe beto ke sambila, Nzambi, ti—ti Nge ke bika beto ya muvimba kuvwanda ntangu nyonso ya kukondwa mpasi. Samu ti ya . . . Ya kele mutindu ti yina ke kuluka ke vwanda ya kuzanguka. Mpe ndwenga ya yinza kele bulawu samu na Nzambi; yina me sepelisa Nzambi na nzila ya bulawu ya kulonga na kuvuukisa bawu yina vwandaka ya kuzimbana.

27 Mpe ntangu yayi, Tata, mu ke na bakyuvu mingi awa na munu yina me katuka na bantima ya kusungama yina ke na kutungisa. Mpe mosi ya yawu kupesama mvutu ya luvunu lendaka losa muntu na nzila ya yimbi, na kulosaka nsemo ya yimbi na kyuvu ya bawu yina ke na kutungisa bawu. Na yawu Mfumu Nzambi, mu ke sambila ti Mpeve-Santu ya Nge kukwiza na zulu ya beto mpe kumonikisa bima yayi, samu ti ya kele ya kusonama na Masonuku, “Beno lomba mpe beno ke kuzwa; mpe beno sosa mpe beno ke mona; beno konkota mpe ya ke funguka samu na nge.” Mpe ya kele yina beto ke na kusala ntangu yayi, Mfumu, na kukonkotaka na mwelo ya Nge ya kyadi. Na kutelamaka na kivudi ya ludedomo ya Kinzambi ya Nge, beto ke sambila Menga ya Klisto ya Nzambi mpe samu na Mpeve-Santu.

28 Mpe beto me kwiza na nkokila yayi kaka ve samu ti beto me manisa bankokila tatu yango ya kulonga na zulu ya Mpeve-Santu, beto me kwiza na buzitu ya kieleka mpe ya kusungama. Beto me kwiza mutindu ti kana yayi vwandaka nkokila ya nsuka beto ke vwanda na zulu ya ntoto. Beto me kwiza na kukwikilaka ti Nge ke pesa mvutu na bisambu ya beto. Mpe Mfumu, beto ke lomba Nge ntangu yayi na kusepidisa beto na Luzingu ya Nge ya Kukonda nsuka. Mpe na kupesaka mvutu na Ndinga ya Nge, ti Mpeve-Santu. . . Oh Nzambi, mutindu beto me kumona ti ya kele Nge mosi na kati-kati ya beto, beto ke sambila ti Yandi ke monikisa na beto na nkokila yayi bima yina beto zola. Mpe beto zola kaka ti mioyo ya beto kuvwanda na kupema, mpe mabanza ya beto na ngemba, mpe na kuvwandaka na lukwikilu na Nzambi na kukwenda na ntwala na kulomba balusakumunu yina Yandi silaka. Beto me lomba yayi na Nkumbu ya Yesu. Amen.

29 Ntangu yayi, mu ke na bakyuvu nyonso yina ba pesaka munu, kaka mosi me kukondwa. Mpe mu pesaka mvutu na ntwenya Mpangi Martin yina yufulaka munu mazusi na nkokila, kaka mosi. Ya vwandaka na mingi awa mazono na nkokila, kasi ya vwandaka balombilu ya bisambu. Mpe Mpangi Martin yufulaka munu na yina me tala Jean 3:16—to Jean 3, mu banza, na yina me tala, “Kana ti muntu kubutama na maza mpe Mpeve, yandi lenda ve kumona Kimfumu,” mpe yandi vwanda fwanikisa yawu na bande yina mu fidisaka na zulu ya ba-Hébreux. Mpe mu kutanaka na yandi na kivinga ya manima kuna mazono na nkokila, mpe—mu kuzwaka siansi ya kupesa yandi mvutu ntete, mpe kuna mu salaka kuna, na dilongi.

³⁰ Ntangu yayi, ya kele na muntu awa yina vandaka ve awa mazono na nkokila? Bika beto kumona maboko ya beno, bayina vwandaka ve awa mazono na nkokila. Oh, beto, kieleka zolaka ti beno kuvwanda na beto. Beto kuzwaka ntangu mosi ya nkembo. Mpeve-Santu. . .

³¹ Samu na mwa minuti, mu lenda. . . Ya ke sala mpasi ve. Yayi ke na kubakamaka na bande. Mpe kana mulongi mosi vwanda—to muntu vwanda na ntima mosi ve na yina mu ke na kukubama na kutuba ntangu yayi, to dyaka na bakyuvu, mu ke lomba, mpangi, ti beno ke banza na yawu na mutindu ya ngitukulu ve, kasi ti—beno bambuka moyo ti bande yayi ke na kusalamaka na tabernacle ya beto awa. Beto ke na kulungisa na bantu ya beto. Milongi mingi ya balukwikilu ya mutindu na mutindu kele ya kuvwanda bisika nyonso. Mpe mu zola kukota na dilongi yango dyaka, samu ti ya kele na ndambu ya bantu ya beto yina lendaka ve kukota mazono na nkokila bayina mu ke na kumona kele na kati awa na nkokila yayi. Mpe mu ke zola kuvutukila samu na mwa ntangu fyoti, kana beno pesa munu muswa, yina mu zonzaka mazono na nkokila; mpe ya vwandaka na zulu ya Pantekote, na zulu ya kuzwa Mpeve-Santu.

Ntangu yayi, na kutangaka na *Emphatic Diaglott* landila mbangululu ya Grec, kisika mu vwandaka mazono na nkokila, yina kele ya kufunguka na ntuala ya munu ntangu yayi. Ya kele mbangululu ya ntete katuka Grec na Kingelesi. Ya me lutila na mibangundi yankaka ve, ya kele—mpe ba-mbangululu yankaka ve, ya kele kaka mbala mosi katuka Grec na Kingelesi. Ntangu yayi, bampova na Kingelesi, bambala mingi ke na bambangululu mingi samu na yawu, mutindu mu ke tuba ntangu yayi, *board*. Beno baka mpova yayi *board*. Beno ke tuba, “Mbote, yandi vwandaka zola kutuba ti beto vwandaka *lembisa* yandi. [na kingelesi : *boring*—Mu.]” Ve! “Oh, yandi—yandi me futa *mbongo* ya yandi.” Ve! Mbote, yandi. . . “Ya kele *dibaya* na lweka ya yinzo.” Mbote, beno me mona? To mosi ya bayina. . . Ya kele na yiya to tanu ya bampova yankaka ti ba lenda sadila; beno fwana landa dibanza. Mpova *kumona*. *Kumona* zola kutuba “kubakula,” na Kingelesi. *Nzadi* zola kutuba “nzutu ya maza.” *Kumona* zola kutuba “kutala.” Beno me mona? Kasi na bambangululu yayi, mpova awa yina ba sadilaka, yina mu zonzilaka mazono na nkokila na Actes na kapu 2, kisika ya kele ya kutuba, “Milaka ya tiya tentamaka na zulu ya bawu. . .” Ntangu yayi, mu ke zola kaka kuvutukila mwa ntangu fyoti. Beno ke zola, mwa ntangu fyoti, mpe mutindu kuvutukila yawu samu na mwa ntangu ntete beto kwenda ntama?

³² Ntangu yayi, beno baka, beno bayina kele na mbangululu ya Roi Jacques to mbangululu nyonso yina beno ke kulandilaka na kutanga. . . Mpe mu zola kutanga yawu. Mpe beno kuwa mbote-mbote ntangu yayi. Beno bakula yimbi ve. Mingi bubu yayi, mpe mpangi ya munu ya kento, mingi ya bawu kubokilaka,

tubaka . . . Mama Morgan . . . Mingi ya bawu vwandaka mazono na nkokila. Mama Morgan kele mosi ya bampangi ya beto ya kento yina badokotolo sukulaka maboko; mpe yandi kele ya kufwa ya me luta bamvula kumi na sambanu, kumi na sambwadi landila ndandanu ya bambevo ya cancer na Louisville. Mu banza ti yandi kele dyaka ya kuvwanda na manima awa na nkokila yayi. Yandi vwanda lenda ve na kuwa, yandi tubaka, samu ti mu vwandaka zonga mbala mosi na kinzonzolo. Mpe samu na mfunu ya bawu mu zola kuvutukila yayi mwa ntangu.

³³ Ntangu yayi, mu ke na kutangaka na Masonuku ya Actes 2:

. . . ntangu kilumbu ya Pantekote kumaka, bawu nyonso vwandaka na dibanza mosi . . . (Ntangu yayi, mu zola yina mingi kulutila na ntima mosi: samu ti beno lenda vwanda na ntima mosi na zulu ya kutala ya dilongi mosi, kasi awa mabanza ya bawu vwandaka mosi.) . . . dibanza mosi mpe na kisika mosi.

Mpe na mbala mosi me kwiza makelele me katuka na mazulu mutindu mupepe ya ngolo, mpe fulukaka . . . muvimba yinzo kisika bawu vwandaka ya kuvwanda. (Ya kufukama ve, vwandaka sambila ve, kasi ya kuvwanda.) . . .

. . . Milaka kabukaka . . . (M-i-l-a-k-a—milaka. “Kabukaka” zola kutuba, “ya kukabisa.”) . . . Milaka . . . kotalanaka na bawu . . . mutindu . . . tiya, mpe mosi . . . (“Mosi,” na mosi) . . . kuvwandaka na zulu ya mosi na mosi ya bawu.

Mpe bawu nyonso fulukaka . . . (“Mpe,” kima ya kuvukisa ya bampova.) . . . nyonso fulukaka na Mpeve-Santu, mpe banda na kuzonza na bandinga yankaka, mutindu Mpeve vwandaka twadisa bawu na kuzonza.

Ntangu yayi ya vwandaka na Jérusalem ba-Juif, bantu ya kukwikama, yina katukaka na bayinsi nyonso ya yinza.

. . . ntangu yayi vwandaka . . . mpe nsangu yayi panzanaka, bantu mingi kwizaka, mpe yitukaka, samu ti . . . kongo mosi kuwaka . . . yandi kuzonza na ndinga ya yandi.

³⁴ Ntangu yayi beno tala! Ntangu tiya kwizaka, ya vwandaka milaka; ntangu bawu vwandaka zonga, ya vwandaka ndinga. Ntangu yayi, ya kele na luswaswanu ya nene na kati-kati ya milaka mpe bandinga. Na beto ya kele nyonso mosi. Kasi, na ki-Grec, “mulaka” zola kutuba yayi. [Mpangi Branham me pesa kifwanukusu—Mu.] Dikutu kele yayi. Beno me mona? Ya zola kutuba ve ndinga; ya zola kutuba kitini ya nzutu ya beno ya kele mulaka. Kana beno tala, ba bangulaka yawu milaka ya tiya yina zola kutuba “mutindu milaka,” kaka mutindu nlemo ya tiya, nlemo ya yinda ya tiya. Ntangu yayi, beno tala mbote kisika ba ke

na kubyeta ntangu yayi. Mpe mosi na mosi na bisika yngo ntangu yayi, beno zimbana yawu ve.

³⁵ Ntangu yayi, beto ke pesa mwa kifwanukusu na nkokila yayi. Mpe mu ke bika yawu na beno na kutala. Ntangu yayi beno bambuka moyo, kana kima kele ya kuswaswana ya me tala beno. Kasi mutindu kaka muntu lenda kuzwa kima na Nzambi ya kele na nzila ya lukwikilu. Mpe ntete beno lenda . . .

³⁶ Mu fwana zaba yina mu ke na kusala ntete mu kuzwa lukwikilu na yina mu ke na kusala. Samu na yinki beno kwelaka kento ya beno? Beno kele na lukwikilu na yandi. Beno me teza yandi, beno me tala yandi mbote, beno me mona kisika yandi me katuka, nani yandi vwandaka. Ya kele mutindu na Masonuku, na Nzambi. Ya kele yina ke salaka ba-vision yayi, Dikunzi ya Tiya yayi, bima nyonso yayi, samu ti Nzambi silaka yawu. Nzambi tubaka mutindu yina. Mu me teza Yandi na nzila ya Ndinga ya Yandi mpe mu zaba ti Yawu kele Kieleka. Mpe beno ke landa Ndinga ya Yandi. Na yina kana ya kele na mwa muvusu kisika, kuna ya kele na kima ya luvunu kisika. Samu ti Nzambi (beno kuwa!)—Nzambi ata mbala mosi ve me salaka to ata mbala mosi ve ke sala na ngaanda ya Yandi mosi—to ya kuswaswana na misiku ya Yandi mosi. Hiver ke kwiza ve na été, mpe été ke kwiza ve na hiver. Makasa ke kubwa ve na printemps mpe ke vutuka dyaka ve na kubwa na automne. Beno lenda kaka ve kusala yawu.

³⁷ Mutindu mu vwanda tuba mazono na nkokila na dibulu ya kisina, samu na kupesa maza na kuyonzika ya beno. To kana beno kele ya kutelama awa na kati-kati ya bilanga, mpe ti ya kele na mpimpa ya ndombi, mpe ti beno tuba, “Oh, lotiliki ya nene, mu zaba ti nge kele na kati ya bilanga. Ntangu yayi, mu me zimbana, mu zaba ve kisika mu ke na kukwenda. Pesa nsemo, samu mu lenda kumona mutindu ya kutambula! Ya kele na lotiliki mingi samu na kupesa nsemo na bilanga.” Ya kele kieleka. Yinga, tata! Ya kele na lotiliki mingi na kati ya kivinga yayi samu na kupesa yawu nsemo kukondwa kwandi minda yayi, kukondwa yawu. Kasi beno fwana kutwadisa yawu. Ntangu yayi, beno lendaka boka na yawu tii beno ke lenda dyaka ve kuboka, ata mbala mosi ve ti yawu ke pesa nsemo. Kasi kana beno sala landila misiku ya lotiliki, kuna beno ke kuzwa nsemo.

³⁸ Mbote, ya kele mutindu mosi ya kele na Nzambi. Nzambi kele Kiyidiki ya nene ya mazulu mpe ntoto, mutindu mosi mazono, bubu yayi, mpe kukondwa nsuka. Yandi kele dyaka Nzambi. Kasi Yandi ke salaka kaka landila mutindu beno ke landa misiku mpe malongi ya Yandi. Bankundi, mu ke tuba yayi: ata mbala mosi ve ti yawu me kondwa, mpe ya ke kondwa ve.

³⁹ Ntangu yayi, beto tala. Yesu na Luc 24:49 pesaka kisalu na bantumwa na manima bawu me vuuka mpe me santisama landila Ndinga; ya kunungisa na kukwikilaka na Mfumu Yesu;

ya kusantisa na Jean 17:17 ntangu Yesu tubaka, “Santisa bawu, Tata, na nzila ya Kieleka. Ndinga ya Nge keke Kieleka.” Mpe Yandi vwandaka Ndinga.

⁴⁰ Ntangu yayi, pesaka bawu ngolo ya kubelusa bambevo, ya kubasisa bampeve ya yimbi, ya kuvumbula bantu ya kufwa; mpe bawu vutukaka na kuyangalala. Mpe bankumbu ya bawu vwandaka na Buku ya Luzingu ya Mwana dimeme. Beno ke bambuka moyo mutindu beto lutilaka na yawu awa. Kasi bawu ndimaka ntete ve. Yesu tubaka na Pierre na mpimpa ya kukoma ya Yandi na kulunsi; Yandi tubaka, “Na manima nge me ndima, kuna kindisa bampangi ya nge.”

⁴¹ Mpeve-Santu kele yina . . . Beno ke na kukwikila tii Luzingu ya Kukonda nsuka, kasi ntangu Mpeve-Santu ke kwiza Yawu keke Luzingu ya Seko. Beno ke na kukwikila tii . . . Beno kele ya kubutama na Mpeve na kusantisama, kasi ata mbala mosi ve ya kubutama na Mpeve tii Mpeve-Santu ke kwiza na kati. Ya kele ya kulunga. Bébé ke na luzingu na kati ya kivumu ya mama, mwa misisa ke na kuningana; ya kele luzingu. Kasi ya kele luzingu ya mutindu yankaka ntangu yandi ke pema mupepe ya luzingu na kati ya bambombo ya yandi. Ya kele ya kuswaswana. Ya kele yina yawu kele, ya kele . . .

⁴² Mpangi ya munu ya luzolo ya Méthodiste, mpe ya Pèlerin de la Sainteté, mpe ya Nazaréen, mbotika ya Mpeve-Santu kele ya kuswaswana na kusantisama. Kusantisama kele kuvedisa, yina kele kukubama ya Luzingu. Kasi ntangu Mpeve-Santu ke kwiza, Yawu keke Luzingu. Kukubama keke kusukula ya ndonga; Mpeve-Santu ke na kufulusa ndonga. *Kusantisama* zola kutuba “yina ba me sukula mpe ba me tula na lweka samu na kosalu.” Mpeve-Santu me tula yawu na kati ya kosalu. Beno kele ndonga yina Nzambi me sukula.

⁴³ Mpe beto me tala ti Mpeve-Santu kele Nzambi Yandi mosi na kati ya beno. Nzambi vwandaka na zulu ya beno na kati ya Dikunzi ya Tiya na Moïse. Nzambi vwandaka na beno na kati ya Yesu Klisto. Ntangu yayi Nzambi kele na kati ya beno na kati ya Mpeve-Santu. Banzambi tatu ve, Nzambi mosi na kusalaka na kati ya bisalu tatu.

⁴⁴ Nzambi na bumbote, kulumukaka na zulu ya muntu. Yandi lendaka ve kusimba Yandi, samu ti yandi sumukaka na nsaba ya Eden mpe kukabukaka yandi mosi na kubundana ya Yandi. Na manima yinki kusalamaka? Yandi zolaka vwanda na zulu ya yandi. Menga ya bangombe ya babakala mpe ya bakombo ya babakala zolaka bika Yandi ve kubundana na muntu dyaka; kasi misiku mpe balutumu, vwanda lakisa ntangu yayi yina vwandaka kwiza, na kupesaka munkayulu ya bangombe, mpe nyonso yina, mpe ya dimeme . . . Kuna ntangu Nzambi kulumukaka mpe zingaka na kati ya nzutu ya kusantisa, kubutama na mwense ya kento, ti Nzambi Yandi mosi . . . Beno

zaba yinki Nzambi salaka? Yandi—Yandi salaka kima ve kasi kaka . . . Yandi tulaka Tenta ya Yandi na kati-kati ya ya beto. Nzambi zingaka na kati ya Tenta ya kubokila Yesu Klisto. Yandi yidikaka kaka Tenta ya Yandi na beto, me kuma . . . (Mu ke—longila na yawu na suka, na yawu mu ke sala mbote na kubika yawu ya lweka.) Ntangu yayi, ti—yinki mutindu Nzambi vwandaka—to zingaka na beto . . .

⁴⁵ Mpe ntangu yayi Nzambi kele na kati ya beto. Yesu tubaka na Jean 14, “Na kilumbu yina beno ke zaba ti Mu kele na kati ya Tata, Tata na kati ya Munu, mpe Munu na kati ya beno, mpe beno na kati ya Munu.” Nzambi na kati ya beto. Yinki vwandaka lukanu? Samu na kulandila dikani ya Yandi.

⁴⁶ Nzambi vwandaka na dikani. Yandi zolaka kusala na kti-kati ya muntu, mpe Yandi nataka yawu na kati ya Dikunzi ya Tiya, ya vwandaka Tiya ya dinsweki yina vwandaka ya kutentama na zulu ya bana ya Israël. Na manima mutindu mosi ya Tiya yango kutalanaka na kati ya nzutu ya Yesu. Mpe Yandi tubaka Yandi vwandaka Tiya yango, “Ntete Abraham kuvwanda, Mu KELE.” Yandi vwandaka Tiya yango. Yandi tubaka, “Mu me katuka na Nzambi, mpe Mu ke vutuka na Nzambi.” Mpe na manima ya lufwa, ya kuzika, mpe ya mvumbukulu ya Yandi, Santu Paul kutanaka Yandi na nzila—ntangu nkumbu ya yandi vwandaka ntete Saul—na nzila ya Damas, mpe Yandi vwandaka dyaka ya kuvutuka na Dikunzi ya Tiya yango. Nsemo kufwaka meso ya yandi. Ya kele kieleka.

⁴⁷ Mpe Yandi yayi bubu yayi, Dikunzi ya Tiya mosi, Nzambi mosi yina ke na kusala bidimbu mosi, bisalu mosi. Samu na yinki? Yandi ke na kusala na kati-kati ya bantu ya Yandi. Yandi kele na kati ya beto. Mu . . . Yandi kele na beno ntangu yayi, “kasi mu ke vwanda na kati ya beno. Mu ke vwanda na beno, mpe na kati ya beno, tii nsuka ya bima nyonso,” nsuka ya yinza. Yandi ke vwanda na beto.

⁴⁸ Ntangu yayi, beno tala. Yesu pesaka bawu lutumu ya kumata na Jérusalem mpe kuingila. Mpova *vwanda* zola kutuba “kuingila,” zola kutuba ve kusambila, zola kutuba “kuingila.” Bawu vwandaka ntete ve bantu ya kulunga samu na kulonga, samu ti bawu zabaka kaka mvumbukulu ya Yandi na lufwa na nzila ya Muntu ya Yandi, na kumonaka Yandi na ngaanda. Yandi—Yandi pesaka bawu lutumu ya kulonga dyaka ve, na kusala kima ve tii ntete bawu ke vwanda ya kulwata Ngolo ya zulu.

Mu ke kwikila ve ti mulongi yina Nzambi me fidisa to lenda vwanda ya kubyeka mbote . . . samu Nzambi kele yina ke na nsuka ve Mpe yina Nzambi me sala mbala mosi, Yandi ke sala ntangu nyonso. Ntangu yayi, kana Nzambi lendaka bika ve bawu kulonga tii bawu kwendaka na Pantekote mpe kuzwaka nzingilu ya Pantekote, muntu ve, kana ti nsatu mosi ya nene ya yandi mosi

to organisation mosi me tumisa yandi, ke na muswa ya kuluta na chaire tii yandi ke fuluka na Mpeve-Santu. Ya kele kieleka ya kulunga. Samu ti yandi ke na kutwadisa bawu landila mutindu ya kutala ya mayela ya organisation mosi tii yandi ke fuluka na Mpeve-Santu; mpe kuna, yandi ke pesa bawu madya ya yembe; *Mwana ya Dimeme mpe Yembe*, mutindu beto zonzilaka mazono na nkokila.

⁴⁹ Ntangu yayi beno tala. Yandi tubaka, “Benó mata na Jérusalem mpe beno vwanda kuna; beno vingila kaka kuna tii mu ke fidisa nsilulu ya Tata.” Mpe kuna, yinki bawu kusalaka? Ba vwandaka nkama na kumi zole, babakala mpe bakento. Bawu kwendaka na kati ya kivinga ya zulu ya tempelo.

Ntangu yayi, ya vwandaka pene-pene ya kilumbu ya Mukembo ya Pantekote, na kuvedisa ya sanctuaire, lufwa ya mwana ya dimeme pascal tii nkwizulu ya Pantekote, ya vwandaka bambuma ya ntete ya kuyonzika, jubilé, jubilé ya Pantekote. Mpe na bayinzo ya nene. . .

⁵⁰ Ntangu yayi, mu vwandaka na bayinsi yina. Bayinsi ya esete na mpasi ya vwanda vwandaka na kikalu na kati. Kikalu vwanda vwandaka na ngaanda. Na ngaanda ya tempelo, ba tubaka na beto, ya vwanda vwandaka na kikalu yina vwanda nata na mwa kivinga mosi na zulu; ya lungaka kumata, mpe kumata, mpe kumata, tii beno ke kuma na zulu na mwa kivinga ya zulu kuna, mutindu kivinga ya kubumba bima na zulu ya tempelo, mutindu mosi ya mwa kivinga, kivinga ya zulu. Mpe Biblia ke tuba ti bawu vwandaka na kati kuna mpe myelo vwandaka ya kukanga, samu ti bawu vwandaka na boma ya ba-Juif, samu ti ba zolaka zenga bawu na bitini-bitini samu na kusambila Mfumu Yesu, na manima Caïphe nganga-Nzambi ya mbuta, mpe Ponce Pilate, mpe bawu tulaka Yandi na lufwa. Na yawu ba vwanda zola kumanisa na nyonso yina ba ke bokilaka Baklisto. Mpe myelo vwandaka ya kukanga, mpe bawu vwandaka vingila.

⁵¹ Ntangu yayi, na bivinga yango ya mutindu yina, ya kele na banela ve. Banela vwandaka mwa bima ya bisengo mutindu myelo, yina beno ke benda samu na kufungula. Na bivinga yango ya kele na mwa minda ya mafuta yina kele ya kulelika mpe ke na kupela. . . Kana beno me kwendaka yimeni na Californie na Cafétérie ya Clifton, beno kwenda na yisi ya yinzo, mpe beno ke kumona mosi kaka mutindu mosi, na kivinga ya zulu. Beno me vwandaka ntete kuna? Bantu yikwa awa me vwandaka ntete kuna? Mu me mona bantu kuningisa yintu na kundima. Mbote, beno zaba yina mu ke na kuzonzila. Mbote mingi. Beno kwenda na yisi kuna, mpe beno ke mona Nsaba ya Gethsémané; ntete, beno ke kota na mosi ya bivinga yango ya esete. Ya kele kaka kieleka. Kuna beno ke kumona mwa mwinda ya kufulukana na mafuta ya olive na mwa nsinga ya mwinda na kati ya yawu, ke na kupela.

⁵² Ntangu yayi, beto tuba ti bawu vwandaka na zulu kuna, ti bawu vwandaka me mata kikalu ya ngaanda yayi. Bawu mataka kuna mpe bawu vwanda bumbama, samu ti bawu vwandaka na boma ya ba-Juif. Yesu tubaka na bawu ve na kukwenda na kivinga ya zulu. Yandi tubaka kaka, “Beno vingila na Jérusalem.” Kana bawu vwandaka na yisi awa na kati ya yinzo, mpasi na kutuba yinki zolaka salama. Bawu zolaka kwiza na kati mpe kuzwa bawu. Na yawu bawu kwendaka na mwa kivinga mosi ya ntama na bikalu ya zulu, kuna na zulu na kisika ya kubumba bambuma, mpe kuna, me kanga na ngolo kivinga samu ti ba-Juif kulenda ve kukota na kusimba bawu. Mpe bawu vwandaka kuna na kulingilaka bilumbu kumi.

⁵³ Awa, ntangu yayi, beto kele na Actes 1. Ntangu yayi, beno kuwa mbote ntangu yayi. Beno me tala kifwanisi? Na ngaanda ya yinzo ya nene mwa kikalu vwandaka kwenda tii na zulu, mpe bawu kwendaka na kati ya mwa kivinga yayi. Na yisi na kati ya tempelo ba vwandaka sala Mukembo ya Pantekote. Oh, ya vwandaka na ntangu ya nene yina vwandaka salama kuna. Ntangu yayi, ntangu kilumbu ya Pantekote kumaka, bawu nyonso vwandaka na dibanza mosi, dibanza mosi, vwanda kwikila ti Nzambi zolaka fidisa nsilulu yango. Ti muntu nyonso na kati awa kukota na mutindu mosi ya dibanza yango na nkokila yayi mpe kumona yina ke salama. Ya fwana kusalama dyaka. Ya kele nsilulu mutindu kaka bawu kuzwaka. Beno me mona?

⁵⁴ Yinki bawu vwandaka sala? Bawu vwandaka landa malongi, vwandaka landa misiku ya Nzambi: “Beno vingila tii. . .”

⁵⁵ Ntangu yayi, bawu vwandaka na boma ya ba-Juif. Ntangu yayi, beno bambuka moyo na yawu. Bawu vwandaka na boma ya ba-Juif. Ntangu yayi, na mbala mosi ya me kwiza makelele mutindu mupepe ya ngolo. Ya vwandaka ve mupepe ya ngolo; ya vwandaka mutindu mupepe ya ngolo. Mu ke tanga milabu kaka na bamuniti fyoti landila mubangudi. Ya vwandaka mutindu mupepe ya ngolo. Na nzonzolo yankaka, ya vwandaka mupepe ya mazulu (oh!), kima bawu lendaka kuwa na nzutu. Mupepe vwandaka na kati ya bawu. Kuna me kwiza mupepe ya ngolo, mutindu mupepe ya ngolo. Mupepe vwandaka ve ngolo, kasi ya wakanaka kaka mutindu mupepe ya ngolo, mutindu kima kusala: Fiou! Beno me kuwaka yawu ntete na nzutu? Oh, la la! Mutindu mupepe ya ngolo. Ntangu yayi beno tala mbote. Mpe yawu fulusaka . . . Ntangu yayi, na kati awa ya me tuba “nyonso,” kasi na ki-Grec ya kele ya kutuba “ya Muvimba (Na nene M-u-v-i-m-b-a), Yinzo ya Muvimba,” kisika nyonso na kati kuna. Konso mwamvu, nsongi, mpe kupasuka vwandaka monana ya kifuluka na yawu. Kutuba ve, “Mu tuba, Bankundi, beno ke na kuwa na nzutu yina me ke na kuwa?” Ve! Ya vwandaka bisika nyonso, mutindu mupepe ya ngolo. Ntangu yayi beno tala mbote. “Kuna me kwiza makelele mutindu mupepe ya ngolo mpe

(kivukisi ya bampova. Ntangu yayi beno tala mbote *ba-mpe* yayi. Kana ve, beno ke sala Yawu kutuba kima yina Yawu me tuba ve. Beno me mona?)—mpe mutindu (ya kele yina kusalamaka ntete vwandaka makelele, kima mutindu mupepe ya ngolo m kwiza na zulu ya bawu)—(beno me bambuka moyo, mazono na nkokila Mu kwendaka na magazine mpe sumbaka dimpa mpe musuni. Ya kele na kima kwendaka na yawu. Dimpa kele kima mosi, musuni kele yankaka. Mpe makelele vwandaka kima mosi yina bulaka bawu)—mpe ya talanaka na bawu, (na ntwala ya bawu) milaka—milaka ya kukabuka.”

⁵⁶ Ya ke na muntu na kati awa yina me monaka ntete *Misiku Kumi* ya Cecil DeMille? Keti beno talaka ntangu Misiku kusunamaka? Mutindu yandi simbaka yawu, mu vwanda zaba ve. Ya vwandaka na bima zole to tatu yina mu monaka na kati yawu yina mu zolaka mingi. Kima ya ntete kele nsemo ya ntinta ya saka-saka, ya kele kieleka mutindu yina Yawu ke talanaka. Beno me mona? Kima yankaka vwandaka ntangu Musiku kusunamaka, mpe na manima yawu me manisa, beno talaka kutsyamuka na Dikunzi yango ya nene ya Tiya, ya vwandaka na mwa banlemo ya tiya yina vwandaka tsyamuka? Beno talaka yawu? Ntangu yayi, ya kele yina mu banza ti yayi vwandaka na Pantekote. Ya kutalanaka na bawu. . . Na yawu ba lendaka kumona Yawu. Ya tubaka ve, “Ya kubwaka na bawu.” Kasi ya talanaka na bawu banlemo (beto ke bokila yawu), malaka, mutindu dilaka mutindu dilaka awa, [Mpangi Branham me lakisa—Mu.], na nzutu ya dilaka, nlemo ya tiya. Ntangu yayi, dikutu—mutindu mu vwanda tuba, dikutu kele dikutu; musapi kele musapi. Musapi zola kutuba ve beno me kuwa yawu na nzutu; ya zola kutuba ti ya ke talana mutindu musapi. Mpe kana ya vwandaka dikutu, ya zolaka kutuba ve ti bawu kuwaka yawu; ya talanaka mutindu dikutu. Yayi vwandaka tiya yina vwandaka talana mutindu dilaka, muntu mosi ve vwandaka zonza, tiya yina vwandaka talana mutindu dilaka.

⁵⁷ Ntangu yayi, beno kuwa. Beno tala mbote mutindu na ki-Grec yawu ke tangama awa:

Mpe na mbala mosi me kwiza makelele. . . mutindu mupepe ya ngolo. . . (Nzila ya 3—ya 3.)

Mpe *milaka* ya kukabuka kutalanaka na *bawu*, . . . (Ve milaka ya kukabuka vwandaka na kati ya bawu to bawu vwandaka zonza na dilaka ya kukabuka; ya vwandaka milaka ya kukabuka kutalanaka na bawu. Ntangu yayi, beno tala mbote. Ya kele ntete ve na zulu ya bawu. Ya kele kuna na kati ya kivinga, ke na kubalukaka mutindu na kati ya mupepe yayi). . . na *bawu. . . mutindu. . . tiya. . . milaka* ya kukabuka. . . kutalanaka na *bawu. . .* (ya kele na ntwala ya bawu) *mutindu. . . tiya*, (milaka mutindu tiya) *mpe* mosi (ya mosi) kuvwandaka na zulu

ya mosi na mosi ya bawu. (Ve kwendaka na kati ya bawu; kasi vwandaka na zulu ya bawu.)

58 Ntangu yayi, beno me mona mutindu nsasa ya Roi Jacques me pesa yawu yimbi: “Mpe milaka ya kukabisa me kwiza na zulu ya bawu, to vwandaka (wapi mutindu ya ke tangama na Roi Jacques kuna?) me vwanda na zulu ya bawu.” Beno me mona? Ntangu yayi, ya zolaka mata kuna ve mpe kuvwanda. Beto zaba yawu. Kasi na ya ntete ya ke tuba, “Yawu tentamaka na zulu ya bawu,” mu ke kwikila; mutindu yina ve? Bika mu kutukila kaka yawu na mutindu ya kulunga. Yinga! “. . . tentamaka na zulu ya mosi na mosi ya bawu.” Dilaka mosi ya tiya kutentamaka na zulu ya mosi na mosi ya bawu. Beno me mona kuna? Beno ke na kubakula yawu? Ya kele kima ya zole yina kusalamaka. Ya ntete kuvwandaka mupepe, na manima kutalana ya milaka ya tiya.

59 Ya vwandaka na kati ya mwa kivinga yayi awa na mwa minda ya mafuta yayi yina vwandaka pela. Beno banza na bawu ya kuvwanda na zulu kuna. Mpe mosi tubaka, “Oh!” Yandi talaka bisika nyonso na yinzo; ya vwandaka bisika nyonso na yinzo. Na yina bawu tubaka, “Beno tala!” Milaka ya tiya kubandaka na kwiza na yinzo. Ntangu yayi beno tala. Mpe kuna me talana milaka yayi ya tiya.

Ntangu yayi beno tala mbote yina ke landa:

Mpe (Kuvukisa dyaka ya bampova; kima yankaka kusalamaka.) *bawu nyonso kufulukaka na Mpeve-Santu, . . .* (Kima ya zole yina kusalamaka.)

60 Ntangu yayi beno mona, beto zola kusobisa kutuba yayi, “Ba vwandaka na milaka ya tiya, mpe yawu vwandaka tuba yimba ndinga; mpe kuna basikaka mpe bandaka na kuzonza na ndinga ya kuzabana ve.” Ya kele na kima mutindu yina ve na kati ya Masonuku, nkundi. Muntu nyonso yina ke zonza na ndinga ya kuzabana ve na ntangu yandi ke kuzwa Mpeve-Santu ke sala yawu na mutindu ya kuswaswana na Biblia. Mpe mu ke lakisa na beno na baminuti fyoti mpe ke talisa na beno ti mu ke kwikilaka na kuzonza na bandinga ya kuzabana ve, kasi na ntangu ya kuzwa Mpeve-Santu ve. Ya kele dikabu ya Mpeve-Santu. Mpeve-Santu kele Mpeve.

61 Ntangu yayi beno tala mbote. Milaka yayi vwandaka na kati ya kivinga mutindu tiya, mpe yawu kutentamaka na zulu ya mosi na mosi ya bawu. Na manima bawu kufulukaka na Mpeve-Santu (kima ya zole), mpe kuna, na manima ti bawu me fuluka na Mpeve-Santu, bawu zonzaka na bandinga, ve na milaka, na bandinga. Beno me tala yawu? Bawu bandaka na kuzonza na bandinga yankaka mutindu Mpeve vwandaka twadisa bawu na kuzonza. Ntangu yayi, makelele yayi kupanzanaka.

62 Ntangu yayi beno tala mbote. Ntangu yayi, beto baka dyaka kifwanukusu samu beno zimbana yawu ve ntangu yayi. Landila Masonuku, na kivinga ya zulu vwandaka vingila, mbala mosi

makelele mutindu mupepe ya ngolo, yina me kwiza na zulu ya bawu; yina vwandaka Mpeve-Santu. Bantu yikwa kwikilaka ti ya vwandaka kutalana ya Mpeve-Santu? Mutindu mupepe, mupepe ya kimpeve. Na manima bawu talaka. Mpe kuna ya vwandaka na mwa milaka ya tiya, na nkama na makumi zole ya bawu, mpe bandaka na kulumuka mpe kutentama na zulu ya mosi na mosi ya bawu. Yinki ya vwandaka? Yinki ya vwandaka? Dikunzi ya Tiya, ya vwandaka Nzambi Yandi mosi ya kukabuka Yandi mosi na kati-kati ya bantu ya Yandi, na kukwizaka na kati ya bantu. Yesu vwandaka na muvimba ya kima; Yandi vwandaka na Mpeve kukondwa kitezo; beto kele na Yawu na kitezo (Beno me mona yina mu zola kutuba?), samu ti beto kele bana ba me ndima. Luzingu ya Yandi—Luzingu ya Yandi ya Kukonda nsuka vwandaka kwizaka na kati. Ntangu yayi, yinki kusalamaka? Kuna bawu nyonso kufulukaka na Mpeve-Santu.

⁶³ Ntangu yayi, mu zola kuyufula beno kima. Na wapi ntangu makelele kubandaka? Kana bawu basikaka na kivinga ya zulu yina samu na kukulumuka bikalu yina mpe kukwenda na ngaanda ya yinzo ya mfumu—to na ngaanda na—na ngaanda ya tempelo, yina vwandaka na kutala lutangu ya mwa bayinzo katuka kisika bawu vwandaka, na zulu ya bikalu mpe na yisi, na bangaanda kisika bantu nyonso vwandaka ya kuvukana kintwadi. . . Mpe bawu basikaka kuna mutindu ya kulawuka na Mpeve. Samu ti bantu vwandaka tuba, “Bantu yayi kele ya kufuluka na vinu ya malu-malu.” Ata mbala mosi ve ti bawu kumonaka kima ya mutindu yina.

⁶⁴ Mpe moi na mosi ya bawu vwandaka meka na kutuba, “Mpeve-Santu me kwiza. Nsilulu ya Nzambi kele na zulu ya munu. Ba me fulusa munu—munu na Mpeve.” Mpe yandi na kuvwandaka muntu ya Galilée, muntu na yina yandi vwandaka zonza, Arabe to muntu ya Perse, vwandaka kuwa yandi na ndinga ya yandi mosi.

⁶⁵ “Yinki mutindu beto ke na kuwa (ndinga ya kukondwa kuzabana ve)—wapi mutindu beto nyonso ke na kuwa na ndinga ya beto ya bwala. Ti bawu nyonso yayi kele bantu ya Galilée ve?” Mpe ya lendaka vwanda ti bawu vwandaka zonza na ndinga ya Galilée. . . Kasi ntangu bawu kuwaka yawu, ya vwandaka na ndinga ya bawu ya bwala. Kana mutindu yina ve, mu zola beno kuyufula munu—kupesa munu mvutu na kyuvu yayi: Yinki mutindu ya salamaka ti Pierre kutelamaka kuna mpe zonzaka na ndinga ya Galilée, mpe nkonga nyonso kuwaka yina yandi vwandaka tuba? Mafunda tatu ya mioyo kwizaka na Klisto kaka kuna mpe Pierre vwandaka zonza na ndinga mosi. Kieleka! Ya vwandaka Nzambi yina vwandaka sala kimangu. Pierre, na ntwala ya nkonga ya bantu mosi yina ke zingaka na Mésopotamie, mpe banzenza, mpe bayina me kumaka ba- juif, mpe bantu nyonso yina katukaka yinza ya muvimba vwandaka ya kutelama kuna. . . Mpe Pierre vwandaka ya kutelama mpe

vwandaka longa na ndinga mosi, mpe muntu nyonso vwandaka kuwa yandi, samu ti mafunda tatu balulaka ntima mpe kuzwaka mbotika na Nkumbu ya Yesu Klisto kaka kuna. Yinki mutindu?

⁶⁶ Beno me mona, bankundi, mu ke na kuingila ve ti mpangi ya munu ya dénomination, ya Pantekote kundima yawu malu-malu yayi. Kasi beno landila nzila nyonso na Biblia mpe beno tuba na munu na ntangu kisika bawu kuzwaka ntete Mpeve-Santu mpe ti bawu kuzonzaka na ndinga yina bawu vwandaka zaba ve yina bawu vwandaka zonza. Mpe kana ya kele mutindu bawu kuzwaka Yawu kuna, Nzambi mfumu... Ya fwana kusalama konso ntangu mutindu mosi.

⁶⁷ Ntangu yayi, mu lenda ve... Ntangu yayi, na yinzo ya Corne-... Beto ke bambuka moyo, ntangu beto kulumukaka na Samarie, mazono na nkokila, beto monaka ti ya vwandaka ve na kima mosi yina ba sonikaka na zulu ya kuwaka bawu na ndinga mosi yankaka, kima ve kele ya kutuba na zulu ya yawu. Kasi ntangu bawu kwendaka na yinzo ya Corneille, kisika ya vwandaka na bantu ya yinsi tatu, bawu zonzaka na bandinga. Mpe ntangu bawu salaka yawu, kana bawu salaka yawu, bawu kuzwaka Yawu, Pierre tubaka, mutindu mosi bawu kuzwaka Yawu na mbandukulu. Mpe bawu zabaka ti Bantu ya makanda kuzwaka lemvo ya Nzambi, samu ti bawu kuzwaka Mpeve-Santu kaka mutindu bawu kuzwaka na mbandukulu. Mu kele na kyuvu awa, kima na zulu ya yawu na baminuti fyoti. Mu vwanda zola kutula fondasio, samu beno kumona yinki ya kele.

⁶⁸ Ntangu yayi, mu ke vingila ve ti bantu yina ba longaka mutindu yankaka... Mpe beno kuwa munu, nkundi ya munu, ya luzolo, ya ntalu ya Pantekote. Mu lenda longisa yayi ve na ngaanda. Yayi kele... Mu zola ve kusala kima yina ke nata mindondo. Kasi kana beto kuzwa Kieleka ve, na wapi ntangu beto ke banda? Beto fwana kuzwa kima yina ke baka kisika samu na kusungika beto. Beto fwana kuzwa lemvo ya enlevement awa ntangu yayi. Kieleka fwana kukwenda na mantwala.

⁶⁹ Yinki ke sala muntu kana yandi vwandaka ya kufwa makutu, mpe dibaba, mpe lendaka zonza ata fyoti ve? Yandi lenda kuzwa Mpeve-Santu? Yinki kana yandi vwandaka na ndinga ve na kubanda, mpe ti muntu ya mawa yayi ke zola kuvuuka? Beno me mona? Ya kele Mpeve-Santu, ya kele mbotika. Mpe kuna, makabu nyonso yayi mutindu kuzonza bandinga ya malu-malu, ntendulu ya bandinga ya malu-malu, ya kele na manima beno me kota na kati ya Nzutu na nzila ya mbotika ya Mpeve-Santu. Samu ti makabu yango kele na kati ya Nzutu ya Klisto.

⁷⁰ Ntangu yayi, nsasa samu na yina mu me tuba... Ntangu yayi beno tala awa. Beno ke vingila ti dibuundu ya Katolika, yina vwandaka dibuundu ya ntete yina ba bongisaka na yinza na manima bantumwa... Kuna dibuundu ya Katolika kubongisamaka, oh, bamvula bankama mingi na manima ya

lufwa ya ntumwa ya nsuka, mwa bankama sambanu mpe—bamvula na manima ya bantumwa, kaka na manima ya Concile ya Nicée, ntangu batata ya Nicée kuvukanaka mpe bongisaka; kuna bawu salaka dibuundu ya bayinsi nyonso, ya vwandaka dibuundu ya Katolika. Na kuna bawu salaka dibuundu ya yinza. Mpe mpova *katolika* zola kutuba “ya yinsi nyonso”; ya kele kisika nyonso. Bawu. . . Ya Rome—Rome mumpuni kumaka Rome pape. Mpe bawu tulaka pape na kuvwanda mfumu samu na kubaka kisika ya Pierre, yina bawu banzaka mpe tubaka ti Yesu pesaka bafungula ya Kimfumu. Mpe pape yina vwandaka ya kuvunakana ve, mpe yandi kele dyaka bubu yayi samu na dibuundu ya Katolika. Ti. . . Mpova ya yandi kele musiku mpe lutumu. Yandi kele pape yina lenda kuvunakana ve. Ya kundimamaka.

⁷¹ Mpe na yina, samu ti bawu zolaka ve na kundima na malongi ya Katolika, ba lutisaka bawu na lufwa, ba vwandaka nyengisa bawu na kisika ya kikunku ya bayinti, mpe nyonso yankaka. Beto nyonso zaba yawu landila masonuku ya santu ya Josephu, mpe na *Buku ya Fox ya Bayina Kufwaka Samu na Lukwikilu ya Bawu*, mpe mingi yankaka ya santu. . . *Bababylone Zole* ya Hislop, mpe masolo ya nene. Kuna, ya—na manima ya bamvula bankama kumi na tanu, mutindu beto zaba, ya Bansungi ya Mudidi, ba katulaka bantu Biblia. Mpe Yawu vwandaka—Yawu vwandaka ya kubumba na mwa moine mosi, mpe nyonso yina, ya kele yina beto me bakula.

⁷² Kuna na manima ya yawu me kwiza kusungika ya ntete yina vwandaka na Martin Luther. Mpe yandi me tula dikulu mpe tubaka ti mbundana yina Katolika ke bokilaka nzutu—nzutu ya nsuni ya Klisto, ya ke monikisa kaka nzutu ya Klisto. Mpe yandi losaka kominyo na zulu ya autel, to na zulu ya kisika ya kudyata, mpe mangaka na kubokila yawu nzutu ya kulunga ya nsuni ya Klisto, mpe longaka, “Muntu ya kudedama ke zinga na nzila ya lukwikilu.” Ntangu yayi, beno ke vingila ve ti dibuundu ya Katolika kuwisana na yandi, kieleka ve, na yina ti mfumu ya bawu ya lenda kuvunakama ve ke tuba na bawu ve. Mbote mingi.

⁷³ Kuna na manima ya Martin Luther, na kulongaka Kunungisama, John Wesley me kwiza na kulongaka Kusantisama. Mpe yandi longaka ti muntu, na manima ya kuvwanda ya kundimama (ya kele ya kulunga) kasi beno fwana vwanda ya kusantisa, ya kusukula, ti na nzila ya Menga ya Yesu ba me katula beno musisa ya dyabulu. Ntangu yayi, beno lenda ve kvingila ti bantu ya Luther kulonga Kusantisama, samu ti bawu ke sala yawu ve.

⁷⁴ Na manima Wesley longaka Kusantisama, mpe mwa bitini mingi kukabukaka na yawu, kuna kwizaka, ba-Wesleyen Méthodiste, mpe ba-Nazaréen, mpe nyonso yina, yina kangaka tiya na kupela na nsungi ya bawu, na manima me kwiza bantu

ya Pantekote mpe tubaka, “Mbote, Mpeve-Santu kele mbotika, mpe beto ke zonzaka na bandinga ya malu-malu na ntangu ya kuzwa Yawu.” Kieleka. Kuna ntangu yina kwizaka, beno zolaka vingila ve ti ba-Nazaréen, mpe ba-Wesleyen Méthodiste, mpe nyonso yina kukwikila yawu. Ba zolaka sala yawu ve. Bawu kubokilaka yawu dyabulu. Mbote mingi. Yinki kusalamaka? Bawu kubandaka na kubwa; Pantekote bandaka na kutelama. Ntangu yayi yawu kutelamaka na kisika tii Pantekote kuzwaka kuningisa ya yawu. Yawu kubongamaka mpe basikaka, ke ndima kima yankaka ve. Bawu kele na balutumumu mpe misiku ya bawu mosi, mpe yina ke sukisa yawu.

⁷⁵ Ntangu yayi, na yina Mpeve-Santu ke kota mpe ke monikisa Kieleka ya kima mpe ke lakisa yawu na nzila ya Mvwandulu ya Yandi Mosi mpe na nzila ya Ndinga ya Yandi, beno lenda vingila ve ti bantu ya Pantekote kutuba, “Mu ke wisana na yawu.” Beno fwana kutelama beno mosi mutindu Luther kusalaka, mutindu Wesley kusalaka, mpe mutindu bayankaka ya bawu kusalaka. Beno fwana kutelama na zulu ya yawu samu ti ngunga me kuma. Mpe ya kele yina ke salaka munu kivadangu ya yimbi. Ya kele yina ke salaka munu mutindu yankaka.

⁷⁶ Mpe mu lenda kubanda ve mutindu Bampangi ya munu ya ntalu Oral Robrerts, mpe Tommy Osborn, Tommy Hicks, mpe bayankaka, samu ti mabuundu ke wisana ve na munu. Bawu ke tuba, “Yandi ke kwikilaka na lukengolo ya seko. Yandi kele Baptiste. Yandi ke kwikilaka ve na kuzonza ya bandinga ya malu-malu mutindu kimbangi ya ntete ya Mpeve-Santu. Vwanda ntama na muntu yina!” Beno me mona?

⁷⁷ Kasi beno tala yawu na ntwala ya beno. Beno tala yawu. Bawu lenda kwenda tala bantu ya Luther, ba-Méthodiste lenda. Bantu ya Pantekote lenda kwenda tala ba-Méthodiste. Mu lenda kwenda tala bantu ya Pantekote na yawu. Ya kele kaka ya kulunga. Ya kele kieleka. Samu na yinki? Beto ke na kutambula na kati ya Nsemo mutindu Yandi kele na kati ya Nsemo. Beno me mona? Beto ke na kumata Nzila ya Ntinu, mpe na yina beto ke na kwenda na ntwala, lemvo mingi me pesama, ngolo mingi me pesama, mingi ya kimpeve me pesama. Mpe beto bawu yayi. Yayi kele ngunga na kisika Mpeve-Santu me kulumuka na kati ya nzutu ya Nsemo mutindu Yandi vwandaka na mbandukulu, Dikunzi ya tiya, mpe me talana Yandi mosi, na kusalaka bima kaka mosi yina Yandi salaka ntangu Yandi vwandaka awa na zulu ya ntoto. Mpe Yesu tubaka, “Wapi mutindu beno ke zaba kana ya kele kieleka to ve? Na nzila ya bambuma ya bawu beno ke zaba bawu. Yandi yina ke kwikila na Munu, bisalu yina Mu ke salaka yandi mpe ke sala yawu. Bidimbu yayi ke vwanda na bayina ke kwikila.”

⁷⁸ Ntangu yayi, bankundi ya munu ya Pantekote. Mu kele na beno. Mu kele mosi ya beno. Mu ke na Mpeve-Santu. Mu zonzaka na bandinga ya malu-malu, kasi mu salaka yawu ve na manima

ya kuzwa Mpeve-Santu. Mu kuzwaka mbotika ya Mpeve-Santu; mu zonzaka na bandinga ya malu-malu, mu pesaka profesu, kuzwaka makabu ya luzabu, ya ndwenga, bantendulu, mpe bima nyonso kusalamaka. Kasi mu kele na luve na mosi na mosi ya bima yango, samu ti ntangu yayi mu kele mwana ya Nzambi. Ngolo, Tiya ya Nzambi kele na kati ya moyo ya munu; dilaka yango ya Tiya yina tentamaka—kwizaka na kati ya munu mpe nyengisaka bima nyonso yina vwandaka ya kuswaswana na Nzambi, mpe ntangu yayi mu kele ya kutwadisa na Mpeve ya Yandi. Yandi lenda tuba, “Kwenda *awa*,” mpe mu ke kwenda. “Kwenda *awa*”; mu ke kwenda. “Zonza *awa*”; mu ke zonza. “Mpe sala *yayi*, *yina*, mpe *yankaka yina*.” Beno bawu yayi, kaka mutindu. . . Beno kele ya kutwadisa na Mpeve. Ya kele Nzambi na kati ya beno, na kusalaka luzolo ya Yandi. Ata nyonso yina ya kele, Yandi ke na kusalaka luzolo ya Yandi.

⁷⁹ Ntangu yayi, beno kuwa. Beno bika munu kumona kutanga awa na mukanda ya bampova ntete beto kubanda bakyuvu. Ntangu yayi, na Mbangu lulu ya Vatican, Volume 7, 190—1205:

“Ya kele mpasi na kutuba kana ya vwandaka ndinga ya bantu yango yina vwandaka zonza na ndinga ya nzenza; to dyambu to nsangu ya kusala ya mupepe ya ngolo yina ningisaka bantu.”

Ba lendaka ve na kubakula yawu. Ntangu yayi beno tala mbote. Kana ya vwandaka bantu. . .

⁸⁰ Mu ke pesa kaka kifwanukusu. Awa kele nkonga ya bantu ya Galilée ya mawa, bayina na kutala ba lenda kusala kivuvu ve. Mpe awa bawu kele na ngaanda kuna na bala-bala. Ata mbala mosi ve ti bawu me monaka kima ya mutindu yawu: maboko ya bawu na zulu, me katuka kivinga yango ya zulu, me kulumuka kikalu, me katuka kuna, kaka ya kifuluka; ata mbala mosi ve ti bawu kuzonzaka ntete. Beno me mona? Awa bawu ke na kukulumuka kuna. Mpe ntangu yayi, beto tuba ti, bawu vwandaka kuna vwandaka kwenda tengu-tengu na kati-kati ya nyonso yayi. Mpe bantu tubaka. . . Muntu ya Grec mosi me kwiza na munu na mbangu mpe, me tuba, mu ke zonzaka ki-Galiléen.

Beno ke kwenda na mbangu na yandi mpe ke tuba, “Mpe wapi dyambu ke na nge, Bakala?”

⁸¹ “Mu me fuluka na Mpeve-Santu. Ngolo ya Nzambi me kubwa na zulu kuna na kati ya kivinga yina. Kima me salama na munu. Oh, Nkembo na Nzambi!”

Mpe mosi yankaka awa, yandi vwandaka zonza ki-Arabe, mpe yandi muntu ya Galilée vwandaka tuba ki-Arabe-ndinga ya Arabe.

⁸² Ntangu yayi, bawu lenda ve kutuba, kana ya vwandaka mupepe ya ngolo yina bendaka bantu ntangu bantu mingi kuvukanaka, to ya vwandaka kuzonza na bandinga ya kinzenza ti bawu vwandaka zonza? Ntangu yayi, Biblia kieleka ke ve. . .

Beno keke na bima zole yina beno lenda tala mbote. Ya vwandaka yawu... bantu ya ngaanda vwandaka tuba, “Yinki mutindu ti beto ke kuwa muntu nyonso na ndinga ya beto mosi ya bwala?” Ya ke tuba ve ti bawu vwandaka zonza yawu, kasi bawu vwandaka kuwa yawu.

⁸³ Kuna nkonga mosi yina, bantu mosi yina, bangula yayi. Pierre dumukaka na zulu ya kima mpe tubaka, “Beno bantu ya Galilée, mpe beno bayina ke zingaka na Jérusalem, ti yayi kuzabana na kati ya beno (bantu tubaka ti bawu vwandaka ve na ndinga na Galilée) ti yayi kuzabana na beno mpe beno kuwa mambu ya munu (na wapi—na wapi ndinga yandi vwandaka zonza, na bawu nyonso?); beno tala, bayayi kele ve ya kulawuka malafu mutindu beno ke banza, samu ti yayi kele ntete ngunga ya yivwa ya suka, kasi yayi kele yina kuzonzamaka na nzila ya profete Joël: ‘Mpe ya ke salama na bilumbu ya nsuka, tubaka Nzambi, Mu ke tsyamuna Mpeve ya Munu na zulu ya nsuni nyonso. Bana ya beno ya babakala mpe bana ya beno ya bakento ke pesa profesi.’” Yandi landilaka mutindu yina, mpe tubaka, “Beno na maboko ya mvindu me koma na kulunsi Mwana ya Nzambi yina zaba dyambu ve. David kuzonzilaka na Yandi... ‘ke bika ve moyo ya Yandi na kati ya difelo, to dyaka Yandi ke pesa muswa ve ti Muntu ya Yandi ya Santu kumona kupola.’” Mpe yandi tubaka, “Ti ya kuzabana na beno ti Nzambi me sala Yesu mosi yayi yina beno komaka na kulunsi Mfumu mpe Klisto.” Mpe na yina bawu kuwaka yayi... Amen! Nani? Muntu nyonso na yisi ya mazulu. Yinki vwandaka salama? Yandi vwandaka tuba ve, “Ntangu yayi, mu ke zonza na ki-Galilée; mu ke zonza na *yayi*; mpe mu ke zonza na *yayi*...?...”

⁸⁴ Na yina Pierre kuzonzaka mambu yayi, bawu tubaka, “Bampangi, yinki beto lenda sala samu na kuvuluka?” Mpe Pierre pesaka bawu mutindu ya kusala. Ya kele mutindu ya ke salamaka ntangu nyonso. Beno me mona?

⁸⁵ Ya kele kukwenda na ntwala, na kukotaka ntangu nyonso mingi na Nzambi, na kutambulaka pene-pene. Yinki mutindu beno ke zaba? Mbote ntangu yayi, ntangu Luther kuzwaka mvedolo, yandi bokilaka yawu Mpeve-Santu. Ya vwandaka yawu. Nzambi kulosaka ndambu ya Yawu kuna. Kuna Yandi tubaka yinki? Wesley kuzwaka Kusantisama, mpe yandi tubaka, “Bakala, ntangu beno ke boka, beno me kuzwa Yawu.” Kasi mingi ya bawu bokaka ti kuzwaka Yawu ve. Ntangu bantu ya Pantekote kuzonzaka na bandinga ya malu-malu—bandinga ya ba me zaba ve, bawu tubaka, “Bakala, beno me kuzwa Yawu.” Kasi mingi ya bawu kuzwaka Yawu ve.

Ya kele na bima mutindu bidimbu yina ve ti ba ke zaba yawu. “Mutindu kaka beno ke zaba yinti,” Yesu tubaka, “ya kele na nzila ya mbuma yina yawu ke basisa,” bisalu ya Mpeve, mbuma ya Mpeve. Na yina ntangu beno ke mona muntu yina me fuluka na ngolo, yina kele ya kufuluka na Mpeve-Santu, kuna

beno ke mona luzingu yina me soba. Beno ke mona bidimbu yayi kutambula na bawu yina ke kwikila: “Na Nkumbu ya Munu bawu ke basisa bampeve ya yimbi, ke zonza bandinga ya malumu. Kana nyoka kutatika bawu, ya ke talisa bawu mpasi ve. Kana bawu kuzwaka kima yina ke kufwaka, ya kunwa, ya ke kufwa bawu ve. Bawu ke tentika maboko na zulu ya bambevo, mpe bawu ke beluka.” Oh! Mitindu ya bidimbu yayi ke vwanda na bayina ke kwikilaka. Kasi yinki mutindu beno ke kota na yawu? Makabu yayi kele na kati ya Nzutu. Yinki mutindu beno ke kota na kati ya Nzutu? Ve na nzila ya kuzonza ya mutindu ya beno na kati; kasi na nzila ya kubotama na kati ya Nzutu mosi (ya Ntete ya Corinthien 12:13). Na Mpeve mosi beto nyonso kele ya kubotama na kati ya Nzutu yango mpe kele na muswa na makabu nyonso. Mfumu kusakumuna beno.

⁸⁶ Ntangu yayi, kana muntu kuwa bande yayi to muntu awa ke na kundima ve, beno bambuka moyo, beno sala yawu na malembe, mpangi, samu ti mu zola beno.

93. Kyuvu ya ntete na nkokila yayi: Mpangi Branham, mu banza ti television kele nsingulu samu na yinza. Yinki nge ke banza?

⁸⁷ Mbote, ata muntu nyonso yina me sonika yawu, mu ke wisana na beno. Bawu me sala yawu kusinga samu na yinza. Ya zolaka vwanda lusakumunu samu na yinza, kasi bawu me sala yawu nsingulu. Na kima nyonso mutindu yina, bampangi ya munu ya luzolo, ya kele yina beno ke tala beno mosi. Kana television kele nsingulu, kuna zulunale kele nsingulu, kuna ladio kele nsingulu, mpe bambala mingi alo-alo kele yawu. Beno me mona, beno me mona, beno me mona, beno me mona? Ya kele yina beno ke salaka na yawu. Kasi ya kele yina mpangi vwandaka tuba na nkokila yina, ti ya kele mpasi mingi dyaka na kuzwa bansamununu na television; ya kele mbongo mingi. Milongi ya mputu yina ke longaka Nsangu ya mbote ya Kulunga ke lenda ve nsamununu na television. Na yawu kuna . . . Mpangi tubaka nkokila yankaka yina, mu banza, kisika mosi, tubaka, “Beno kusuna ladyo ya beno,” to muntu mosi, to, “Beno basisa yawu na nsongi mpe beno kuwa bansamununu ya yawu.” Ya kele kieleka.

⁸⁸ Kasi, mpangi ya luzolo, ata nani beno kele, kieleka mu ke wisana na beno. Ya me kuma mosi bima ya kulutila yimbi samu na bantu. Na kati kuna bawu ke baka mbongo nyonso yayi awa yina zolaka kwenda na bampaku ya luyalu, mpe ke bika yawu samu na kusala bansamununu kisika ba ke sala publicit e nyonso yayi ya tabaka mpe whisky mpe bima mutindu yina, mpe ke katula yawu na bampaku ya luyalu; mpe na manima bawu ke kwiza mpe ke kuzwa milongi mpe ke nata bawu na bayinzo ya kufundisa samu na kuzwa mwa mbongo ya bawu. Mu ke wisana na beno, ya kele kima mosi ya yimbi mingi. Ntangu yayi, yina kele ve . . . Beno zaba, ya kele kaka yina ke talanaka. Matondo

na nge, mpangi ya kento, mpangi ya bakala, muntu nyonso yina vwandaka me yufula yawu.

94. Ntangu yayi, awa kele mosi ya mbote. Kyuvu: **Ya kele na bisika na kati ya Biblia mutindu na Samuel ya Ntete kapu 18:10, kisika ya ke tuba mpeve ya yimbi katukaka na Nzambi salaka bima. Mu ke bakula ve “mpeve ya yimbi kukatuka na Nzambi.” Lemvo ya nge tendula yawu.**

⁸⁹ Mbote, mu banza na lusalusu ya Mfumu, mu ke lenda. Ya zola kutuba ve ti Nzambi kele Mpeve ya yimbi. Kasi konso mpeve ya kima kele kima ya Nzambi. Mpe Yandi ke salaka kima nyonso kusala landila luzolo ya Yandi. Beno me mona?

⁹⁰ Ntangu yayi, na kyuvu ya beno, beno ke na kuzonzila na mpeve ya yimbi yina basikaka na Nzambi samu na kwenda kukwamisa Saül. Yandi vwandaka na mawa, ya mutindu—mutindu ya kunyonga, samu ti, kima ya ntete, yandi vwandaka retrograde. Mpe ntangu beno kele retrograde, mpeve ya yimbi—Nzambi ke pesa muswa na mpeve ya yimbi na kukwamisa beno.

⁹¹ Mu ke zola kutanga samu na beno kima na—na ntangu fyoti. Mu kele na dibanza yankaka na zulu ya yawu awa. Beno me mona? Konso mpeve fwana kuvwanda kima samu na Nzambi. Beno me bambuka moyo na ntangu Josaphat na Achab vwandaka kwenda na mvita? Mpe kima ya ntete beno zaba, ya vwandaka—ba vwandaka ya kuvwanda na bankotolo. Mpe Josaphat vwandaka muntu ya kusungama, mpe yandi tubaka (bantinu nyonso zole kele ya kuvwanda kuna, mpe bawu vukisaka mangolo ya bawu) mpe na yawu yandi tubaka, “Bika beto kuyufula Mfumu samu kana beto ke kwenda to ve.”

⁹² Mpe Achab kwendaka mpe bakaka bankama yiya ya baprofete yina vwandaka na yandi, bawu nyonso, yandi disaka bawu mpe kumisaka bawu nene mpe nyonso; Ba vwandaka na banzutu ya mbote. Mpe bawu kwizaka kuna, mpe bawu nyonso pesaka profesi na dibanza mosi, bawu tubaka, “Mata, mpe Nzambi ke pesa nge lungunu. Mata na Ramoth na Galaad mpe kuna Nzambi ke baka kima yango samu na nge.” Mosi ya bawu kusalaka yandi mosi mampoka zole mpe bandaka na kukima mbangu mutindu samu na kulakisa, yandi tubaka, “Na nzila ya bibongo ya kisengo yayi, nge ke basisa bawu na yinsi; ya kele samu na nge.”

⁹³ Kasi beno zaba, ya kele na kima ke salaka ti muntu ya Nzambi bima nyonso yina kunata yandi ve. Beno me mona? Kana ya wakana ve na Masonuku, ya kele na kima ya yimbi. Konso mukwikidi ya kieleka... Na yawu Josaphat tubaka, “Mbote, bantu bankama yiya yayi na kutala kele mbote. Na kutala bawu kele mutindu bantu ya mbote.”

“Oh, bawu kele,” mu banza Achab tubaka.

Kasi Josaphat tubaka, “Beno kele na mosi dyaka ve?” Samu na yinki mosi dyaka na yina beno kele na bankama yiya yina

kele ntima mosi? Samu ti yandi zabaka ti ya vwandaka na kima vwandaka tambula kaka mbote ve. Beno me mona?

Yandi tubaka, “Yinga, beto kele na mosi dyaka, mwana ya Jimla, na zulu awa,” yandi tubaka, “kasi mu yina yandi.” Kieleka. Beno ke kanga dibuundu ya yandi ntangu nyonso yina beno ke lenda. Beno ke basisa yandi na yinsi. Beno me mona? Kieleka. “Mu ke yina yandi.”

“Samu na yinki nge ke yinaka yandi?”

“Yandi ke pesaka konso ntangu baprofesi ya yimbi na zulu ya munu.” Mu banza ti Josaphat zabaka kaka kuna ti ya vwandaka—kima mosi vwandaka tambula mbote ve.

Na yawu yandi tubaka, “Beno kwenda mpe beno baka Michée.”

Na yawu bawu kwendaka na manima ya yandi, mpe awa yandi ke na kwiza. . . Na yawu ntangu bawu kwendaka, bawu fidisaka munati nsangu mpe yandi tubaka, “Ntangu yayi, vingila fyoti. Ntangu yayi, ba kele na bankama yiya ya Milongisi ya Théologie kuna. Bawu kele ya kulutila mbote na yina kele na yinsi, na ba-Doctorat, na ba-Doctorat ya droit, mpe nyonso.” Yandi tubaka, “Ntangu yayi, nge zaba, nge mwa muntu ya mawa yina longokaka ve yayi, nge ke na kuwisana ve na bisyelo nyonso yina.”

⁹⁴ Jimla tubaka yayi, to mu zola kutuba, Michée tubaka yayi: “Mu ke tuba kima ve tii yina Nzambi ke tula na yinwa ya munu, mpe kuna mu ke tuba kaka yina Yandi ke tuba.” Mu zola yawu. Mu zola yawu. Na nzonzolo yankaka, “Mu ke vwanda na Ndinga.” Ata nyonso yina bayankaka ya bawu ke tuba. Yandi tubaka, “Mbote,” yandi tubaka, “Mu ke tuba na nge. Kana nge zola ve ti ba losa nge na ngaanda, nge fwana tuba kima mutindu mosi.”

Na yawu yandi kwendaka kuna. Mpe yandi tubaka, “Mu lenda mata?”

Yandi tubaka, “Kwenda na ntwala.” Yandi tubaka, “Pesa munu mpimpa yayi. Bika mu zonzila yawu na Mfumu.” Mu zola yawu. Na yawu na mpimpa yina Mfumu kutalanaka na yandi, mpe kilumbu vwandaka landa yandi mataka. Mpe yandi tubaka, na kukwendaka, yandi tubaka, “Kwenda na ntwala; kasi mu me mona Israël mutindu dimeme yina me kondwa mvungi, ya kutsyamuka na zulu ya myongo.” Oh, la la! Yina me kwamisa yandi.

Mpe yandi me tuba, “Mu tubaka ve na nge? Mu zabaka. Ya kele kaka mutindu yandi ke salaka ntangu nyonso, ke tubaka kima ya yimbi na zulu ya munu.”

⁹⁵ Samu na yinki? Yandi vwandaka na Ndinga. Samu na yinki? Profete mosi tekilaka yandi, Ndinga ya Nzambi vwandaka kwiza na Élie, profete ya kieleka, yandi tubaka, “Samu ti nge me nokisa

menga ya muntu yina zaba dyambu ve Naboth, bayimbwa ke kunwa menga ya nge mpe.” Mpe yandi tubaka na yandi yimbi. Élisée kwendaka yimeni na Mazulu. Kasi yandi zabaka ti Élisée vwandaka na Ndinga ya Nzambi, na yawu yandi vwandaka na Ndinga. Mu zola yawu. Kuvwanda na Ndinga.

⁹⁶ Kana Biblia ke tuba Yesu Klisto kele mutindu mosi mazono, bubu yayi, mpe kukondwa nsuka; ngolo ya Yandi kele dyaka mutindu mosi; Mpeve-Santu kele samu na muntu nyonso yina zola, ti yandi kwiza, vwanda na Ndinga. Yinga, tata! Ata nyonso yina bayankaka ya bawu ke tuba. Ata mutindu bawu ke kudya mbote mpe ata lutangu ya balukolo bawu kukotaka, ya kele na kima ve ya kusala na yawu.

Na yawu kuna yandi tubaka...Muntu ya nene yayi na mampoka na zulu ya yintu ya yandi, samu na kupusa—na kutula kutula na ngaanda na ntwala ya ntinu, yandi kubelamaka mpe pesaka yandi mbata na yinwa (mwa mulongi yayi). Yandi zabaka ti yandi vwandaka kaka mwa exalté na yawu ya vwandaka ve na kima ya kutuba na zulu ya yawu, na yawu yandi pesaka yandi kaka mbata na yinwa. Yandi tubaka, “Mu zola kuyufula nge kima.” Yandi tubaka, “Na wapi nzila Mpeve ya Nzambi me kwenda ntangu Yawu me basika na munu kana nge kuzwaka Yawu?”

⁹⁷ Yandi tubaka, “Nge ke bakula ntangu nge ke vwanda na kati ya boloko kuna mutindu nkole.” Yandi tubaka, “Mu me mona Nzambi ya kuvwanda na zulu ya kiti ya mfumu (Amen! Ntangu yayi beno kuwa!), mpe basoda ya Mazulu vwandaka me vukana pene-pene ya Yandi.” Yinki vwandaka dyambu? Profete ya Yandi tubaka yimeni yinki zolaka salama na Achab. Nzambi... Ya vwandaka ve Élie tubaka yawu; ya vwandaka profete ya kukusa. Ya vwandaka Ndinga ya Mfumu, MUTINDU ME TUBA MFUMU. Mpe Michée tubaka, “Mu me mona basoda nyonso ya Mazulu me vukana pene-pene ya Nzambi na kivwandu ya nene. Mpe bawu vwandaka zonza mosi na mosi. Mpe Mfumu tubaka, ‘Nani Beto lenda kufidisa na yisi nani ya beno lenda kulumusa mpe kuvuna Achab, na kubasisa yandi kuna samu na kulungisa Ndinga ya Nzambi, samu ba kufwa yandi? Nani Beto lenda kufidisa na yisi?’”

⁹⁸ Mbote, mosi vwandaka tuba yandi *yayi* to yandi *yina*. Mpe na manima ya mwa ntangu, mpeve ya yimbi, mpeve ya luvunu me mata na kukatukaka kizunga ya yisi mpe yandi tubaka, “Kana Nge pesa kaka munu muswa. Mu kele mpeve ya luvunu. Mu ke kulumuka mpe ke kota na kati ya milongi nyonso yayi, samu ti bawu kele na Mpeve-Santu ve; mpe mu ke sala bawu (bawu kele kaka bana ya babakala yina me longoka na lukolo)—mpe mu ke kulumuka, mpe ke kota na kati ya mosi na mosi ya bawu, mpe ke vuna bawu, mpe ke sala bawu kupesa profesi ya luvunu.” Yandi tubaka yawu? Mpe yandi tubaka, “Ya kele mutindu beto ke vuna.” Na yawu yandi kulumukaka.

Yandi tubaka—Nzambi tubaka, “Nge ke na muswa ya Munu na kukwenda.”

⁹⁹ Mpe yandi kulumukaka mpe kotaka na kati ya bapofete yango, bayina longokaka kosalu na lukolo, mpe salaka bawu kupesa profesu ya luvunu. Ya vwandaka mpeve ya luvunu na kati ya kosalu samu na luzolo ya Nzambi. Ti mu . . . Kaka kima yankaka beno lendaka mona awa, minuti kaka. Beno tala mbote yayi. Mu zola beno kubaka na munu ya Ntete ya Corinthien kapu 5, nzila ya 1te, minuti kaka. Ya Ntete ya Corinthien . . . Mpe beno tala mbote yayi kana beno zola kumona kima, kisika Nzambi salaka kima—yinki mutindu ti bampeve yango ya yimbi, yinki mutindu ti bawu ke—bawu ke salaka . . . Mbote mingi, Paul ke na kuzonza:

Na bisika nyonso bantu ke na kutuba ti ya kele na busafu na kati ya beno, mpe mutindu ya busafu ti ya kele ve . . . kusadila na kati ya Bantu ya makanda, . . . (Yinki beno ke banza na yawu na kati ya dibuundu?) . . . ti mosi ke na kubasika na kento ya tata ya yandi.

Mpe beno ke na kusala lulendo, mpe beno me vwanda ve . . . (Beto mona. Mu banza ti mu me balula ba-page zole na . . .) . . . Beno ke—Mpe beno ke na kusala lulendo, mpe beno me vwanda ve na kyadi, ti . . . (Ntangu yayi, beno vingila fyoti awa. Mu kele . . . Yinga, ya kele kieleka. Inga.) . . . kyadi . . . (Ya kele yina.) . . . kusala lulendo, mpe beno me vwanda ve . . . kyadi, samu ti yandi yina me sala mavanga yayi ti beno kubasisa yandi na kati ya beno.

¹⁰⁰ Mu zaba ve. Mu ke kwikila ve ti muntu ke tuba na yayi to ke kipe ve, kasi mu ke na kunwanila kaka yina mu ke kwikilaka: Kana muntu kele mbala mosi ya kufuluka na Mpeve yandi lenda ve kuzimbisa Yawu. Beno me mona, beno me mona?

Samu na munu, mu kele ntama na beno na nzutu ya munu, kasi kintwadi na mpeve, mu me fundisa yimeni, mutindu ti mu vwandaka kuna, samu na yandi yina me sala dyambu yayi,

Na nkumbu ya Mfumu Yesu ya beto, ntangu beno ke vukana, mpe na mpeve ya munu, na ngolo ya Mfumu Yesu Klisto,

Samu na kuyekula muntu ya mutindu yina na Satana samu na kubeba ya nzutu, kasi mpeve kuvuuka na kilumbu ya Mfumu Yesu.

¹⁰¹ Nzambi, ke na kutuba na Dibundu ya santu, ya kele Nzutu ya Yandi awa na zulu ya ntoto, ti (ntangu yayi, yayi kele na manima ya Ngwisani ya Ntama, na ya Malu-Malu) tubaka na muntu yina vwandaka zinga yimbi mingi mpe na mvindu na kati ya bantu ti yandi vwandaka zinga na kento ya tata ya yandi mosi. Yandi tubaka, “Mutindu ya kima yina na kati ya Nzutu ya

Klisto. . . Beno, Dibuundu, beno yekula yandi na dyabulu samu na kubeba. . .” Beno me mona? Nzambi pesaka muswa. . . Mpe ntangu Yandi kele na kima yina Yandi zola kumona kusalama, ti zola kubula muntu, Yandi ke bika mpeve ya yimbi na zulu ya muntu yango samu ti yandi kukwamisa muntu yango mpe—mpe kuvutula yandi. Ntangu yayi, beto ke tala ti muntu yango na manima. . .

¹⁰² Ya kele yina kele dyambu bubu yayi na mabuundu. Ntangu muntu ke kwiza na kati ya Nzutu ya Klisto mpe ke kuma mosi ya binama mpe ke banda na kusala yimbi, na kisika beno nyonso kuvukana mpe kusala kima kaka mosi yayi. . . Mpe beno, Branham Tabernacle, beno sala yawu. Samu ti ntangu nyonso yina beno ke pesa yandi yintu ngolo, yandi ke vwanda na yisi ya Menga. Mpe yandi ke landila kaka na kusala kima ya ntama yina dyaka mpe dyaka mpe dyaka ntangu nyonso. Beno vukana mpe beno yekula yandi na dyabulu samu na kubeba ya nzutu, ti mpeve ya yandi kele—mutindu—lendaka vuuka na kilumbu ya Mfumu. Mpe beno tala mbote mfimbu ya Nzambi kukwiza. Beno tala mbote dyabulu kusimba yandi. Ya kele mpeve ya yimbi ke kuzwa yandi.

¹⁰³ Mpe mwana ya bakala yayi awa kusungamaka. Yandi kuvutukaka. Beto ke tala na ya Zole ya Corintheta kisika kieleka yandi kusungamaka na ntuala ya Nzambi.

¹⁰⁴ Beno tala Job, muntu ya kulunga, muntu ya kudedama. Mpe Nzambi pesa muswa na mpeve ya yimbi dyabulu na kwiza na zulu ya yandi, mpe kutalisa yandi mpasi, mpe nyonso yankaka yina samu na kusungama ya mpeve ya yandi. Beno me mona? Na yawu bampeve ya yimbi ke. . . Nzambi bambala mingi ke baka na kisalu bampeve ya yimbi samu kunungisa dikani ya Yandi mpe luzolo ya Yandi.

95. Ntangu yayi, awa kele na mosi yina ke tsokota mingi. Kyuvu (Mu banza ti ya kele muntu mosi, samu ti mutindu ya kusonika ke talana mutindu mosi): **Kana muntu fwana kuzwa Mpeve-Santu samu na—kuzwa Mpeve-Santu samu na kubalula ntima mpe samu na kukwenda na enlevement, yinki ke vwanda samu na bana yina kufwaka na ntuala ya bamvula ya luzabu? Mpe na wapi ntangu bawu ke vumbuka na lufwa?**

¹⁰⁵ Ntangu yayi, mpangi ya munu ya bakala, ya kento, mu lenda ve kutuba yawu na beno. Ya kele na ata Masonuku na zulu ya yawu na kati ya Biblia mutindu mu lenda mona kisika. Kasi mu lenda pesa mabanza ya munu. Ntangu yayi, yayi ke pesa ngolo na beno yina ke kwikilaka na lemvo ya Nzambi. Beno me mona, muntu yayi zola kuzaba (ya kele kyuvu mosi ya mbote mingi. Beno me mona?) muntu yayi zola kuzaba na wapi mvumbukulu ya lufwa—yinki ke salama na bébé, ti kana yandi fwana kuzwa Mpeve-Santu samu na kukwenda na

enlevement. . . Mutindu mu vwandaka me tuba, ya kele kieleka. Ya kele landila Biblia. Ya kele malongi ya Masonuku. Ve samu na ve na kukwenda na Mazulu. . . Samu ti Mpeve-Santu ke fulusa bantu ya kele mvumbukulu ya lufwa ya ntete, Misoolami. Mpe bayankaka ya bayina. . . Bayankaka ya kufwa ke zinga ve kana funda ya bamvula kulunga ve. Na manima ya Millennium, ke landa mvumbukulu ya bantu ya kufwa ya zole, lusambusu ya Kiti ya mfumu ya nene ya Mpembe. Beno me mona? Ya kele kieleka lutumu ya Biblia. Kasi muntu yayi zola kuzaba na yina me tala ba-bébé yayi. Bawu. . . Na zonzola yankaka, bawu kuzwaka Mpeve-Santu ntete bawu kubutama? Bawu kuzwaka Yawu? Ntangu yayi, yina mu lenda ve kutuba na beno.

¹⁰⁶ Kasi ntangu yayi, bika beto kutuba mutindu yayi: Beto zaba ti ba-bébé yina ke kufwaka, ata yina kele bibuti ya bawu, bawu kele ya kuvuluka. Ntangu yayi, mu kele na kuwisana ve na lukolo ya bapofete na zulu ya yawu. Bawu ke tubaka kana yandi vwandaka—kufwaka na bibuti yina vwandaka misumuki, ti bébé yina ke kwenda na difelo, ke bola; ya ke vwanda na kima dyaka ve na yandi. Mbote, Yesu. . . Jean tubaka ntangu Yesu kwizaka, “Beno tala Mwana dimeme ya Nzambi yina ke katula disumu ya yinza.” Mpe kana bébé yina vwandaka muntu ya moyo, yina zolaka luta na balufundusu ya Nzambi, mpe Yesu kufwaka samu na kukatula disumu, disumu nyonso kukatukaka na ntuala ya Nzambi ntangu Yesu kufwaka samu na lukanu yina. Ba lemvokilaka masumu ya beno. Ba lemvokilaka masumu ya munu. Mpe mutindu kaka ti beno lenda kwandi kuzwa lemvo ya kele na kundima pardo ya Yandi. Ntangu yayi, bébé lenda ve kundima pardo ya yandi, na yawu yandi me sala kima ve. Yandi me sala ata kima mosi ve. Na yawu yandi kele na kimpwanza nyonso na kukwenda na Mazulu.

¹⁰⁷ Kasi beno ke tuba, “Bawu ke kwenda na enlevement?” Ntangu yayi—ntangu yayi, yayi kele dyambu ya munu mosi; yayi kele dibanza ya munu ntangu yayi. Ve. . . Mu lenda lakisa yayi ve na Biblia. Kasi beno tala. Kana Nzambi, na mbandukulu ya yinza, zabaka muntu nyonso ya moyo yina zolaka vwanda na zulu ya ntoto. . . Beno ke kwikila yawu? Yandi zabaka konso nyama ya fyoti-fyoti, konso dikasa, konso nzinzi, Yandi zabaka nyonso yina zolaka vwanda na zulu ya ntoto. Kana Yandi zabaka yawu. . .

¹⁰⁸ Beno tala. Beto baka mutindu, Moïse. Ntangu Moïse kubutamaka, yandi vwandaka profete. Ntete Jérémie. . . Nzambi tubaka na Jérémie, “Ntete kwandi nge vangama na kati ya kivumu ya mama ya nge, ntete kaka nge vwanda ya kuvanga na kati ya kivumu ya yandi, Mu zabaka nge, mpe santisaka nge, mpe byadisaka nge profete ya bayinsi.” Jean Baptiste, bamvula bankama sambwadi na kumi zole ntete yandi kubutama, Ésaïe monaka yandi na vision, yandi tubaka, “Yandi kele ndinga ya yina ke boka na ntoto ya kuyuma.”

¹⁰⁹ Lusolo ya ntete to luzabu ya Nzambi zabaka nyonso yina me tala mwa ba-bébé (beno me mona?), yina bawu zolaka sala. Mpe Yandi zabaka ti bawu zolaka kufwa. Yandi zabaka. Kima ve lenda kusalama kukondwa Nzambi kuzaba yawu. Kima ve lenda kusalama na . . . Kaka mutindu Mvungi ya Mbote, mutindu Yandi ke kwenda na . . . Ntangu yayi, ti kubaka yayi na Masonuku, mu ke lenda ve kutuba ti Masonuku ke tuba *yayi-mpe-yayi*. Mu ke na kubaka kaka yawu landila dibanza ya munu.

96. Ntangu yayi, kyuvu yina ke landa kele mosi mu banza ti mu banza muntu yina vwandaka yina mu tubaka nkokila yankaka yina. **Beno tendula kento ke vuluka na kubutaka mwana.**

¹¹⁰ Kento ke vuluka ve na kubutaka mwana. Kasi beto baka ntangu yayi ya Ntete ya Timothée 2:8 kaka minuti. Mpe beto tala kaka yinki Biblia ke tuba na yina me tala mwana. Ntangu yayi, mu zaba ti ya kele malongi ya Katolika, ti Katolika ke tubaka kento ke vuluka samu na kubuta, na kubutaka mwana. Kasi beto sala ve . . . Mu ke kwikila yawu ve. Timothée ya Ntete kapu ya 2, mpe ti beto kubanda na nzila ya 8, mpe kutanga kaka fyoti ntangu yayi. Mbote mingi, beno kuwa.

Mu zola mpe, ti bakento ya beno kusambila mvwatulu ya kulunga . . . (Ba zolaka yufula dyaka yawu ve, ve? Beno kuwa yayi.) . . . ya buzitu . . . (Fiou!) . . . mpe ya kufwanana; kukangisa bansuki ya yandi na mutindu ya kulunga, ya kulwata ve misanga ya wolo, to palata, to binkuti ya kulutula ntalu; (Bankundi, mu ke na kusadisa beno awa, mu banza. Kusoba bayimpu yayi ya mona konso kilumbu to bilumbu tatu. Beno me mona? Ya kele ya kulunga ve samu na Baklisto.)

Kasi (bawu fwana kulakisa kitoko ya bawu) na bisalu ya mbote mutindu ya me lunga na bakento yina ke zitisaka Nzambi.

Ti bakento ya beno kuwa malongi na buswi na buzitu nyonso.

Mu ke na kupesa ve kento muswa ya kulonga, to ya kuyala . . . bakala, kasi yandi fwana kuvwanda . . . swi.

Samu ti Adam vwandaka ya ntete yina ba salaka, mpe Eve na manima.

. . . Adam kuvunamaka ve, kasi kento kuvunamaka na kumangaka na kutumama.

Kasi kento ke vuluka na kubuta bana kana . . . (Ntangu yayi, yandi ke na kuzonzila kento ya yinza ve, yina ke kuzwa bana.) . . . kana yandi kulandila na lukwikilu . . . (Beno me mona? Kana yandi kulandila. Yandi kele yimeni . . . Ya kele kento yina yandi ke na kuzonzila,

kento yina kele dezia ya kuvuluka. Beno me mona?) . . .
na luzolo mpe busantu na nkadulu nyonso ya kulunga.

¹¹¹ Ve samu na kuzwaka mwana ke sala yandi kuvuluka, kasi samu ti yandi ke na kusansaka bana, yandi ke na kusala kisalu ya yandi, na kusansaka ve banyawu, bayimbwa, mpe nyonso yina ke baka kisika ya mwana, mutindu bawu ke salaka bubu yayi, na kusansaka yawu luzolo ya bumama samu ti yandi lenda basika mpe kukwenda bisika mpimpa nyonso. Bantu yankaka ke salaka yawu. Lemvo, kasi bawu ke salaka yawu. Ya kele samuna mosi ya ngolo ya mbala mosi samu na munu na kutuba, kasi kieleka kele kieleka. Beno me mona? Bawu zola ve mwana samu na kuwombisa ve kimpwanza. Kasi na kubutaka bana, kana yandi landila na lukwikilu, busantu, mpe na nkadulu nyonso ya kulunga, yandi ke vuuka. Kasi *kana* kele, ti beno ke vuuka mpe, *kana* beno butama mbala zole. Beno ke vwanda beno lenda kuzwa kubeluka ya nzutu *kana* beno kwikila. Beno lenda kuzwa Mpeve-Santu *kana* beno kwikila Yawu, beno kukubama samu na Yawu, *kana* beno kele ya kukubama samu na Yawu. Mpe yandi ke vuuka kana yandi tatamana na kusalaka bima yayi (beno me mona?), kasi ve samu ti yandi kele kento. Na yawu ya kele ya kulunga, mpangi ya bakala, mpangi ya kento. Ya kele malongi ya Katolika ata fyoti ve. Ntangu yayi mu zola . . . Awa kele mosi dyaka yina kele mosi yina ke tsokota mingi. Na manima beto ke kuzwa mosi dyaka. Mu banza keba ve beto ke kuzwa ntangu samu na yawu. Mu wandaka me baka kaka ntangu ya beto. Ntangu yayi, yayi kele kaka—yayi kele kaka bisalu ya manima ya reveil. Yayi kele bisalu ya manima ya lukutakanu, bakyuvu yayi.

97. Ntangu yayi: Mpangi Branham (ba me sonika yawu na masini), ya ke na Masonuku samu na muntu na kuzonza na bandinga ya malu-malu mpe kutendula nsangu ya yandi mosi? Kana ya kele mutindu yina, pardo tendula yawu. Ba-Corinthiens ya Ntete to ba-Corinthiens 14:19 mpe dyaka ba-Corinthiens 14:27.

¹¹² Mbote mingi, beto kwenda na Masonuku yango mpe beto mona yinki ya ke tuba. Mpe kuna beto ke mona kana beto ke salaka yayi landila Masonuku. Beto zola konso ntangu kuvwanda landila Masonuku. Mpe ba-Corinthiens 14. Ntangu yayi, muntu yayi zola kuzaba kana ya kele Masonuku samu na muntu na kutendula yandi mosi nsangu yina yandi me zonga na bandinga ya malu-malu. “Kana ya kele mutindu yina, beno bangula ba-Corinthiens 14:19.” Beto mona, 14 mpe 19. Mbote mingi, beto bawu yayi.

Kasi na mabuundu ya . . . lutila mbote na munu na kuzonza kaka bampova tanu na mayela ya munu, samu na kulongisa bampangi, kasi ve kumi ya mafunda . . . na . . . bandinga ya kuzabana ve.

Ntangu yayi, yina ke landila kele na nzila ya 27, ba zola kuzaba.

Kana muntu ke zonza ndinga ya kuzabana ve, ya me fwana ti bantu zole, to . . . kulutila tatu kusala yawu, mosi na mosi kana mpangi me manisa; mpe ti mosi kutendula.

¹¹³ Ntangu yayi, mu ke na kutala yina muntu yayi zola kutuba (yina mu zola—mu ke tanga kima samu na beno mwa ntangu fyoti). Kasi mu banza kutala yina mpangi ya bakala to ya kento zola kutuba, “Ya kele ya kulunga samu na muntu yina ke na kuzonzaka na bandinga ya malu-malu na kutendula dyaka nsangu yina yandi ke na kutuba?” Ntangu yayi, mpangi ya luzolo mingi, kana beno ke tanga kaka nzila ya 13 ya kapu yina mosi, ya ke tubila beno:

Samu na yina ti muntu yina ke zonzaka bandinga ya kuzabana ve fwana kusambila samu ti yandi kutendula.

¹¹⁴ Kieleka. Yandi lenda kutendula yandi mosi nsangu. Ntangu yayi, kana beto kaka . . . Beto bika kaka . . . Mbote, beno . . . Beno tanga nyonso ya yawu awa, mpe beno ke mona ti Ya kele . . . Beno tanga kaka kapu ya muvimba. Ya kele mbote mingi, ba me tendula yawu.

¹¹⁵ Ntangu yayi, na kuzonzaka na bandinga ya malu-malu . . . Ntangu yayi, na yina beto kele na zulu ya yawu, mpe ti yayi ke na kubakamaka na bande, mu zola kutuba ti mu ke kwikilaka na kuzonza na bandinga ya malu-malu mutindu kaka mu ke kwikilaka na lunyakusu ya Kinzambi, mpe mbotika ya Mpeve-Santu, nkwizulu ya zole ya Klisto, mpe ngolo ya yinza yina ke na kwiza; mu ke kwikila kaka na yawu mutindu mu ke kwikila, kasi mu ke kwikila ti kuzonza na bandinga ya malu-malu ke na kisika ya yawu kaka mutindu nkwizulu ya Klisto ke na kisika ya yawu; lunyakusu ya Kinzambi ke na kisika ya yawu; konso kima ke na kisika ya yawu.

¹¹⁶ Ntangu yayi, samu na beno awa, mu ke na siansi ya kutuba yayi ntangu yayi, mpe mu zola kutendula yawu. Mpe kana mu sala muntu mpasi, ya kele dibanza ya munu ve samu na yawu. Mu zola kusala muvusu ve. Beno kuwa. Yinki vwandaka dyambu na kuzonzaka na bandinga ya kuzabana ve samu na bantu ya Pantekote (yina munu mosi kele; mu kele muntu ya Pantekote. Beno me mona?). . . Ntangu yayi, yinki vwandaka dyambu ya kele yayi: ti bawu ke zitisa ve yawu. Mpe kima yankaka, bawu ke bika kaka yawu kusalama mutindu yina. Bawu ke vutuka ve na Ndinga.

¹¹⁷ Ntangu yayi beno kuwa. Yawu yayi mutindu—ti—yawu yayi mutindu dibuundu ba ke sungika dibuundu. Ntangu yayi, na dibuundu ya Pantekote, kana mu vwandaka pasteur ya dibuundu yayi, mu ke tuba na beno mutindu mu zolaka sungika yawu (beno me mona?), kana mu vwandaka—zolaka vwanda

awa ntangu nyonso na kuvwanda pasteur ya yawu. Mu zolaka baka konso dikabu na Biblia. Kutuba na mikwikidi na ntete kuvwanda ya kubotama na Mpeve-Santu. Mpe na manima, konso dikabu ya Ntete ya ba-Corinthiens 12 zolaka vwanda na kati ya kisalu na kati ya dibuundu, kana mu zolaka kuzwa bawu nyonso na kati kuna, nzutu ya muvimba na kati ya kisalu.

118 Ntangu yayi, kana beno tala . . . Mu ke na kusala banoti ya munu ve ntangu yayi. Mpe beno bambuka moyo, mu zola kutuba ve mpova mosi ya kuswaswana—mu lendaka vwenza Mpeve-Santu. Mpe Nzambi zaba ti mu zola ve kutuba yawu na yimbi. Beno me mona? Kasi mu ke na kutuba kaka yayi samu na kumeka na kupesa na beno dibanza ya Masonuku na manima mu me longuka yawu awa pene-pene ya bamvula makumi zole. Ya me kuma pene-pene ya bamvula makumi tatu ti mu ke na kulonga. Mpe mu me lutila kaka na nzila ya bima nyonso, me basika kaka; beno lenda tala wapi mutindu ya vwandaka. Mpe kutala mbote konso muntu, mpe malongi ya yandi, yinza ya muvimba. Mpe vwandaka baka yawu samu ti ya kele ndandu ya munu. Ya kele samu na ndandu ya bantu kukondwa ya munu mosi kaka. Ya lungaka ti mu katuka awa. Beno fwana kukatuka awa. Mpe kana mu kwenda mutindu profete ya luvunu, mu ke zimbisa moyo ya munu mosi mpe kuzimbisa ya beno na munu. Na yawu ya kele ya kulutula na—ya kele ya kulutula na dimpa ya konso kilumbu; ya kele ya kulutula na kuzabana; ya kele ya kulutula na kima nyonso yankaka; ya kele luzingu samu na munu. Beno me mona? Mpe mu ke zola konso ntangu kuvwanda ya kusungama mingi.

119 Ntangu yayi, beno kwenda na dibuundu ya Pantekote, kima ya ntete. . . (Mu zola kutuba ve nyonso. Bayankaka kele. . .) Bantangu mingi beno ke kota na dibuundu mpe ke banda na kulonga; na yina beno ke na kulonga, muntu ke telama mpe ke zonza na ndinga ya malu-malu. Ntangu yayi, muntu ya luzolo yina lendaka vwanda kieleka ya kifuluka na Mpeve-Santu, mpe ya lendaka vwanda Mpeve-Santu yina ke na kuzonza na nzila ya muntu yango, kasi kima ya yawu kele, bawu me kuzwa malongi ve. Kana kisalu yayi na estrade kele na yisi ya dibanza ya mazulu na kuzonzaka, mpeve ya baprofete ke tumamaka na profete. Beno me mona? “Ti bima nyonso kusalama. . .” Ntangu yayi, beno tala awa na Paul samu na yinki yandi tubaka ti “ntangu mosi ke na kuzonza,” mpe nyonso yina. . . “ntangu yandi kumaka kuna, ya vwandaka na muvusu.”

120 Ntangu yayi, mu ke na kubokila bantu na autel, mpe muntu ke telama mpe ke zonza na ndinga ya malu-malu. Ya ke kaka. . . Mbote, mbote beno bika kaka na kubokila bantu na autel. Yina ke sukisa yawu. Beno me mona?

121 Mpe dyaka, kima yankaka. Bambala mingi bantu ke telama mpe ke zonza na bandinga ya malu-malu, mpe bantu ke vwanda na kudya chewing gum, ke tala bisika nyonso. Kana Nzambi ke na kuzonza, beno vwanda swi, beno kuwa! Kana ya kele Kieleka,

kana ya kele Mpeve-Santu yina ke na kuzonza na kati ya muntu yango, beno vwanda swi mpe beno kuwa, beno vwanda na luzitu. Ntendulu lendaka landa. Beno me mona? Beno vwanda swi; beno kuwa ntendulu. Ntangu yayi, kana ya kele na ata mutendudi ve na kati ya dibuundu, kuna bawu fwana kuvwanda swi na kati ya Nzutu.

¹²² Mpe kuna, ntangu bawu ke zonza na ndinga ya kuzabana ve, Biblia ke tuba, beno bika ti bawu kuzonza na bawu mosi na bawu mpe Nzambi. Yandi yina ke zonza na bandinga ya kuzabana ve ke pesa malongi na yandi mosi. Ntangu yayi, yina kele bandinga ya kuzabana ve; bandinga ya babwala, bandinga kele mutindu yankaka. “Bawu kele kima ve.” yandi tubaka. . . Kasi yina ke pesaka makelele zola kutuba kima. Kasi beno. . . Kana kulumenta sala makelele, beno fwana zaba yinki makelele yina zola kutuba (. . . beno fula kaka yawu) to beno ke zaba ve mutindu ya kuyilama beno mosi samu na mvita. Kana muntu ke na kuzonza na bandinga ya malu-malu, mpe kaka “tuut”; kaka yina, nani ke zaba yinki ya kusala. Kasi kana ya banda reveil, yina zola kutuba “telama!” Kana yawu bula *kufwa minda*, yina zola kutuba “beno lala.” Beno me mona? Kana yawu bula *tula* yina zola kutuba “beno kwenda nwana.” Ya fwana tuba yinki ya kele, mpe ve kuzonza kaka samu na kuzonza. Na yawu na kati ya dibuundu, kana ya kele na ata mutendudi ve, kasi ti ya kele na mutendudi, kuna bandinga ya malu-malu kele yina kele samu na dibuundu.

¹²³ Ntangu yayi, samu na kyuvu ya beno, mpangi ya munu ya luzolo, ya ke tuba, “Ya me lutila mbote na munu na kuzonza mafunda tanu. . . bampova tanu, mpe kuna bantu ke bakula yina mu ke na kutuba kulutila mafunda tanu (to nyonso yankaka yina yawu ke tuba) na ndinga ya kuzabana ve.” Ya kele kieleka. Kasi beno landa na kutanga: “. . . kana ti ya vwanda na luzayikisu to na ntendulu samu na kupesa malongi.” Beno me mona? Samu na kupesa malongi.

¹²⁴ Ntangu yayi, mu ke pesa beno mutindu kaka ya mwa dibanza yinki kana—yinki. . . Kana mu wandaka pasteur ya dibuundu yayi yina beto ke kuzwa, kana Nzambi kubokila munu na kuvwanda pasteur ya yawu, beno tala mutindu mu ke twadisa yawu: Mu ke meka na kutala konso muntu yina na kati kuna yina ke na dikabu. Mpe mu ke kuzwa bantu yango kukutana na kutala ngunga mosi ntete balukutakanu kubanda ntete, na kati ya kivinga mosi bawu mosi. Ti bawu vwanda na yisi ya Mpeve. Mpe kima ya ntete beno zaba, mosi ke kwiza, yandi kele na dikabu ya kuzonza bandinga ya malu-malu. Mpe yandi ke zonza na bandinga ya malu-malu. Bantu nyonso ke vwanda swi. Mpe na manima mosi ke telama mpe ke tendula yina yandi me tuba. Ntangu yayi, ntete ti ba pesa yawu na dibuundu, Biblia ke tuba ti bambangi zole to tatu fwana kusambisa yawu. Ntangu yayi, yina kele muntu yina kele na mpeve ya kuzaba mabanza

ya ntima (beno me mona?), samu ti bambala mingi bangolo ya dyabulu ke kotaka kuna. (Benno me mona?) Paul kuzonzaka na yawu. Kasi dyaka, ngolo ya Nzambi kele mpe na kati kuna. Benno tuba na munu dibuundu kisika dyabulu kele ve. Benno tuba na munu kisika bana ya Nzambi kele ya kuvukana ti Satana kele na kati-kati ya bawu ve. Ya kele na nyonso. Na yawu benno sala bameso ya nene ve. Benno me mona? Satana kele bisika nyonso. Ntangu yayi, beto bawu yayi. Muntu ke zonga na bandinga ya malu-malu. Ntangu yayi, ya kele na tatu ya kuvwanda kuna yina kele na Mpeve ya kuzaba mabanza ya ntima. Mpe mosi ke zonga na bandinga ya malu-malu mpe ke pesa nsangu. Ntangu yayi, ya lenda ve kuvwanda kuzonga ya Masonuku, samu ti Nzambi ke sadilaka ve bakuvutukila ya mpamba, mpe Yandi tubaka na beto na kusala yawu ve. Benno me mona? Na yawu ya kele yina ve. Ya kele nsangu samu na dibuundu.

¹²⁵ Beto me kuzwa bima zole na reveil yayi tii awa. Benno tala mbote yinki konso mosi ya yawu kuvwandaka—ya kulunga, na mutindu nyonso ya kulunga. Benno me mona? Ya kotaka na kisalu. Muntu mosi kutelamaka, mpe zonzaka na bandinga ya malu-malu, mpe pesa ntendulu, mpe me kwiza mbala mosi kaka, mpe me pesa kimbangi ya nsangu yango yina vwandaka me pesama. Yankaka yina kutelamaka nkokila yankaka yina, mpe tubaka na—yisi ya kimpeve ya profesi, mpe tubaka kima, na kuzabaka ve yina yandi vwandaka tuba; mpe na manima na nsuka yandi zonzaka, “Ya kusakumuna kele yina ke na kwiza na Nkumbu ya Mfumu.” Na nswalu kima mosi me simba munu kaka na nswalu mpe tubaka, “Na mutindu yankaka ya kusakumuna kele yandi yina ke kwikila ti yayi kele Mfumu me kwiza.”

¹²⁶ Benno me mona luten—kuna Mpeve-Santu me kubwa na kati ya yinzo mazono na nkokila. Benno me mona? Ya kele samu na kupesa malongi. Mu vwandaka ya kuvwanda kuna vwandaka meka na kutuba na bantu ti bawu fwana kuzwa Mpeve-Santu. Mpe dyabulu me kwiza pene-pene ya bantu, na kutubaka, “Benno kuwa ve; benno vwanza swi.”

Mpangi ya munu ya kento tubaka, “Bill, mu vwandaka na kyese mingi ntangu nge vwandaka longa; mu vwandaka tala na nzutu mutindu ti mu lendaka telama mpe kudumuka na kibaka.”

Mu tubaka, “Telama mpe dumuka.” Kaka yina.

Mpe yandi tubaka, “Kasi ntangu nge me kota na kusala yina,” mpe yandi tubaka, “bantu me banda na kuboka,” yandi tubaka, “kuna mu me kutala na nzutu mutindu ti mu vwandaka kima mosi ya ntama ya mpamba.”

¹²⁷ Mu tubaka, “Ya kele dyabulu. Ya kele Satana. Ntangu yandi me kwiza sala yawu,” mu tubaka, “nge zolaka telama ata mutindu nyonso.” Beto kele banganga-Nzambi ya Nzambi, na kupesaka munkayulu—munkayulu ya kimpeve, bambuma ya

bikoba ya beto na kupesaka nkembo na Nkumbu ya Yandi. Beno me mona?

¹²⁸ Ntangu yayi, ntangu yayi, beno tala yinki kusalamaka. Kuna Mpeve-Santu me kota, samu ti yina vwandaka kaka... “Ya kusakumuna kele yandi yina ke kwikila.” Bankokila zole, tatu me landana mu me meka na kulakisa yawu pwelele kuna; mpe kuna, Mpeve-Santu mpe ke tuba (na yisi ya kimpeve) ke tuba, “Ya kusakumuna kele yandi yina ke na kwiza na Nkumbu ya Mfumu.” Mpe ntete mu tuba konso kima, mu vutukilaka na kutuba dyaka yawu. “Ya kusakumuna kele yandi yina ke kwikila ti Mfumu me kwiza na yayi.” Beno me mona? Mpe mu vwandaka zonza kaka yayi, Mpeve-Santu kele Nzambi Yandi mosi na kati ya beno. Beno me mona? Mpe bawu simbaka yawu. Beno me mona? Mpe kuna mutindu Yawu me kubwa na kati-kati ya bantu. Beno me mona mutindu Yawu—Yawu ke pesaka malongi, profesi?

¹²⁹ Ntangu yayi, ya kele na luswaswanu na kati-kati ya profesi mpe profete. Profesi ke lutaka katuka muntu mosi na yankaka, kasi profete kele profete katuka mbutukulu. Bawu kele na MUTINDU ME TUBA MFUMU! Kufundisa bawu ve. Beno ke mona bawu ve kutelama na ntwala ya Ésaïe, to Jérémie, mosi na mosi ya baprofete yayi, samu ti bawu kele na MUTINDU ME TUBA MFUMU! Kasi mpeve ya profesi na kati-kati ya bantu; beno fwana tala yawu mbote, samu ti Satana ke luta na kati kuna. Beno me mona? Ntangu yayi. Kasi ba fwana kufundisa yawu.

¹³⁰ Ntangu yayi, beto ke—beto ke kuzwa balukutakanu ya reveil. Ntangu yayi, beno tala yayi kieleka mbote-mbote ntangu yayi, beno milongi. Beto ke na kukubikaka balukutakanu ya reveil. Mbote mingi. To mu banza beto ke na kuzwa kaka lukutakanu ya dibuundu ya konso ntangu. Dibuundu kele na tiya. Ya fwana vwanda ntangu nyonso. Mbote, ya lenda vwanda ti beto ke na bantu tanu to sambanu yina kele bantu ya makabu; mosi ke zonzaka na bandinga ya malu-malu, zole to tatu mu banza ke zonzaka na bandinga ya malu-malu, yiya to tanu na bandinga ya malu-malu, ke na dikabu ya bandinga ya malu-malu, ke zonzaka na bandinga ya kuzabana ve. Zole to tatu ya bawu lenda kutendula. Ya lenda vwanda ti ya kele na mosi—zole, to tatu ya bawu yina ke na makabu ya ndwenga. Mbote mingi. Bawu nyonso ke kutana, bantu ya makabu yango... Beno... Makabu yango me pesama na beno samu na kusakinina ve, samu na kutuba ve, “Nkembo na Nzambi, mu ke zonzaka na bandinga ya malu-malu! Alleluia!” Beno ke—beno kele—beno kele na kuvutukaka manima beno mosi. Bawu kele, ya kupesa na beno samu na kusadila. Mpe kitini ya beno na kati ya dibuundu fwana kusalama ntete lukutakanu ya nene kubanda, samu ti bantu ya kulongoka ve ke vwanda na kati-kati ya beno.

¹³¹ Kuna beno ke kota na kivinga mosi, mpe beno ke vwanda kuna, beno bantu kintwadi, samu ti beno kele bampangi ya kisalu na Nsangu ya mbote. Kuna beno ke vwanda kuna. “Mfumu, ya kele na kima Nge zola ti beto kuzaba na nkokila yayi? Zonza na beto, oh, Tata ya mazulu,” na kusalaka kisambu, bandombolo; kuyimba bankunga. Mbala mosi me kulumuka Mpeve, ke kubwa na zulu ya muntu, ke zonza na bandinga ya malu-malu. Mosi ke telama mpe ke tuba, “MUTINDU ME TUBA MFUMU.” Yinki ya kele? Beno kuwa. “Beno kwenda tuba na Mpangi Jones na kukatuka kisaka yandi ke na vwandaka, samu ti mbasi na manima ya midi ya ke vwanda na mipepe ya ngolo ya mbangu yina ke kombola kizunga yina; mpe ya ke baka yinzo ya yandi. Ti yandi baka bima ya yandi mpe kwenda!”

¹³² Ntangu yayi, yina—yina ke wakana mbote. Kasi beno vingila minuti. Ya fwana vwanda bantu tatu kuna yina kele na Mpeve ya kuzaba mabanza ya ntima. Mosi ya bawu ke tuba, “Ya vwandaka ya Mfumu.” Yankaka ke tuba, “Ya vwandaka ya Mfumu.” Ya kele zole na ntuala ya tatu—zole to tatu ya bambangi. Mbote mingi. Bawu ke sonika yawu na kitini ya mukanda. Ya kele yina Mpeve me tuba. Mbote mingi. Bawu ke vutuka na kusambila, na kutondaka Mfumu.

¹³³ Na manima ya mwa ntangu, “MUTINDU ME TUBA MFUMU (profete me telama) MUTINDU ME TUBA MFUMU, na nkokila yayi, ke katuka na New York ya ke vwanda kento; yandi ke vwanda na zulu ya civière; yandi ke kota na yinzo na zulu ya civière. Yandi kele na lele ya laka ya maza ya saka-saka na nziunga ya yintu ya yandi. Yandi ke na kufwa na cancer. Yina ke na kusala yandi kuvwanda mutindu yayi, Mfumu kele ya kusimba na ntuala ya yandi—kilumbu mosi yandi yibaka mbongo na Dibuuundu ya Yandi ntangu yandi vwandaka na bamvula kumi na sambanu. Beno tuba na Mpangi Branham na kutuba na yandi bima yayi. MUTINDU ME TUBA MFUMU, kana yandi sungika yawu, yandi ke beluka.” Beno vingila minuti. Yina ke wakana mutindu ya mbote, kasi beno vingila minuti. Beno ke tula nkumbu ya beno na zulu ya mukanda yayi, muntu yina ke kuzaba mabanza ya ntima? Beno ke tula nkumbu ya beno?

¹³⁴ “Ya vwandaka ya Mfumu.” Mosi ke tuba, “Ya vwandaka ya Mfumu.” Kuna—kuna beno ke sonika yawu, “MUTINDU ME TUBA MFUMU, na nkokila yayi ke kwiza kento mosi, kima *kingandi*.” Mosi na mpeve ya kuzaba mabanza ya ntima, zole to tatu ya bawu ke sonika bankumbu ya bawu na zulu ya yawu. Bansangu nyonso yayi kele ya kupesama. Mbote mingi.

¹³⁵ Kuna na manima ya mwa ntangu bawu ke kuwa ngunga kubula. Dibuuundu me banda. Kuna bawu ke nata bansangu yayi, ke tula yawu kaka awa na zulu ya mesa. Kaka awa kisika yawu fwana kuvwanda. Mu kele kisika ke na kutangaka, ke na kusambilaka. Na manima ya mwa ntangu mu ke basika

na manima ba me yimba bankunga. Dibuundu kele nyonso ya kusingama, bantu ke na kwiza, ke na kuvwanda, ke na kuyindula, ke na kusambila; ya kele yina beno fwana kusala. Ve kukwiza na yinzo-Nzambi mpe kusolula mosi na yankaka, beno kwiza na yinzo-Nzambi samu na kutuba na Nzambi. Beno kuzwa kubundana ya beno kuna na ngaanda. Beno me mona? Beto ke na kubundanaka na Nzambi ntangu yayi. Mpe beto ke kwiza awa kuzonza, nyonso na malembe, na luzitu, Mpeve ke na kusala. Pianiste ke kwiza na piano na kutala baminuti tanu ntete bankunga kubanda, ke banda kieleka na pima nionso:

Na kulunsi sika wapi Mvulusi ya munu
kufwaka,
Kuna me kwiza dila disumu, . . .

To nkunga mosi ya mbote, na malembe nyonso. Ya ke nataka Mvwandulu ya Mpeve-Santu na kati ya lukutakanu. Beno me mona? Mbote mingi.

¹³⁶ Bantu ke na kuvwanda kuna. Bayankaka ya bawu kele lieleka—ke banda na kudila mpe ke kwiza na chaire, ke fungula masumu ntete lukutakanu kubanda kwandi. Mpeve-Santu kele kuna. Beno me mona? Dibuundu kele na kati ya kisalu. Miklisto kele na kusambilaka; bawu me kuzwa bisika ya bawu. Bawu kele kuna ve na kudyaka ba-chewing gum, na kutubaka, “Hé, Liddie, pesa munu mwa rouge à lèvres ya nge; mu zola . . . Nge zaba. Nge zaba. Mu zola . . . Nge zaba, kilumbu yankaka yina ntangu mu vwandaka sumba bima kuna, mu tuba na nge, na kutala mu dyataka nge na makulu. Mu me monaka ntete mutindu . . . Yinki nge ke banza samu na yawu?” Oh, mawa! Mpe kubokila yawu yinzo ya Nzambi. Kasi, ya kele nsoni. Nzutu ya Klisto ke na kuvukana. Beno tala dyambu ya beto.

Bakala yina kele ya kuvwanda na lweka, “Ke tuba, nge zaba ntangu beto kwendaka kuna, yayi *ya yayi-mpe-yayi* mpe *yayi-mpe-yayi-mpe-yayi* . . .” Yina kele ya kulunga na ngaanda, kasi na kati awa ya kele yinzo ya Nzambi.

¹³⁷ Beno sambila na kukota; beno baka bisika ya beno. Mu ke na kuzonzaka ntangu yayi, na mabuundu ya beno ve, bankundi. Mu zaba ve yina beno ke salaka; mu ke na kuzonzaka na tabernacle yayi. Mu ke na kuzonzaka na bantu ya munu mosi. Beno me mona? Ya kele kieleka.

¹³⁸ Ntangu yayi, ntangu beno ke kota na kati mutindu yina, kuna beno zaba kima ya ntete, pasteur ke basika. Yandi kele ya mona. Yandi fwana kupesa mvutu ve na *yayi*, *yina*, mpe *yankaka* yina. Yandi me basika mbala mosi na kinoko ya kisalu ya yandi. Yandi me vwanda na yisi ya ngolo ya Mpeve-Santu. Yandi ke kota kaka kisika milaka mingi ya tiya me vukana kintwadi. Na kutala ya kele dikunzi ntangu yayi (beno me mona?), yandi ke na kutambula. Yandi ke belama awa, ke baka yayi. “Nsangu ya dibuundu: ‘MUTINDU ME TUBA MFUMU,

Mpangi Jones fwana kukatuka yinzo ya yandi. Mbasi na manima ya midi na ngunga ya zole mipepe ya ngolo ya mbangu ke kombola ntoto ya yandi. Yandi baka bika ya yandi mpe yandi kwenda.” Mpangi Jones ke kuzwa yawu. Mbote mingi. Ya kele ya kusonika. “MUTINDU ME TUBA MFUMU, ya ke vwanda na kento mosi ya nkumbu *Kingandi* ke kota awa na nkokila yayi, mpe ya vwandaka—yandi salaka *yayi-mpe-yayi*.” (Mutindu kaka mu vwandaka me tuba, beno me mona, mutindu yina.) Mbote mingi, yina kele ya kutula awa. Kaka yina. Bawu me kuzwa yimeni bisika ya bawu ntangu yayi na kati ya dibuundu. Mbote mingi.

¹³⁹ Na manima yandi ke baka nsangu. Mpe kima ya ntete beno zaba, yandi ke banda na kulonga. Kima ve ke kangimisa ndinga; ya me baka kisika yimeni. Ntangu yayi, beto ke kwenda na ntwala, beto ke longa nsangu.

¹⁴⁰ Mpe na manima ya mwa ntangu ntangu. . . Kima ya ntete beno zaba ntangu nsangu me manisa, ndonga ya kubeluka ya nzutu ke banda. Kuna ke kwiza kento mosi. Muntu zonzaka na bandinga ya malu-malu mpe tubaka ti yandi vwandaka kwiza. Beno me mona? Mosi na mosi ya beto zaba yinki ke salama. Mosi na mosi ya beto zaba yawu. Beno me mona mutindu lukwikilu ke bandaka na kutunga na milaka yayi ya tiya yina kele na zulu ya beno ntangu yayi. Yandi ke banda na kuvukisa kintwadi. Mbote, ya kele kaka kisalu ya kumanisa; kaka yina.

Kento yango. . . mu ke tuba, “Mama *Kingandi*, yina me katuka New York, ya kuvwanda awa. . .” Beno me mona?

“Oh, ya kele kieleka. Yinki mutindu beno me zaba yawu?”

“Ya kele nsangu ya Mfumu na dibuundu. Ntangu nge vwandaka na bamvula kumi na sambanu, ya vwandaka nge ve na kisika *kingandi* mpe yina salaka—bakaka mwa mbongo na dibuundu, mpe yibaka yawu, mpe basikaka, mpe sumbaka bilele ya malu-malu na yawu?”

“Oh, ya kele kieleka. Ya kele kieleka.”

“Kieleka ya kele yina Nzambi me tuba na beto na nkokila yayi na nzila ya Mpangi *Kingandi*, na kuzonzaka na bandinga ya malu-malu; Mpangi *Kingandi* kutendulaka; Mpangi *Kingandi* awa tubaka, na kuzabaka mabanza ya ntima, tubaka ti ya vwandaka ya Mfumu. Mpe ya kele kieleka.”

“Yinga!”

“Na yina, MUTINDU ME TUBA MFUMU, kwenda sungika yawu, mpe nge ke beluka na cancer ya nge.”

¹⁴¹ Mpangi Jones ke kwenda na yinzo, ke baka ba-remorque, lusalusu, ke baka bima ya yandi ya yinzo, mpe ke kwenda ntama na kuna. Na ngunga ya zole mbasi na manima ya midi: Oh, la la, mawa! nyonso me tsyamuka. Beno me mona? Kuna dibuundu ke kembila. . . “Matondo, Mfumu Yesu, samu na bumbote ya Nge.”

Ntangu yayi, ya kele yina yawu kele, samu na kupesa malongi, samu na dibuundu.

¹⁴² Ntangu yayi, yinki kana yawu me salama ve na manima bawu me tuba yawu? Kuna beno kele na mpeve ya yimbi na kati-kati ya beno. Beno zola ve kima ya yimbi yina. Samu na yinki beno ke zola kima ya yimbi na yina mazulu kele ya kufuluka na Pantekote ya kieleka? Beno baka ve kima ya ntama ya dyabulu. Beno baka kima ya kieleka. Nzambi kele na yawu samu na beno. Na yina beno kuzwa dyaka ve balukutakanu, mpe kutula kima na zulu awa, tii Nzambi ke pesa yimeni kimbangi ti beno kele ya kieleka, samu ti beno kele kisadisi samu na dibuundu na kati ya kisalu ya Nsangu ya mbote. Ntangu yayi, beno ke bakula yina yawu kele?

¹⁴³ Mpe bandinga ya malu-malu, bandinga ya kuzabana ve. . . Muntu ve yandi—zaba yinki yandi ke na kuzonzilaka. Yandi ke zonza; kasi konso makelele zola kutuba kima. Ya fwana zola kutuba kima [Mpangi Branham me bula maboko ya yandi—Mu.] “Glog, glog, glog!” Ya fwana—ya kele—ya kele ndinga kisika.

¹⁴⁴ Ntangu mu vwandaka na Afrika, ata mbala mosi ve ti mu kwikilaka yawu, kasi konso kima yina ke salaka makelele kele na mutindu mosi ya zola kutuba. Biblia ke tuba ya kele na ata makelele ve kukondwa nsasa, kukondwa kuzola kutuba kima. Konso makelele yina me salama kele zola kutuba kima. Mbote, mu vwanda me kuwa bantu kutuba. . . mu ke tuba, “Yesu Klisto, Mwana ya Nzambi.”

¹⁴⁵ Mosi ya bawu ke baka [Mpangi Branham ke na kusala makele ya mutendudi ya Afrika—Mu.]. Yankaka ke baka [Mpangi Branham me sala dyaka.]. Mpe yina vwandaka, “Yesu Klisto, Mwana ya Nzambi.” Beno me mona? Ya vwandaka. . . Mpe na munu ya zolaka kutuba kima ve, kasi na bawu ya vwandaka ndinga kaka mutindu mosi mu ke na kuzonza na beno. Ntangu mutendudi ya Zulu, ya Xhosa, ya Sotho, mpe nyonso yankaka, vwandaka kuma kuna, nyonso yina ba vwandaka tuba, muntu nyonso vwandaka bakula. Mpe bima yayi yina beno ke kuwa bantu yayi kuzonza kaka mbote ve, mpe kubanza ti ya kele makelele mingi, ya kele yawu ve; ya zola kutuba kima. Na yawu beto fwana kuzitisa yawu, kutula yawu na kisika ya yawu.

¹⁴⁶ Ntangu yayi, ya lenda vwanda ti ya me vwanda na ata nsangu ve. Ntangu yayi, lukutakanu me manisa; lubokilu na autel me salama. Mpe na manima ya mwa ntangu muntu (ya vwandaka ve na nsangu na manima kuna) muntu me telama ntangu nyonso yina bawu ke kuzwa siansi. Mpeve—Santu. . . Ntangu yayi, Biblia ke tuba, “Kana ya kele na ata mutendudi ve, beno vwanda swi.” Ata wapi mutindu yimbi ya ke na kumeka na kuzonza, beno vwanda swi.

¹⁴⁷ Beno tuba, “Mu lenda ve kusala yawu.” Biblia ke tuba beno lenda. Beno me mona? Na yawu yina—yina ke sukisa yawu. Beno me mona? Beno vwanda swi.

¹⁴⁸ Kuna, ntangu, siansi ke kwiza kisika nyonso kele ya kusungama, kuna kana Mpeve-Santu kubwa na zulu ya yandi samu na kupesa nsangu, kuna yandi pesa yawu. Kieleka ya kele yina beno fwana kusala. Na manima ntendulu ke kwiza, ke tuba, “Ya kele na kento na kati awa na nkumbu ya Sally Jones (Mu banza ti kento yango kele na kati awa ve na nkumbu yina, kasi . . .) Sally Jones. (Beno me mona?) Beno tuba na yandi ti yayi kele nkokila ya nsuka ya kubokila yandi. Sungika yawu na Nzambi samu ti yandi kele na ntangu fyoti yandi ke vwanda awa.” Kuna, Sally Jones ke kima na autel na mbangu kaka mutindu yandi lenda kukuma kuna (beno me mona?), samu ti yina kele lubokilu ya yandi ya nsuka. Beno me mona? Yina kele kupesa nsangu, to kusiamisa, to kima.

¹⁴⁹ Yina kele dibuundu ya Pantekote na kati ya kusalu. Ya kele ve na balenda samu bampeve ya yimbi kukota, samu ti ya kele yimeni. . .Biblia ke pesa kaka, “Ti ya vwanda mosi na mosi, mpe yina na tatu; mpe ti zole to mingi kusambisa.” Yina kele dibuundu. Kasi wapi kisika beto me kuzwa yawu bubu yayi? Beto ke dumuka, ke sala mutindu nyonso, ke seka mpe ke landila na yina muntu ke na kuzonza na bandinga ya malu-malu; muntu yankaka ke tala, ke vwanda na kuzonza kima yankaka mpe bantu ke vukana; pasteur ke vwanda na kusala kima; to bantu ke vukana. Mbote, yina kele mbote ve. Ya lenda vwanda ti pasteur ke na kulongaka, mpe muntu ke telama mpe ke tendula yandi na . . . Ya lenda vwanda ke na kutangaka Biblia mpe muntu. . .Na kutangaka Biblia, mpe muntu na manima kuna ke na kuzonzaka na bandinga ya malu-malu. Oh, ve! Beno me mona? Mulongi ke na kulongaka na chaire, muntu ke telama mpe ke tendula yandi, na kuzonzaka na bandinga ya malu-malu. Ya kele nyonso ya kulunga. Mu ke tuba ve ti ya kele ve Mpeve-Santu, kasi beno fwana kuzaba mutindu ya kusadila Mpeve-Santu (beno me mona?), samu na kusadila Yawu.

Ntangu yayi, mu—mu ke baka . . .Beno lenda ndima mosi dyaka? Na yina, mbasi kele Lumingu. Na yina, beto ke . . .Beto baka kaka . . .Mosi yawu yayi. Mu banza ti ya kele ya kulutula lemvo. Mpe ntangu yayi, kana beno nyonso kukanga kaka ntima samu na munu samu na baminuti fyoti dyaka, lemvo ya beno. Mpe dyaka, mu ke . . .Mu zola beno—mu zola beno kuzwa yayi. Mu bumbaka yayi na lukanu. Yayi kele yina ya nsuka.

Ntangu yayi, ntete, mu ke tanga bima zole yina muntu yayi me yufula. Ya kele na zulu ya mwa mukanda ya ntama, ya kusonika na mutindu ya kitoko. Mu ke na dibanza ve nani ya kele, nkumbu kele ya kusonika ve na—na ata mosi ya yawu.

98. Mpangi Branham, ya kele mbote samu na milongi na kulomba mbongo na yinda na balukutakanu ya bawu, na kutubaka ti Nzambi me tuba na bawu ti bantu mingi na kati ya dibuundu zolaka kupesa mingi? Kana yayi kele ya kulunga, mu zola kuzaba. To kana ya kele yimbi, mu zola kuzaba. Yayi me yangisa munu mingi.

¹⁵⁰ Ntangu yayi, beno me mona, nkundi, mu ke tuba na beno, mu ke tuba na beno yina mu banza. Beno me mona? Ntangu yayi, ya zola kutuba ve ya kulunga. Mu banza ti ya kele mpasi mingi.

¹⁵¹ Ntangu yayi, mu banza yayi. Nzambi me fidisa munu na bilanga. Mu me mona bantangu kisika mu vwanda talana mutindu mu zolaka vwanda ve na ndambu. . . Mpe mu—mu vwandaka ve na mbongo ata fyoti ve. Mpe mu vwandaka tuba, “Beno lutisa kaka kitunga ya makabu.”

Mpe ntwadisi ke kwiza na munu mpe ke tuba, “Tala, Billy, beto kele na mafunda tanu ya ba-dollar na mbwaki na nkokila yayi, Bakala. Nge ke na mbongo na Jeffersonville samu na kufuta yawu?”

¹⁵² Mu ke tuba, “Nyonso kele mbote. Nzambi fidisaka munu awa, kana ve mu zolaka kwiza ve. (Beno me mona?) Beno lutisa kaka kitunga ya makabu.”

Mpe ntete lukutakanu kumanisa, muntu ke tuba, “Beno zaba, Mfumu me tula na ntima ya munu na kupesa mafunda tanu ya ba-dollar samu na yayi.” Beno me mona, beno me mona? Ya ntete, beno vwanda ya kutwadisa na kusala yawu.

¹⁵³ Mu ke kwikilaka ve na kubaka, mpe na kusosa, mpe kulomba mbongo. Mu banza ti ya kele kima ya yimbi. Ntangu yayi, mpangi, kana beno sala yawu, ti mu nyongisa beno ve. Beno me mona? Ya lenda vwanda ti beno—beno me kuzwa muswa ya Nzambi na kusala yawu. Kasi mu ke na kuzonzila kaka samu na munu mosi. Mu ke kwikilaka ve na yawu.

¹⁵⁴ Ntangu yayi, mu zaba milongi yina ke kwenda mpe ke tuba. . . Mu vwandaka kuna, ntama mingi ve. . . Ntangu yayi, yayi kele ve bantu ya Pantekote, yayi kele. . . Mbote, ya kele mabuundu (beno me mona?), mabuundu yankaka. Ya vwandaka na lukutakanu ya nene ya kan. Gertie, nge vwandaka na munu, mingi ya beno yina kele awa. Mpe bawu kubakaka manima ya midi ya muvimba na dénomination ya kuzabana—zole to tatu ya bawu kintwadi (ya kele mabuundu ya konso ntangu ya konso ntangu, mutindu mabuundu ya beto ya bilumbu yayi awa na mbanza, mpe nyonso yina) na lukutakanu ya nene—mpe bawu kubakaka manima ya midi ya muvimba, ya kutelama na estrade—mpe kupesa boma ti ti Nzambi ke bebisa bakuyonzika ya bawu, ke pesa bana ya bawu kimbevo ya buka-buka, mpe bima mutindu yina, kana bawu kupesa ve na lukutakanu yango. Ya kele kaka kieleka, na Biblia yayi na ntwala ya munu. Mu tubaka, “Ya kele kuvweza samu na Nzambi mpe samu na

bilandi ya Yandi.” Kana Nzambi kufidisaka beno, Yandi ke keba na beno. Kana Yandi fidisaka beno ve, na yina beno bika dénomination kukeba na beno kuna. Kasi—kasi beno. . . Kana Nzambi fidisaka beno, Yandi ke keba na beno.

99. Yinki nge ke tuba na kusala nsaka ya Nowele na kati ya yinzo-Nzambi ya Mpeve-Santu?

¹⁵⁵ Mbote, kana ya kele samu na Klisto, ya lenda vwanda mbote mingi. Kasi kana ya kele samu na tata ya Nowele, mu ke kwikilaka ve na yandi. Mu—mu me kula—mu me kula mingi samu na yawu. Mu ke kwikilaka ve na tata ya Nowele ata fyoti ve. Beno me mona? Mpe ndambu ya mwa bima yayi ya Nowele yina kele na bawu, mu banza ti ya kele buzoba. Mpe. . . Kasi mu banza ti bawu me tula na ngaanda Klisto muvimba na Nowele mpe me tula tata ya Nowele na kati ya yawu.

¹⁵⁶ Mpe tata ya Nowele kele disolo ba me yidika. (Mu ke na kunyongisa beno ve, mu banza, samu na bana.) Kasi mu ke tuba na beno. Awa ntama mingi ve, na kutala bamvula makumi zole na tanu, bamvula makumi tatu, ntangu mulongi mosi awa na mbanza yayi, pasteur ya-ya dibuundu mosi ya nene awa na mbanza, yina mu zabaka mbote-mbote, mosi ya bankundi ya munu ya luzolo, yandi kwizaka na munu. Mpe Charlie Bohannon (Mpangi Mike, nge ke bambuka moyo na Charlie Bohannon, nkundi mosi ya munu ya mbote). . . Yandi vwandaka kuna na kati ya bilo ya yandi mpe tubaka, “Ata mbala mosi dyaka ti mu ke tuba na bana ya munu to ti ba tuba na mitekolo ya munu luvunu yayi.” Yandi tubaka, “Mwa mwana ya munu mosi ya bakala kwizaka na munu na manima ti yandi me kuzwa na kutala bamvula kumi na zole, mpe vwandaka tuba na yina me tala tata ya Nowele. . .” Mpe yandi, tubaka, “Mbote. . . Cheri, mu ke na kima ya kutuba na nge,” Tubaka, “Mama. . .” Beno zaba, mpe kwendaka na ntuala na kutubaka na yandi yinki yandi kusalaka.

Kuna na manima yandi me vutuka, yandi tubaka, “Na yina, Papa, Yesu yayi kele kima mutindu mosi?”

¹⁵⁷ Beno tuba kieleka. Tata ya Nowele kele kuyidika ya Katolika na zulu ya muntu, Kriss Kringle to Santu Nicolas, muntu mosi ya santu ya ntama ya Allemagne ya Katolika ya bamvula mingi me luta yina vwandaka kwenda bisika vwandaka sala mbote na bana. Mpe bawu me landila yawu mutindu kinkulu. Kasi Yesu Klisto kele Mwana ya Nzambi. Yandi kele kieleka, mpe Yandi kele moyo.

Ntangu yayi, kyuvu yawu yayi, kyuvu ya nsuka, ya kele kieleka. . .

¹⁵⁸ Ntangu yayi beno tala. Beno lenda wisana ve na munu na yawu. Kasi kana beno kuwisana ve na munu, beno bambuka moyo, ti ya vwandaka na bunkundi, mbote? Mu zola beno, mpe mu zola ve—zola ve kunyongisa beno. Mu kele kaka, mu zola

kuvwanda ya kusungama. Kana mu lenda ve . . . kana mu tuba luvunu na mwana ya munu ya bakala, kuna mu kele muntu ya luvunu. Beno me mona? Mu zola kutuba na yandi kieleka.

¹⁵⁹ Ntangu yayi, mu ke tuba na yandi na tata ya Nowele, mu ke tuba, “Yinga, kieleka, ya kele na tata ya Nowele. Tala mbote Papa na nkokila ya Nowele.” Beno me mona? Yinga.

¹⁶⁰ Beno zaba, kilumbu yankaka yina mu vwandaka na yisi kuna, mpe mu mekaka yawu na mwa mwana mosi ya kento kaka samu na kumona. Kieleka ba vutulaka munu mbongo mazuzi. Mu vwandaka na yinzo ya nene. Mpe bawu vwandaka kuna, na yisi awa na Quaker Maid. Mpe mu kwendaka kuna samu na kusumba bima ya madya. Mpe na yawu beto, kento ya munu na munu, vwandaka na kati kuna. Mpe kuna vwandaka na mwa mwana ya fyoti ya kento, yina vwandaka ve na kutala bangonda kumi na nana, mpe yandi vwandaka kuna, vwandaka, yimba, “Père Nowele, Père Nowele. . .” Mpe mu tubaka . . . Na kati ya mwa kiti ya yandi, beno zaba, ya kuvwanda na manima ya mwa pusu.

Mu tubaka, “Nge ke na kusosaka tata ya Nowele?”

Yandi tubaka, “Ya kele papa ya munu, Tata.”

Mu tubaka, “Ya kusakumuna kele mwa ntima ya nge, Cherie. Nge ke na ndwenga.”

Ntangu yayi, awa kele yina kele mpasi mingi, bankundi. Mpe na kati ya yayi. . . Na manima mu ke sukisa. Oh, ya kele—ya kele Masonuku ya mbote mingi, kasi ya kele yina ke tsokota samu na muntu nyonso. Mpe ya salaka dibanza ya munu swi ve bamvula mpe bamvula; mpe kaka na lemvo ya Nzambi. . . Mpe kento ya munu ya ntalu, yina kele ya kuvwanda kaka kuna na manima ntangu yayi, natngu yandi kuwaka ti mu vwandaka na kyuvu yango na manima ya midi yayi, yandi tubaka, “Bill, yinki mutindu nge ke pesa mvutu na yawu?” Yandi tubaka, “Mu ke kumiyufulaka ntangu nyonso na yawu.” Yandi tubaka, “Ata mbala mosi ve ti mu me bakula yawu.” Mpe yandi tubaka . . .

Mu tubaka, “Kwiza na nkokila yayi, Cherie. Mu ke sala nyonso ya munu na lusalusu ya Nzambi.”

100. Mpangi Branham, lemvo ya nge tendula Hébreux 6:4 tii na 6.

¹⁶¹ Samu na dyambu yayi ya kieleka . . . Beno me mona, ntangu yayi beno fwana kutala mbote awa na ya beno lukwikilu, lemvo, lukengolo ya bakwikidi, kulemba ve ya bansantu, kulemba ve, na kisika, ya basantu. Hébreux kapu 6, 4 tii na 6.

Ntangu yayi, ntangu kaka yawu . . . manisa yayi, kuna mu banza ti Nzambi ke sadisa munu na kukumisa yawu samu na beno pwelele. Lemvo ya beno, mu—mu kuzwaka Nsangu ya munu ya nkokila yayi; mu banza ti mu ke longa kima mutindu mosi na—na lukutakanu ya suka. Na manima mu ke kwenda.

¹⁶² Ntangu yayi, yayi kele mpasi mingi. Beno me mona? Ntangu yayi, beno fwana kutala mbote. Ntangu yayi beno bambuka moyo, beto ke kwikilaka mpe ke longaka na dibuundu yayi, ya kele ve ti muntu nyonso yina ke kwizaka awa mpe ke bokaka, muntu nyonso yina ti ke zonzaka na bandinga ya malu-malu, muntu nyonso yina ti ke pesaka mbote na mulongi, ke na Luzingu ya Kukonda nsuka. Kasi beto ke kwikilaka kana beno ke na Luzingu ya Kukonda nsuka, kana Nzambi me pesa beno Luzingu ya Kukonda nsuka, beno ke na Yawu ntangu nyonso. Beno me mona? Samu ti beno tala. Kana ya kele ve, Yesu ke talana mulongisi ya luvunu. Na Santu Jean 5:24, Yandi tubaka, “Yandi yina ke kuwa Badinga ya Munu mpe ke kwikila na Yandi yina fidisaka Munu ke na Luzingu ya Kukonda nsuka, mpe ke luta ata mbala mosi ve na lusambusu, kasi me luta lufwa na Luzingu.” Ntangu yayi, beno sala ntembe na Yandi. “Nyonso Tata me pesa Munu. . . Muntu ve lenda kwiza na Munu kana ti Tata benda yandi. (Mu ke na kupesaka Masonuku.) Nyonso yina ke kwiza. . . Muntu ve lenda kwiza na Munu kana ti Tata ya Munu me benda yandi ntete. Mpe nyonso yina Tata ya Munu me pesa Munu ke kwiza na Munu. (Beno me mona?) Mpe nyonso yina ke kwiza na Munu, Mu ke pesa bawu Luzingu ya Kukonda nsuka (Santu Jean 6), mpe ke vumbula yandi na lufwa na bilumbu ya nsuka.” Yina kele bampova ya Yandi.

¹⁶³ Ntangu yayi beno tala. Kana mu zola kuvutuka na Éphésiens kapu ya 1, Paul ke na kulongaka. . . Ntangu yayi, bantu ya Corinthe, mosi na mosi vwandaka zonza na ndinga ya malu-malu mpe nkunga. Beno ke tala ti mabuundu yankaka yina vwandaka ve na dyambu yayi. Ata mbala mosi ve ti yandi tubaka kima samu na yawu. Yandi kuzonzilaka kwandi na bandinga ya malu-malu kisika na dibuundu ya ba-Éphésiens, na dibuundu ya Rome? Ve! Ba vwandaka na bandinga ya malu-malu mpe bima nyonso kaka mutindu bantu ya Corinthe kusalaka, kasi bawu vwandaka na yawu ya kusungika. Bantu ya Corinthe vwanda lenda kaka ve na kusungika yawu. Beno me mona? Kasi Paul kwendaka kuna mpe sungikaka dibuundu.

Ntangu yayi, yandi. . . Mu ke kwikila, mutindu Oral Roberts kutubaka, “Nzambi kele Nzambi ya mbote.” Beno ke kwikila yawu ve?

¹⁶⁴ Mpe beno ke tuba, “Mbote, wapi mutindu samu na bantu ya Pantekote na bandinga ya malu-malu kuna, Mpangi Branham?” Mu banza ti bawu kele na Mpeve-Santu. Kieleka bawu me kuzwa. Mbote mingi, samu na yinki? Beno tala. Beno ke kwikila ti Yandi kele Nzambi ya mbote? Thomas tubaka kilumbu mosi, “Beno zaba, Mfumu. . .”

Nyonso ya bayankaka ya bawu kwikilaka Yandi. Bawu vwandaka tuba, “Oh, beto zaba ti Yandi kele kieleka!”

“Oh,” Thomas tubaka, “ve, ve, mu ke kwikila yawu ve. Mutindu kaka mu lenda kukwikila yawu, mu fwana kuzwa kimbangi mosi. Mu fwana kutula misapi ya munu na lweka ya Yandi mpe na bidimbu ya bansoso na maboko ya Yandi.”

Yandi kele Nzambi ya mbote. Yandi tubaka, “Kwiza, Thomas. Tala.”

“Oh,” Thomas tubaka, “ntangu yayi mu me kwikila.”

¹⁶⁵ Yandi tubaka, “Yinga, Thomas, na manima nge me mona Munu, mpe me kuwa Munu, mpe me tula diboko ya Munu. . . maboko ya nge na lweka ya Munu, nge me kwikila. Kasi yinki mutindu nene mingi kele ndandu ya bawu yina me monaka ntete ve mpe kasi me kwikila.” Yandi kele Nzambi ya mbote. Yandi ke pesa beno nsatu ya ntima ya beno, kieleka. Ti beto kwikilaka kaka Yandi. Ya kele—ya kele—ya kele dikofi ya kufwa Satana. Ntangu muntu ke bakaka Nzambi na Ndinga ya Yandi, mpangi, yina ke kufwa Satana konso ntangu. Yina kele dikofi ya ngolo mingi yina Satana lenda kuzwa, ntangu muntu ke baka Nzambi na Ndinga ya Yandi. Yinga, tata. Mutindu mu tubaka, “Muntu ke zinga kaka ve (Yesu, nkokila yankaka yina), kasi na konso Ndinga yina ke basika. . .”

¹⁶⁶ Ntangu yayi, beno tala yayi. Ntangu yayi mu ke banda na nzila ya ntete:

Na yina beto bika misiku ya malongi ya Klisto, ti beto kulandila kukula; . . . (Ntangu yayi, kima ya ntete mu zola beno kuzaba: na nani Paul ke na kuzonzaka awa? Ba-Hébreux. Ba tulaka, “Ba-Hébreux,” na zulu, Buku ya ba-Hébreux. Ya kele kieleka? Ba-Juif yina losaka Yesu. . . Beno—beno ke tala yawu ntangu yayi? Yandi ke na kuzonzaka na ba-Juif, na kulakisaka bawu ti kivudi ya musiku kuvwandaka kifwanusu ya Klisto. Bima nyonso ya ntama kele kifwanusu ya malu-malu. Ntangu yayi beno tala mbote.)

. . . beto bika misiku ya malongi ya Klisto, ti beto kulandila kukula; . . .

¹⁶⁷ Awa, yandi vwandaka zonza na bawu na yina me tala malongi. Ti beto landila mpe kuzonza na yina me tala bima ya kukula. Ntangu yayi, beno kele ya kukula na Nzambi ntangu beno kele ya kutula kinyemo na Mpeve-Santu *tii* kilumbu ya beno ya mpulusu. “Yandi yina kele ya kubutama ya Nzambi (Ntete ya Jean) ke salaka ve disumu; samu ti yandi lenda ve kusumuka, samu ti Nkuna ya Nzambi kele na kati ya yandi.”

¹⁶⁸ Muntu yina kele ya kufuluka na Mpeve-Santu, yina ve ke banzaka ti yandi kele ya kufuluka, kasi yandi yina kele ya kubutama na Mpeve ya Nzambi ke salaka ve disumu, samu ti Nkuna ya Nzambi kele na kati ya yandi, mpe yandi lenda ve kusumuka. Beno me mona? Biblia me tuba yawu? Na yawu yawu yayi. Beno kele. . . Ve yina beno ke salaka, yina, ya kele yina,

ve yina yinza ke banza na beno, ya kele yina Nzambi ke banza na beno. Beno me mona, beno me mona? Beno lenda ve. . . Yinki mutindu mu kele na lutumu ya kusonika ya mfumu ya mbanza, ti mu lenda nata ditoma mbangu bakilometele makumi sambanu na tanu na ngunga mosi na kati ya mbanza, mpe pulusu kukanga munu? Ya lenda ve. Yinki mutindu mu lenda sumuka na yina ya kele na munkayulu ya menga na ntwala ya Nzambi ntangu nyonso, kisika Yandi lenda kwandi ve kumona munu; na yina ya kele na pare-choc na—na. . . na ntwala ya munu mpe Nzambi, kisengo ya lukengolo ya Menga? Samu ti beto kele ya kufwa, mpe luzingu ya beto kele ya kubumbama na kati ya Klisto na nzila ya Nzambi, ya kutula kinyemo na Mpeve-Santu. Yinki mutindu na yinza beno lenda sala kima ya yimbi na meso ya Nzambi? “Kana beto kusumuka na luzolo ya beto mosi (Hébreux 10) na manima beto me kuzwa luzabu ya Kieleka, ya kele dyaka ve na munkayulu ya disumu.” Na kati awa ya lenda kusalama ve (beno me mona?) kusumuka na luzolo ya beno mosi.

169 Ntangu yayi, beto kwenda na ntwala na kutanga. Mbote mingi.

. . . kukula; kukondwa dyaka kutula lufulu ya—ya kuwiluka na bima ya kufwa, mpe . . . lukwikilu na ntwala ya Nzambi,

Na malongi ya bambotika, . . . kutentika ya maboko, mpe na mvumbukulu ya bantu ya kufwa, mpe . . . lufundusu ya nsuka.

Mpe yayi. . . beto ke sala, kana Nzambi pesa muswa.

(Ntangu yayi beno tala kisika bawu zolaka banda, na nzila ya 4.) *Samu ti ya lenda salama ve samu na bayina. . . mbala mosi kuzwaka nsemo, mpe me meka dikabu ya mazulu, mpe me kuzwa ndambu Mpeve-Santu,*

Mpe vwanda me meka bumbote ya ndinga ya Nzambi, mpe bangolo ya yinza ke na kwiza,

Kasi bawu me vutukila luzingu ya bawu, bantu yina lenda kusoba dyaka ve na mbala zole luzingu ya bawu; na kumona bawu ke na kukomaka dyaka Mwana ya Nzambi na kulunsi, mpe ke bika ba finga yandi.

170 Ntangu yayi, awa, ya ke talana mutindu, na mutindu ti beno ke na kutangaka yawu kuna, ti muntu lenda kuzwa Mpeve-Santu, mpe dyaka retrograde mpe kuvwanda ya kuzimbana. Kasi ya lenda kusalama ve samu na yandi na kusala yawu. Beno me mona? Yandi lenda ve kusala yawu. Kana yandi kusalaka, Klisto vunaka. Beno me mona? Ya lenda ve kusalama na bayina mbala mosi kuzwaka nsemo. Ntangu yayi, beno tala mbote awa. Yandi ke na kuzonzilaka na yinki? Yandi ke na kuzonzilaka na ba-Juif yango ya ndilu. Ata mbala mosi ve ti yandi kutubaka

muntu yina me fuluka na Mpeve-Santu; yandi tubaka, “Kana yandi me meka Ndinga ya Nzambi.”

¹⁷¹ Ntangu yayi, bika mu pesa kaka yawu na mutindu ya kingana, samu ti beno kumona mpe ti beno kukondwa yawu ve ntangu yayi. Ntangu yayi, yandi ke na kusonikaka na ba-Juif yayi. Bayankaka ya bawu kele mikwikidi ya ndilu. Beno me mona? Yandi tubaka, “Ntangu yayi, beto ke bika bisalu yayi mpe kulandila na kuzonzila na kukula.” Yandi tubaka, “Ntangu yayi, beto ke na kuzonzilaka na bambotika, mpe mvumbukulu ya lufwa, mpe kutentika ya maboko, mpe bima nyonso; kasi beto kwenda na ntuala ntangu yayi na kuzonza na yina me tala kukula. Ntangu yayi, beto ke zonzila na ntangu beno ke kota na kati ya Mpeve-Santu. Awa, ya me kuma bilumbu mingi beno ke na kulandaka balukutakanu. . . .”

¹⁷² Mpe beno me mona bantu yango. Bawu ke vwanda bisika; bawu ke kota ve to ke basika ve. Bawu zola Mpeve-Santu. Bawu ke kwiza bisika. Mpe ya lenda vwanda ti Mpeve-Santu ke sala kima mpe, bakala, bawu ke telama mpe ke boka, mpe ke dumuka mpe ke kubwa na ntoto samu na yina, kasi ata mbala mosi ve ti bawu ke zola kuzwa Yawu bawu mosi. Ve, ve! Beno me mona? Mpe bawu ke tuba, “Oh, yinga, ya kele mbote. Oh, mu zaba yina ve ntangu yayi.” Beno me mona, beno me mona, beno me mona? Mikwikidi ya ndilu. Ya kubela mingi tii bawu lenda kumeka Yawu, kasi dyaka bawu ke kuzwa Yawu ve. Beno me mona? Ntangu yayi, bawu ke tambula bisika mutindu yina ntangu mingi tii na manima ya mwa ntangu bawu ke basika na muvimba na nzila. Mu lenda tanguna bankumbu ya mingi yina vwandaka na tabernacle, bayina salaka kima mutindu mosi. Bawu kubwaka dyaka, samu na kuvutukila bawu mosi na kubalula ntima, ya kele dyaka ve na kubalula ntima samu na bawu. Bawu me nyongisa kaka Mpeve yina me katukila bawu. Bawu me vwanda pene-pene mingi tii. . . .

¹⁷³ Awa, kana beno zola kutala na munu (beno kele na ntangu ve, mu zaba, ntangu yayi) kasi kana beno zola kutala na Deutéronome kapu ya 1te mpe beno tanga yawu, beno ke kuzwa kima mutindu mosi. Beno sonika yawu ntangu yayi, Deutéronome kapu ya 1. Awa, mpe beno banda na nzila ya 19 mpe kutanga tii na 26. Deutéronome. . . . Beno ke mona. . . . Ntangu yayi beno tala. Israël nyonso. . . . Yina bantu yina me sala, bawu me kuma na Kadès-barnéa. Oh, mu ke mona kima! Tabernacle yayi, yinza ya Pantekote yayi kele na Kadès-barnéa kaka ntangu yayi. Ya kele kaka kieleka, Mpangi Neville. Beto kele na Kadès-barnéa, kiti ya lufundusu ya yinza (ya vwandaka kiti ya lusambusu).

¹⁷⁴ Mpe balangididi kwendaka kuna. Josué tubaka awa, “Ntangu yayi, mu me fidisa balangididi,” to Moïse, na kisika, “Mu me fidisa balangididi, kumi na zole, mosi ya, muntu mosi

na konso makanda ya beno. Mu me fidisa bawu na kwenda tala yisi mpe kuvutuka na nsangu.” Ya kele kieleka?

Mpe ntangu bawu kuvutukaka, ya vwandaka na yivwa na zulu ya kumi na zole yina tubaka, “Oh, ya kele yinsi ya mbote, kasi oh, kyadi, beto lenda ve kubaka yawu. Oh, la la! Ba-Amoréen kele kuna, mpe beto ke talana mutindu makonko na lweka ya bawu. Bawu kele bantu yina kele na minduki. Bibaka ya bawu kele nene. Oh, ya kele mingi. . . mbote, mu zolaka tala mbote kana beto kufwaka kuna na Égypte na kisika ti nge kunata beto awa.”

¹⁷⁵ Kasi, mwa kiboba Caleb mpe Josué me dumuka kuna mpe me vwandisa bawu swi; Bawu tubaka, “Beto kele ya kulutila ya kulenda na kubaka yawu.” Yinga, tata! Yandi yayi muntu. Ntangu yayi beno tala. Yinki kusalamaka? Caleb na Josué kuzabaka ti Nzambi kupesaka nsilulu ya yawu: “Mu ke kipe ve mutindu nene ya kele, lutangu ya bikaka ya kele, mutindu yinda bawu kele, mutindu luvalu bawu kele, yina ke sala ata kima ve na yawu. Nzambi tubaka yawu, mpe beto lenda baka yawu.” Mpe beno zaba ti bawu kele bantu kaka zole yina, na zulu ya zole na ndambu ya mafuku, yina zabukaka na kukota na yinsi? Samu ti bawu kukangamaka na lukwikilu ya bawu na yina Nzambi kutubaka yina vwandaka Kieleka. Amen!

¹⁷⁶ Tabernacle, ntangu yayi kaka, kele na Kadès-barnéa. Beno tala, bantu yango vwandaka pene-pene mingi tii bawu kumekaka mpe bambuma ya vinu ya yinsi yina. Bawu kudyaka bambuma ya vinu. Ntangu Caleb mpe bawu kukwendaka kuna mpe nataka bambuma ya vinu, bantu yango kukatulaka ndambu mpe bawu kudyaka. “Oh, ya kele mbote, kasi beto lenda sala yawu ve.” “Bawu yina mekaka bumbote ya kisalu ya Nzambi, yina mekaka Mpeve-Santu, monaka bumbote ya Yawu, mekaka Yawu, yina mekaka Ndinga ya Nzambi. . .” Beno me mona yawu? Ata mosi ya bantu yango, ata mosi ya bawu ata mbala mosi ve kuzwaka muswa ya kuzabuka. Bawu kufwaka na yinsi ya bawu mosi, awa na ntoto ya kuyuma. Ata mbala mosi ve ti bawu kuzabukaka, na kutala bawu vwandaka pene-pene mingi na kumeka Yawu, kasi lemvo vwandaka mingi ve mpe lukwikilu samu na kubaka Yawu. Ya kele yina yawu kele.

¹⁷⁷ Ntangu yayi. Ntangu yayi beno kuwa muntu yango ya luzolo yina sonikaka mukanda yayi. Beto tanga kaka nzila yina ke landa. Beno tala kaka minuti. Beno tala mbote Paul. Ntangu yayi beto tanga 7:

Samu ti ntoto. . .kunwaka maza ya mvula yina ke kubwaka konso ntangu na zulu ya yawu, mpe ke basisaka matiti misuni samu na bayina yawu kele mfunu, ke kuzwa balusakumunu me katuka na Nzambi:

*Kasi yina ke basisa matiti ya bansende mpe
bansolokoto kele dyaka mfunu ve, mpe ke vingila
kusinga; nsuka ya yawu kele kuyoka.*

¹⁷⁸ Ntangu yayi, beno me mona yinki yandi ke tuba? Ntangu yayi beno tala mbote. Ya vwandaka na kyuvu yayi awa; ntangu yayi, mpe na manima beto ke sukisa. . . Kima yayi zolaka kufwaka munu bamvula mingi.

¹⁷⁹ Mu kwendaka na balukutakanu mosi kilumbu mosi kisika bantu vwandaka zonza na bandinga ya malu-malu na Mishawaka, na Indiana. Ntangu yayi, mu kele na ntwala ya bantu ya munu mosi. Beno kuwaka bantu yayi. . . kuwa munu kutuba disolo ya luzingu ya munu, mpe na muntu ya ndombi yina vwandaka tuba, “Awa yandi kele. Awa yandi kele.” Ntangu yayi, mu tubaka yawu.

¹⁸⁰ Kasi beno tala kulanda ya yawu: Mu monaka bantu zole. Bawu vwandaka. . . Mosi vwandaka pesa nsangu, yankaka yina kutendulaka yawu. Yankaka yina vwandaka pesa nsangu, mpe yankaka yina vwandaka tendula yawu. Mpe mpangi, ya vwandaka kieleka. Kaka yayi. . . Mu banzaka, “Kyadi! Mu me monaka ntete ve kima mutindu yina.” Mu tubaka, “Mu kele na kati-kati ya bawanzio.” Mu banzaka, mu me monaka ntete ve kima. . . Mosi vwandaka zonza, mpe yankaka yina. . .

¹⁸¹ Mpe mu vwandaka ya kuvwanda na manima kuna, mutindu mwa mulongi mosi ya ntama, beno. . . [Kisika ya mpamba na bande—Mu]. . . bakala yango nyonso zole bantangu yankaka vwandaka pesana maboko ya bawu. Mu me monaka ntete ve bantu mutindu yina na luzingu ya munu. Bawu vwandaka zonza nsangu, mpe yankaka yina vwandaka tendula yawu. Mpe oh, oh! Ya vwandaka kitoko mingi! Mosi, vwandaka zonza mpe yankaka yina vwandaka tendula. Bawu nyonso zole. . . Mpe ntangu bawu vwandaka telemisa maboko ya bawu bawu vwandaka kituka mpembe mutindu mpemba. Mu banzaka, “Oh la la, oh, wapi kisika mu vwandaka luzingu ya munu nyonso. Yayi kele kima!” Mu tubaka, “Oh, bantu ya Pantekote kele na kieleka.” Ya kele kaka kieleka.

¹⁸² Mu monaka ntete ve mingi kasi kaka yina vwandaka kuna na kati awa, kisika. . . Mu banza ndambu ya bakento na kati ya kisalu kisika mosi. Mpe bawu vwandaka swana; mpe mosi vwandaka bokila yankaka, “kisika ya kutelama ya ba-buse,” mpe, beno zaba, kaka mutindu yina, mutindu ya kuswana mosi na yankaka. Ya kele ve samu na kuzitisa ve bakento awa to kima, kasi kaka. . . Ya—ya vwandaka na kuvutuka ya kituma. Kana mosi ya beno. . . Nge me bambuka moyo, Mpangi Graham. Nge vwandaka kaka mwa mwana ya bakala na ntangu yango. Mpe na yawu, ya kele mutindu yawu vwandaka.

Mpe mu kuwaka yawu, mpe mu banzaka, “Oh, la la, mu me kutana bawanzio.”

183 Kilumbu mosi na kukwizaka na nsongi ya yinzo, na kutala kilumbu ya zole, mu kutanaka mosi ya babakala yango. Mu tubaka, “Mbote, Tata?”

Yandi tubaka, “Mbote?” Yandi tubaka, “Nge . . . Yinki kele nkumbu ya nge?”

Mpe mu tubaka, “Branham.”

Yandi tubaka, “Nge kele ya wapi kisika? Ya awa?”

Mpe mu tubaka, “Ve, mu kele ya Jeffersonville.”

Yandi tubaka, “Mbote, ya kele mbote. Nge kele muntu ya Pantekote?”

Mu tubaka, “Ve, tata, ve.” Mu tubaka, “Mu ke ndima kaka ve mutindu ya bantu ya Pantekote ya kuzwa Mpeve-Santu,” mu tubaka, “na mutindu nyonso,” mu tubaka, “Mu kele awa samu na kulongoka.”

184 Yandi tubaka, “Mbote, yina kele mingi mbote.” Mpe na kuzonzaka na yandi, na kutalaka na mpeve ya yandi (mutindu kento na dibulu), yandi vwandaka Muklisto ya kieleka. Mpangi, mu zola kutuba yandi vwandaka lakisa nyonso mbote. Yandi vwandaka mbote. Ntangu yayi, beno nyonso . . . Bantu yikwa me vwandaka na balukutakanu ya munu mpe monaka bima yango kusalama? Beno me mona? Mpe muntu yango vwandaka kieleka nyonso ya kulunga. Na yawu kuna, mu—mu banzaka, “Yawu yina! Oh, mutindu ya vwandaka kitoko mingi!”

185 Na nkokila yina, na manima ya midi na mwa ntangu mosi, mu kutanaka na yankaka yina. Mu tubaka, “Mbote, Tata?”

Yandi tubaka, “Mbote? Yinki kele nkumbu ya nge?” Mpe mu tubaka na yandi. Mpe yandi tubaka, “Nge . . . Nge kele—kele muntu ya Pantekote?”

Mu tubaka, “Ve, tata, kwandi ve muntu ya Pantekote, ve.” Mu tubaka, “Mu kele kaka awa samu na kulongoka.”

Yandi tubaka, mu tubaka, yandi tubaka, “Nge me kuzwaka yimeni Mpeve-Santu?”

Mu tubaka, “Mu—mu zaba ve.” Mu tubaka, “Landila yina kele na beno nyonso, mu banza ti mu me kuzwa ntete ve.”

Mpe yandi tubaka, “Beno me zonzaka ntete ve na bandinga ya malu-malu?” Mu tubaka, “Ve, tata!”

Yandi tubaka, “Na yina beno me kuzwa Yawu ntete ve.”

186 Mpe mu tubaka, “Mbote, mu—mu banza ti ya kele kieleka.” Mu tubaka, “Mu zaba ve. Ya me kuma kaka na kutala bamvula zole, to ndambu ti mu ke na kulongoka,” mpe mu tubaka, “Mu zaba mingi ve na zulu ya Yawu.” Mu tubaka, “Mu banza ti mu zaba ve.” Mu tubaka, “Mu lenda ve kubakula . . .” Samu na yina, mu vwanda meka na kusimba yandi kuna (beno me mona?), samu na kutala yawu. Mpe ntangu mu lendaka, kana mu me kutanaka ntete muntu ya luvunu, kuna vwandaka mosi ya bawu.

Kento ya yandi vwandaka na bansuki ya ndombi; mpe yandi vwandaka zinga na kento mosi ya bansuki ya tinta ya maza ya mwamba, kuzwaka bana zole na yandi; mpe vwandaka zonza na bandinga ya malu-malu, vwandaka tendula yawu kaka mutindu ya kulunga mutindu ya zolaka vwandaka. Mpe mu tubaka, “Ntangu yayi, Mfumu, na kati ya yinki mu me kukota?” Na kati ya bawanzio, mu vwandaka zaba ve na yina mu vwandaka me kota. Mu tubaka, “Mu—mu—mu kele ya kukangama na masonuku; ya fwana vwanda na Biblia. Ya fwana vwanda ya kulunga. Ya kele na kima ke na kutambula ve mbote kisika, Mfumu. Yinki mutindu ya lenda vwanda?”

¹⁸⁷ Mu kwendaka na lukutakanu na nkokila yango, mpe Mpeve yango vwanda kubwa; mpe bampangi, beno zolaka kuwa Yawu ya nzutu, ti Yawu vwandaka Mpeve-Santu. Yinga, tata! Kana Yawu kuvwandaka ve, Yawu vwandaka pesa kimbangi na mpeve ya munu ti Yawu vwandaka Mpeve-Santu. Mpe mu vwandaka kaka ntwenya ya mulongi, mpe vwandaka zaba ve mutindu, mingi na zulu ya mpeve ya kuzaba mabanza ya ntima. Kasi mu vwandaka ya kuvwanda kuna. Mpe mu zaba ti Nzambi mosi yina vuukisaka munu, ti vwandaka kuwa ya nzutu mutindu mosi. . . Mu talaka mutindu mu zolaka luta na muludi, ya vwandaka kuwa mosi ya nzutu ya kitoko mingi na kati ya yinzo yango ya nene. Mpe mu banzaka. . .

¹⁸⁸ Ya vwandaka na kutala bantu mafunda mosi na bankama tanu kuna. Mpe mu banzaka, “Oh, oh la la!” Zole to tatu ya bankonga ya bawu kukutanaka kintwadi. Mpe mu banzaka, “Oh, vingila fyoti! Yinki mutindu ya lenda vwanda? Ntangu yayi, Mpeve yango ya nene na kati ya yinzo yayi ya nene vwandaka kubwa mutindu yayi; mpe awa, beno tala yayi kusalama kuna, bantu yango ke zonza na bandinga ya malu-malu, ke tendula, ke pesa nsangu ya kulunga— mpe mosi ya bawu muntu ya luvunu mpe yankaka yina muntu ya kieleka ya Nzambi.” Mpe mu banzaka, “Awa, mu kele nyonso ya kuyitukisa. Mu zaba ve yinki ya kusala.”

¹⁸⁹ Mbote, mbala mosi na manima ya yawu, nkundi mosi ya munu ya mbote, Mpangi Davis (beno zaba), bandaka na kutuba ti mu vwandaka popi. Yina kele kisanakanu ya mwana ya kento, beno zaba. Mpe kuna, mu vwandaka ve ya kukwela, mpe na yawu mu. . . Yandi landilaka na zulu ya munu, mpe landilaka kuna, mutindu ya kuseka munu.

¹⁹⁰ Mpe beto vwanda kuzwa mwa. . . Mpe mama ya beno mpe nyonso ya beto vwanda kuzwa mwa balukutakanu na bisika yankaka bisika. Tabernacle vwandaka—vwandaka tambula ve na ntangu yina, mpe beto vwanda kuzwa mwa balukutakanu na bisika yankaka. Mpe na nsuka kilumbu mosi, na manima tabernacle me kutungama, bamvula mingi na ntwala, mu kwendaka na Green’s Mill na caverne ya munu samu na kusambila, samu Mpangi Davis kutubaka mwa bima ya yimbi

na zulu ya munu na—na—mukanda ya yandi. Mu zolaka yandi. Mu zolaka ve kima kusalama, mpe mu—mu mataka kuna samu na kusambila samu na yandi. Mpe mu mataka kuna, mpe mu kotaka na kiswamunu. Mpe mu vwandaka na kati kuna bilumbu zole. Mpe mu tubaka, “Mfumu, lemvokila yandi. Yandi—yandi zola kutuba—zola kutuba yina ve.” Mpe mu banzaka, “Nge zaba. . .” Na mbala kaka mosi Masonuku mosi me kwiza na mpeve ya munu.

¹⁹¹ Mpe mu me basika. Mpe ya vwandaka na nzutu ya ya yiti (nzutu ya yiti yango kele dyaka kuna, mu vwandaka na zulu ya yawu awa bilumbu mingi ve me luta) ya kubwaka na mongo mpe vwandaka na kati-kati ya mwa nzila yina vwandaka katuka mwa- masa. Mpe mu vwandaka ya kuvwanda ya kutula nzutu ya yinti yango na kati ya makulu ya munu, mu vwandaka tala myongo na—na ntama kuna, mpe mu tulaka Biblia ya munu mutindu yayi. Mu banzaka, “Nge zaba. . .” Mu vwandaka banza na Masonuku mosi: “Kisadi-bisengo, yandi me sala munu mpasi mingi, mpe me tuba bima.” Beno zaba. . . Mu banzaka, “Mu banza ti mu ke tanga kaka yawu.” Mu fungulaka Biblia, mpe mu tubaka, “Mbote. . .” Mu me kusuna kizizi ya munu, mpe mupepe me fula, mpe ya me balula yawu na Hébreux 6. “Mbote,” mu tubaka, “ya kele ve kisika yina yawu kele.” Mpe mu me vutula Yawu mutindu yayi. Mpe mupepe me fula dyaka mpe me balula dyaka Yawu. Mpe mu tubaka, “Ntangu yayi, ya kele ya ngitukulu, ti mupepe kufula yawu mutindu yina.” Na yawu mu banzaka, “Mbote, mu banza ti mu ke tanga yawu.” Mpe ya vwandaka tuba:

Samu ti ya lenda salama ve samu na bayina yina na mbala mosi kuzwaka nsemo, . . .kuzwa ndambu Mpeve-Santu, mpe me meka. . .Ndinga ya Nzambi, mpe kima ya yinza yina ke kwiza.

Mu banzaka, “Mbote, mu ke mona kima ve na yawu.” Mu me landila na kutanga, yina bikana na ya kapu. Kima ve na yina. Mu tubaka, “Mbote, yina ke—yina ke sukisa samu na yawu.” Mpe mu—mu monaka yawu mutindu yayi, mpe ya me vutuka dyaka. Mpe mu me baka Yawu, mpe mu me banza, “Mbote, yinki ya kele?” Mu me landila na kutanga yawu, mpe kutanga yawu, mpe kutanga yawu, mu tubaka, “Mbote, mu ke na kubakula ve.” Kuna mu me landila. . . Mpe mu me landila na kutanga na yisi:

. . . lenda salama ve samu na bayina yina kele na mbala mosi kuzwaka nsemo, . . .

Ya kumaka na yisi awa na kisika awa kisika ya ke tuba:

Mpe ntoto. . .kunwaka maza ya mvula yina ke kubwaka konso ntangu na zulu ya yawu, kubasisa matiti misuni samu na bayina yawu kele mfunu, ke kuzwa balusakumunu me katuka na Nzambi:

Kasi yina ke basisa matiti ya bansende mpe basonlokoto kele dyaka mfunu ve. . . mpe ke vingila nsingulu; lusambusu ya yawu kele kuyokama.

¹⁹² Mu tubaka, “Mu ke kumiyufula yinki ya zola kutuba?” Mu ke kaka. . . Kuna, mu vwanaka banza na kima ve na zulu kuna. Mu vwanaka banza kaka na yawu. Mpe kaka kuna na yina mutindu mu vwanaka ya kuvwanda kuna, Mu vwanaka banza ti Mfumu ke pesa munu vision samu na Mpangi Davis mpe bayankaka kuna. Mpe mu vwanaka ya kuvwanda kuna; mu talaka, mpe mu monaka kima kubaluka na lweka yankaka ya dibenga na ntwala ya munu. Mpe ya vwanaka yinza vwanaka baluka. Mpe mu monaka yawu nyonso ya kubasuka, vwanaka talana kaka mutindu ti ya vwanaka nyonso ya kusala. Mpe Muntu vwanaka kwiza na kima mosi—mosi—mosi ya nene mingi na ntwala ya Yandi ya kufuluka na bankuna, mpe Yandi vwanaka losa bankuna nzila nyonso na ntoto na yina Yandi vwanaka kwenda. Mpe Yandi kwendaka na nsuka ya ntoto, mpe Yandi zimbanaka na ntwala ya meso ya munu. Mpe na ntangu yina Yandi zimbanaka na ntwala ya meso ya munu, awa me kwiza muntu mosi ya kubumbama mingi na kutala, yina vwanaka ya kulwata bilele ya ndombi, yina vwanaka kwenda bisika nyonso mutindu yayi, vwanaka kwenda, fiou, fiou, vwanaka losa bankuna ya yimbi, fiou, fiou. Mpe mu vwanaka tala yandi mbote, mpe na yina ntoto vwanaka landila na kubaluka. . .

¹⁹³ Na manima ya mwa ntangu blé me basika. Mpe na yina blé kubasikaka, kuna me basika bansolokoto, mpe bayinti ya bansende, mpe matiti ya bansende, mpe yinti ya nsunga ya yimbi, mpe bima nyonso vwanaka kula, bayinti ya miliki, mpe bima nyonso vwanaka kula na blé. Mpe bawu nyonso vwanaka kula kintwadi. Mpe kuna kwizaka kukawuka mosi ya yimbi, mingi, mpe mwa blé yayi kuzwaka yintu ya yawu mutindu yayi, mpe mwa nsolokoto yayi, mpe yinti ya basende, matiti ya bansende, bawu kuzwaka bayintu ya bawu kutengama. Konso yinti kaka [Mpangi Branham me sala makelele ya kupema ya kulemba—Mu.] vwanaka pema mutindu yina. Beno zolaka kuwa kaka bawu. Mpe bawu vwanaka bokila samu na mvula, mvula.

¹⁹⁴ Mpe na manima ya mwa ntangu, kuna me kwiza dituti ya nene mingi, mpe maza me kubwa kaka mingi na yisi. Mpe ntangu yawu kubwaka na zulu kuna, blé yango kudumukaka mpe bandaka na kuboka, “Nkembo, Alleluia, Nkembo na Mfumu!” Kuna me dumuka mwa yinti yango ya nsunga ya yimbi mpe me bokaka, “Nkembo, Nkembo na Mfumu, Alleluia!” Matiti ya bansende mpe nyonso ya bawu, vwanaka bina bisika nyonso na bilanga na kubokaka, “Nkembo, Alleluia, Nkembo na Mfumu!”

Mbote, mu tubaka, “Mu ke na kubakula yawu ve.”

¹⁹⁵ Vision katukilaka munu; na manima mu me kubwa dyaka na zulu ya yawu: “Bansolokoto yina me belama na kulosama.” Kuna mu bakulaka yawu. Yesu tubaka, “Mvula ke kubwaka na zulu ya muntu ya kudedama mpe muntu ya kudedama ve.” Muntu lenda vwanda na lukutakanu, lenda zonza na bandinga ya malu-malu, lenda boka mpe kusala kaka mutindu bayankaka ya bawu na Mpeve-Santu ya kieleka mpe dyaka kuvwanda ve na Kimfumu ya Nzambi. Ya kele kaka kieleka. Yesu tubaka ve, “Mingi ke vwanda na kilumbu yango mpe ke tuba, ‘Mfumu, mu basisaka ve bampeve ya yimbi na Nkumbu ya Nge; mu pesaka profesu ve (longaka) na Nkumbu ya Nge; mu salaka ve bisalu ya nene mingi na Nkumbu ya Nge?’” Yesu tubaka, “Beno kwenda ntama ya Munu, beno bisadi ya disumu ya nko, ata mbala mosi ve Mu me zabaka beno.” Wapi mutindu samu na yina?

¹⁹⁶ Awa kele kaka yina yawu zola kutuba awa. Beno me mona? Bawu kumekaka mvula ya mbote ya Mazulu. Kasi na kubanda, bawu vwandaka yimbi. Na kubanda balukanu ya bawu kuvwandaka mbote ve; mabanza ya bawu kuvwandaka ve mbote. Ti, beno lenda ve kutuba . . . Beno zaba, na ntangu ya kuyonzika yandi tubaka, “Mu fwana kwenda kukatula nyonso?”

¹⁹⁷ Yandi tubaka, “Beno bika bawu kukula kintwadi, mpe na kilumbu yango matiti ya bansende mpe bayinti ya bansende ke yokama kintwadi, mpe blé ke kwenda na kisika ba ke bumbaka bambuma.” Ntangu yayi, yinki mutindu beno ke zaba yina kele matiti ya bansende, to yina kele yinti ya bansende, to yina kele blé? “Na mbuma ya bawu beno ke zaba bawu.” Beno me mona, mpangi ya bakala, mpangi ya kento, yinti ya mbote lenda basisa ve mbuma ya yimbi. Ata nyonso yina, kisika mosi na nzila, ya ke kuzwa beno. Na yawu, beno bayina ke na kusosaka mbotika ya Mpeve-Santu . . . Mu ke na kilengi samu na yina me sonika yawu. Beno me mona?

¹⁹⁸ Ntangu yayi, mikwikidi yango na ndilu na manima kuna, bawu vwandaka kaka na bawu. Ba zengaka bawu bubakala na mutindu ya kuzenga bubakala ya kuna. Bawu kwendaka mbala mosi na yinsi yina Nzambi silaka, tii na ndilu ya yawu. Mingi kele bantu yina ke tambulaka tii na ndilu yango. Yandi ke tambula tii na mbotika ya Mpeve-Santu mpe ke manga yawu. Yandi zola ve kubika yawu. Yandi ke tambula tii mbotika ya Masonuku na Nkumbu ya Yesu Klisto, mpe ke pesa manima ya yandi, mpe ke manga yawu samu na kukangama na kumona yawu.

¹⁹⁹ Ya kele na Masonuku mosi ve na kati ya Biblia nyonso kisika muntu kubotamaka ntete na nkumbu ya Tata, Mwana, Mpeve-Santu, ata Masonuku mosi. Dibuundu ya Katolika kubandaka yawu, me kwenda na ntswala na Luther, na manima na Wesley, mpe na nsuka tii awa. Ya kele kaka kieleka. Kasi lutumu ya Masonuku kele na Nkumbu ya Mfumu Yesu Klisto. Yina

kele mbotika ya bantumwa. Beno lenda ve kusala yawu mpe kuvwanda na dénomination. Ya kele kieleka.

²⁰⁰ Ntangu yayi, beno ke mona bima yango? Mbotika ya Mpeve-Santu, makabu ya Kimpeve, bima yina Nzambi ke pesaka. . . Bambuma ya Kimpeve kele zola, kyese, ntima ya yinda (oh, beno ke tuba, “Kasi Mpangi Branham, nkembo na Nzambi, mu kele na ntima ya yinda.” Ya ke monana mutindu yina. Mu kwendaka na Ohio awa mwa ntama mingi ve, mpe muntu mosi kuyufulaka munu, kusonikaka mukanda awa mpe yufulaka munu kana mu ke botikaka bantu na Nkumbu ya Yesu Klisto. Mu tubaka ata dyambu mosi ve. Kasi bawu kuzabaka yawu na mutindu nyonzo, mpe kumi na sambanu ya milongi yina ndimaka na kuvukana kukatukaka. Yina kele kukanga ntima ve!)—kukanga ntima, bumbote, lembami, lutondo, mvibudulu, mpe Mpeve-Santu. Beno me mona?

²⁰¹ Oh, mpangi ya bakala, mpangi ya kento, beto kele—beto kele na Kadès-barnéa. Beno ke na kumeka ntangu yayi. Mazono na nkokila Mpeve-Santu kubwaka na zulu ya beto, kwizaka na kati ya beto, na mutindu ya mupepe ya ngolo. Yawu kuvwandaka na zulu ya mingi ya beno. Bubuy yayi milongi vwandaka me kwenda na bayinzo awa mpe kuna, vwandaka tentika maboko mpe vwandaka sambila samu na bayina vwandaka sosa Mpeve-Santu. Beno baka kima ve. Beno baka ve mwa mutindu ya makelele. Beno baka ve mwa mutindu ya kuningana ya nzutu. Beno vingila kuna tii Nzambi ke sala beno mpe ke sala beno kivangu ya malu-malu, kusala beno muntu ya malu-malu. Beno ke na kumekaka Yawu ntangu yayi, ke kaka na kumekaka Yawu, kasi beno bika Yembe kutwadisa beno kaka na mesa, mpe—mpe Mwana dimeme mpe Yembe ke vwanda kintwadi, mpe ke sepela na kusala mukembo ntangu nyonzo na zulu ya Ndinga ya Nzambi. Samu ti Yawu ke vwanda ntangu ya ke vwanda ve na mazulu to ntoto; Ndinga ya Nzambi ke vwanda kaka. Ya kele kieleka.

²⁰² Lemvo beno banza ve ti mu kele ngolo. Kana mu me vwanda yawu, mu vwandaka me zola kuvwanda yawu. Kana mu. . . Mu banza ti mu vwandaka me pesa mvutu na bakyuvu yayi; mu me pesa bamvutu, landila luzabu ya munu ya kulutila.

²⁰³ Mpe kuna, na Hébreux 6, kana beno mona, Paul ke na kuzonzaka na ba-Hébreu ti tubaka, “Mbote, beto kele ntima mosi na nge tii kisika mosi.” Bawu ke kwiza. Beno me mona? Yandi tubaka, “Ntangu yayi, beno me. . .” Bayina me kwiza mpe me meka.

²⁰⁴ Mu vwandaka me tala kaka na manima ya kati ya yinzo yayi. Samu na kulakisa beno kimbangi ya Nzambi ya Moyo. Mu banza ve ti mu ke sala muntu yayi kutala mbote ve. Mu me katuka lukutakanu mosi ntama mingi ve, mpe me kwiza awa, mpe mu samuna na beno ti nkundi mosi ya munu ya mbote, nkundi

mosi ya munu, mpangi ya kuzomba, bakala yango me vwanda mbote na munu, muntu yina vwandaka na dibuundu ya munu, mpe vwandaka mpangi ya munu; mu vwanda bokilaka yandi Busty. Nkumbu ya yandi ke Everett Rodgers; yandi vwanda zingaka na Milltown. Bantu yikwa awa ke bambuka moyo ti mu samunaka yawu? Yandi vwandaka ya kulala awa na lupitalu; badokotolo kupasulaka yandi, bawu kufungulaka yandi, mpe yandi vwandaka ya kufuluka na cancer ti bawu kutungaka kaka yandi. Bawu kutuba, “Yandi ke lemba na mbangu; na balumingu fyoti yandi ke kufwa; ya ke vwanda kaka nyonso yina yawu ke vwanda samu na yandi. Yandi ke suka, kaka yina.”

²⁰⁵ Beno ke bambuka moyo mutindu mu telamaka awa na estrade, kusambilaka samu na yandi? Mu kwendaka kuna mpe kotaka na kati ya kivinga, kima vwandaka tatika na kati ya ntima ya munu. Mu kotaka na kati ya kivinga, mpe ntangu yina mu kuzwaka bantu nyonso na ngaanda kuna mu lendaka . . . Mpangi Everett vwandaka ya kulala kuna. Mpe beno ke bambuka moyo na yayi. Mu kotaka na kati; mu tubaka, “Mpangi—Mpangi Busty.” (Mu vwanda bokilaka yandi Busty.)

²⁰⁶ Bilumbu mingi me luta ntangu beto vwanda kuzwa balukutakanu na yisi ya bintala ya tonnelle kuna, ba-Méthodiste nyonso vwandaka kuna na mongo (Gertie, mosi ya bawu), vwandaka sala nzila ya kuluta, vwandaka mona na mayela na nzila ya bintala ya vinu samu na kumona yina mu zolaka tuba, mpe mutindu yina, vwandaka na boma ti dibuundu ya Méthodiste zolaka tula yandi na ngaanda ya bawu. Mpe kuna, mu kwendaka mpe kuzwaka vision kuna, mpe mu monaka musuni ya kukutika nyonso na dinzanza. Mu kuzwaka kinkunku ya bambisi mpe tulaka yawu basinga, tulaka—tulaka yawu na zulu ya basinga, mpe kakanga yawu na basinga. Mpe ntangu mu talaka . . . Mpe ya vwandaka nyonso na kati ya vision; mu bikaka—bikaka nkonga ya bantu ya kutelama na yisi ya bintala ya tonnelle na nkokila yango mpe kwendaka na zulu ya mongo na Mpangi Wright’s. Mpe bawu lendaka kwandi ve na kutala munu suka yina vwandaka landa. Mu tubaka, “Ti mosi ya beno ve . . .”

²⁰⁷ Na yina mu vwandaka ya kutelama kuna vwandaka longa, awa me kwiza Nsemo yango; Dikunzi yango ya Tiya me tentama kaka awa na ntwala ya munu mpe tubaka, “Katuka awa mpe kwenda na bayinti; mu ke zonga na nge.” Ya vwandaka kilumbu mosi yina, kilumbu yina vwandaka landa ntangu bawu kutalaka munu na zulu ya mongo. Mpe mu vwandaka na zulu kuna; mu bumbisaka ditoma ya munu na kati ya matiti, mpe vwandaka na zulu ya mongo vwandaka sambila mpimpa nyonso mpe kilumbu nyonso yina vwandaka landa. Bayankaka ya bawu kwizaka na zulu kuna, talaka ditoma mpe kwizaka na zulu kuna . . . Ya vwandaka kilumbu yina Mpangi Graham Snelling, awa, kuzwaka Mpeve-Santu mpe mbokolo ya kisalu.

208 Kuna na zulu ya mongo kisika mu vwandaka kuna, mpe Yandi—Yandi tubaka na munu mutindu na mutindu ya bima ya kusala mpe wapi kusolola beto kuzwaka kintwadi. Yandi pesaka vision ya kumonaka bambisi ya kukangama na singa, tubaka, “Yayi kele dibuundu ya nge ya Milltown.”

Mpe yiya to tanu ya bawu kukatukaka; mpe mu tubaka, “Ya kele banani?”

Yandi tubaka, “Mosi ya bawu kele Guy Spencer mpe kento ya yandi. Yankaka yina kele Spencer yankaka kuna, mpe baya bawu.” Mpe Yandi tubaka na bayankaka yina, bayina ke kukatuka.

209 Mu tubaka na bawu; mu tubaka, “Ti mosi ve ya beno kudya.” Kento ya munu mpe mu vwandaka ve . . . Ya vwandaka ntete beto kukwelana; mpe yandi kwendaka na yinzo na kuvwanda mpimpa nyonso na Mpangi ya kento Spencer, kento mosi ya mbote mingi. Bakala ya mbote mingi, Guy Spencer kele kaka bakala mosi ya mbote ya kulutila na ntoto. Mpe yandi—mpe yandi kwendaka kuna, mpe Opale tubaka, “Ntangu yayi, beno tala . . .” Na Meda, yandi kutubaka, “Ntangu yayi, Meda, mu ke kwikila Mpangi Bill.” Yandi tubaka, “Kasi ntangu Opale ke kuzwa nsatu, yandi fwana kuzwa jambon na maki.” Na yawu yandi kwendaka kuna, mpe kalingaka jambon mpe maki ya yandi, mpe vwandaka na yisi na kudya yawu, mpe bandaka na kutuba lusakumunu, mpe me tengama na lweka ya mesa, na kudila, vwanda lenda ve na kusimba yawu. Na yina bawu kotaka na kusosa.

210 Mpe kuna na zulu ya mongo kilumbu yango, Yandi tubaka na munu kaka yina zolaka salama. Yandi tubaka, “Bayayi ke kwenda, mpe dyaka bayayi ke kwenda.” Kasi Yandi vwandaka na kinkuku ya nene ya musuni na dinzanza. Yandi tubaka, “Bumba yayi samu na kusadila na ntangu yina ke kwiza na ntama samu na bantu ya Milltown.” Mpe na nkokila yankaka yina ntangu mu kuwaka Mpangi Creech . . . Yandi vwandaka ya kuvwanda awa mazono na nkokila. Mu ve . . . Mpangi Creech, nge kele awa na nkokila yayi? Ntangu Mpangi Creech me kwiza na munu, me bokila munu, mpe Mpangi-kento Creech, na kudila; papa ya yandi vwandaka ya kulala kuna. Yandi tubaka, “Mpangi Bill, kutuba na yandi ve. Yandi ke na kufwa.” Yandi tubaka, “Yandi kele ya kudya na cancer; badokotolo kufungulaka yandi, mpe yandi kele kaka ya kufuluka na cancer.” Mpe Will Hall (mpe beno nyonso ke bambuka moyo na yandi), ntangu dokotolo kaka mosi kufungulaka yandi mpe ti yandi vwandaka ya kufuluka na cancer . . . Mu bandaka na kukwendaka kuzomba bampadi na suka yango, mpe mu monaka ba-pomme yayi ya kulelika na kati ya kivinga. (Beno ke bambuka moyo na disolo yango yina?) Mpe kuna bakala yango ke na kuzingaka bubu yayi. Yina me luta bamvula mingi. Yandi mpe Mpangi Busty kele bankundi.

²¹¹ Mpe mu kwendaka kuna na lupitalu, na lupitalu ya mona (Mu me zimbana mutindu ba ke bokilaka yawu, kuna na New Albany) lupitalu ya malu-malu. Mpe mu kwendaka kuna samu na kumona Busty; mpe ntangu mu kotaka na kati ya kivinga, mu tubaka, “Mpangi Busty.”

Yandi tubaka, “Mpangi Bill.” Yandi me simba munu diboko na mutindu mosi ya kupesa mbote ya nene ya ntama; veteran ya Mvita ya Yinza ya Ntete, ya kele ve samu ti yandi kele awa, kasi kaka mutindu ntima lendaka bula ntete mbote na yisi ya semisi ya ntama ya blue. Yandi me simba diboko ya munu. Mu me vwandaka na yinzo ya yandi; me kudyaka na yinzo ya yandi; me lalaka na yinzo ya yandi, kaka mutindu ti mu vwandaka mpangi ya yandi ya bakala. Bana ya yandi mpe bawu nyonso, beto kele kaka—kaka mutindu bampangi ya menga mosi. Muntu ya mbote.

²¹² Mpe yandi. . . Kasi ata mbala mosi ve ti yandi kwizaka na Mfumu na mudindu. Yandi. . . Mu botikaka yandi na Nkumbu ya Yesu Klisto. Kasi kilumbu yina ntangu mulongi ya Méthodiste yina kutubaka, “Muntu nyonso yina kubotamaka na Nkumbu ya Yesu Klisto, beno basika na yisi ya tenta ya munu.” Yina vwandaka ok. George Wright mpe bayankaka kubasikaka. Na manima ya midi yango mu kwendaka kuna na kubotika na Nkumbu ya Yesu Klisto na Totten Ford. Dibuundu ya yandi ya muvimba kwizaka na kati ya maza mpe kuzwaka mbotika na Nkumbu ya Yesu Klisto. Na yawu mu landilaka kaka. Yina vwandaka nyonso ya kulunga. Nzambi na beno, nani lenda kutelemina beno? Mu zaba kwandi ve kisika muntu yango me kwendaka, na yina kusalamaka na yandi.

²¹³ Na mutindu nyonso, mu kotaka na lupitalu. Kuna vwandaka Busty ya kulala ya kufuluka na cancer, badokotolo zolaka kwandi ve, kusalaka kima ve kasi tungaka kaka yandi. Busty tubaka na munu; yandi tubaka, “Mpangi Bill, yayi kele samu na lukanu mosi. Kima kusalamaka.”

Mu tubaka, “Yinga, Busty.” Mu me banda na kuwa na nzutu Mpeve yango mutindu mupepe yango ya ngolo yina mu vwandaka zonzila, beno zaba, yina vwandaka kota.

Yandi tubaka. . . Ntangu mu kotaka na kati awa, ya vwandaka na mukyama na nsongi yina, ya kutelama na nsongi yina. Mukyama kele ngwisani; ngwisani ya Nzambi. Nzambi kusalaka ngwisani na munu na zulu ya mongo yina kilumbu yina. Mu me tula maboko ya munu na zulu ya Mpangi Busty mpe mu me sambila samu na yandi.

Badokotolo me tuba, “Yandi ke lemba na mbangu. Yandi ke kuluka kaka. Ya kele na kima ve ya kusala. . . Yandi ke kufwaka kaka na bilumbu fyoti.” Mpe Busty Rodgers. . . Ya me kuma basabala mpe basabala na basabala me luta, mpe Busty Rodgers, kele ya kuvwanda kaka awa na manima na dibuundu na nkokila yayi, ya mavimpi ya mbote mpe na ngolo mutindu mu me monaka

yandi ntete ve na luzingu ya munu. Telama, Mpangi Busty. Beno tala yandi yayi. Beto pesa nkembo na Nzambi, beto nyonso.

Bawu vwandaka ya kuvukana na kivinga ya zulu,
 Bawu nyonso vwandaka sambila na Nkumbu ya Yandi.
 Kubotamaka na Mpeve-Santu,
 Mpe ngolo ya ksalu kukwizaka.
 Awa, yina Yandi salaka samu na bawu kilumbu yina,
 Yandi ke sala samu na beno mutindu mosi.
 Mu kele na kyese ti mu lenda tuba, “Mu kele mosi ya bawu.”

Mu kele mosi ya bawu, mosi ya bawu;
 Mu kele na kyese ti mu lenda tubaka, “Mu kele mosi ya bawu.” (Alleluia!)
 Mosi ya bawu, mu kele mosi ya bawu;
 Mu kele na kyese ti mu lenda tuba, “Mu kele mosi ya bawu.”

Na kutala bantu yayi vwandaka bantu ya mpamba,
 Mpe vwandaka ve ya kuzabana na yinza,
 Bawu nyonso kuzwaka Pantekote ya bawu,
 Kubotamaka na Nkumbu ya Yesu.
 Mpe bawu ke na kutuba ntangu yayi mpe bisika nyonso,
 Ti ngolo ya Yandi kele dyaka mosi.
 Mu kele na kyese ti mu lenda tuba, “Mu kele mosi ya bawu.”

Mu kele mosi ya bawu, mu kele mosi ya bawu;
 Mu kele na kyese ti mu lenda tuba, “Mu kele mosi ya bawu.” (Alleluia!)
 Mosi ya bawu, mu kele mosi ya bawu;
 Mu kele na kyese ti mu lenda tuba, “Mu kele mosi ya bawu.”

Ntangu yayi, kwiza mpangi ya munu, sosa lusakumunu yayi
 Yina ke vedisa ntima ya nge na disumu,
 Yina ke sala bangunga kuwakana na nsayi,
 Mpe ke bumba moyo ya nge na tiya.
 Oh, ya ke na kupela ntangu yayi na kati ya ntima ya munu,
 Oh, nkembo na Nkumbu ya Yandi.
 Mu kele na kyese ti mu lenda tuba, “Mu kele mosi ya bawu.” (Beto yimba yawu!)

Oh, mosi ya bawu, mosi ya bawu;
Mu kele na kyese ti mu lenda tuba, “Mu kele
mosi ya bawu.” (Alleluia!)

Mosi ya bawu, mosi ya bawu;
Mu kele na kyese ti mu lenda tuba, “Mu kele
mosi ya bawu.” (Bantu yikwa kele mosi ya
bawu? Beno telemisa maboko ya beno. Oh, la
la! Oh, wapi mutindu mu kele na kyese ti mu
kele mosi ya bawu.)

Mosi ya bawu, mosi ya bawu;
Mu kele na kyese ti mu lenda tuba, “Mu kele
mosi ya bawu.” (Alleluia!)

Mosi ya bawu, mosi ya bawu;
Mu kele na kyese ti mu lenda tuba, “Mu kele
mosi ya bawu.”

Bawu vwandaka ya kuvukana na kivinga ya
zulu yina,

Bawu nyonso vwandaka sambila na Nkumbu
ya Yandi.

Bawu kubotamaka na Mpeve-Santu,

Kuna ngolo ya kisalu kukwizaka.

Awa, yina Yandi salaka samu na bawu kilumbu
yina,

Yandi ke sala samu na nge mutindu mosi.

Mu kele na kyese ti mu lenda tuba, “Mu kele
mosi ya bawu.”

Oh, mosi ya bawu, mosi ya bawu;

Mu kele na kyese ti mu lenda tuba, “Mu kele
mosi ya bawu.” (Alleluia!)

Mosi ya bawu, mosi ya bawu;

Mu kele na kyese ti mu lenda tuba. “Mu kele
mosi ya bawu.”

Ntangu yayi, na yina beto ke na kuyimba dyaka refrain
yango, mu zola to mosi na mosi ya beno kubaluka, mpe kupesa
mbote na muntu na lweka ya beno, mpe kutuba, “Nge kele mosi
ya bawu?” Beno me mona? Mbote mingi.

Oh, mosi ya bawu (Mu zaba ti nge kele yawu,
Mpangi Neville. Mu zaba ti nge kele yawu,
Mpangi Capps. Mu zaba ti nge kele yawu. Mu
zaba ti nge kele yawu . . . ? . . .)
. . . mosi ya bawu.

Oh, mosi ya bawu, mosi ya bawu;

Mu kele na kyese ti mu lenda tuba, “Mu kele
mosi ya bawu.”

²¹⁴ Oh, beno kele ve na kyese ti beno kele mosi ya bawu. Bantu
yikwa ke zola kuvwanda mosi? Beno telemisa diboko ya beno.
Mbote mingi. Ntangu yayi, mu ke yimba yayi samu na beno:

Na yina kwiza mpangi ya munu, sosa
 lusakumunu yayi
 Yina ke vedisa ntima ya nge na disumu,
 Yina ke sala bangunga kuwakana na nsayi,
 Mpe ke bumba moyo ya beno na tiya.
 Oh, ya ke na kupela ntangu yayi na kati ya
 ntima ya munu,
 Oh, nkembo na Nkumbu ya Yandi.
 Mu kele na kyese ti mu lenda tuba, “Mu kele
 mosi ya bawu.”

Oh, mosi ya bawu, mosi ya bawu;
 Mu kele na kyese ti mu lenda tuba, “Mu kele
 mosi ya bawu.” (Alleluia!)
 Mosi ya bawu, mu kele mosi ya bawu,
 Mu kele na kyese ti mu lenda tuba, “Mu kele
 mosi ya bawu.”

²¹⁵ Beno bambuka moyo na yina mwa mwana ya kento yina kutubaka na Pierre, “Nge kele ve mosi ya bawu?” Mu kele na kyese mingi, beno ve? Beno zaba, Pierre tubaka na kilumbu ya Pantekote, “Yayi kele Yawu!” Ntangu yayi, mu ke tubaka konso ntangu, “Kana *yayi* kele Yawu ve, mu kele ne kyese na kuzwa *yayi*, na kvingilaka na Yawu na kukwiza.” Ya kele kieleka. Mu kele na kyese samu na yayi.

Samu ti mu kele mosi ya bawu, mu kele mosi
 ya bawu;
 Mu kele na kyese ti mu lenda tuba, “Mu kele
 mosi ya bawu.”
 Oh, mosi ya bawu, mosi ya bawu;
 Mu kele na kyese ti mu lenda tuba, “Mu kele
 mosi ya bawu.”

²¹⁶ Oh, yayi kele kitoko mingi ve, na kuvwandaka kintwadi na bisika ya Mazulu na Klisto Yesu, na kubundanaka na Mpeve, na kubundanaka na zulu ya Ndinga, na kuzonzaka na bima ya mbote yina ke na kwiza. Ya kele mbote mingi. Mu kele na kyese mingi na kuzaba yawu, beno ve? Beno kele ve na kyese ti beno kele Muklisto? Beno kele ve na kyese ti masumu ya beno kele na yisi ya Menga? Yandi ke kwiza mosi ya bilumbu yayi, mpe beto ke kwenda na Yandi. Na yina beno banza, buboba nyonso ke katukila beto; bimbevo nyonso, bampasi nyonso, luzingu nyonso ya kufwa ke soba. Oh, la la! Mu lenda banza kaka na bampangi ya luzolo ya ntama bayina vwandaka awa. Mu ke bambuka. . . Bantu yika ke bambuka moyo na Rabbi Lawson? Oh, na kutala beno nyonso. Mu lenda kumona yandi kutula yinti yango ya ntama kaka awa. Mpe mu vwanda vwanda ya kuvwanda na manima kuna. Yandi vwandaka yimba mwa nkunga yayi. . . (Minuti kaka Teddy, mpangi.) Mu ke meka, kumona kana mu ke lenda kuzwa mélodie ya yawu. Mu zaba ve.

Kyese ya mbasi-mbasi ke na kuingila munu,
 Kisika bankotolo ya matadi ya ntalu ke
 funguka nene,
 Mpe ntangu mu ke sabuka dibenga ya mpasi,
 Mu ke pema na lweka yankaka yina.

Kilumbu mosi na manima ya luzabu ya lufwa,
 Kilumbu mosi, Nzambi kaka ke zaba kisika to
 ntangu,
 Makalu ya luzingu ya kufwa ke suka,
 Kuna mu ke kwenda zinga na mongo ya Sion.
 (Yinga.)

217 Mwa makalu yayi yina ke na kubalukaka na kati ya beto—
 kumona, kuwa na yinwa, kusimba, kuwa nsunga, mpe kuwa,
 mwa bambakusulu yayi mpe makalu yina ke na kubaluka na kati
 ya luzingu ya kufwa yayi, kilumbu yawu ke kufwa. Na manima
 munu, munu mosi, mpe beno, beto ke kwenda zinga na mongo
 ya Sion. Oh, mu zola yawu, beno ve? Na kuzaba ti beto kele na
 nkunga yango ya kusakumuna. Mbote mingi. Bantu yikwa zaba
 nkunga ya beto ya ntama ya mbotika? Ntangu yayi, beto ke soba
 yawu. Beto baka nkunga ya beto ya kusukisa:

Baka Nkumbu ya Yesu na nge,
 Nge mwana ya mawa mpe ya kiadi;
 Yawu ke pesaka kyese,
 Baka yawu bisika nyonso.

218 Beno baka Nkumbu ya Yesu na beno. Beno sala kaka yawu,
 na yina beno ke na kukwenda. Mbote mingi, beto nyonso ntangu
 yayi. Beno zimana ve, na ngunga ya nana na suka ba ke kabula
 bakalati ya bisambu samu na lukutakanu. Lukutakanu ke banda
 na ngunga ya yivwa na ndambu. Mu ke longa na ngunga ya kumi.
 Lukutakanu ya kusambila bimbevo ke banda na ngunga ya kumi
 na mosi.

219 Mbasi na manima ya midi, mbasi na nkokila ke vwanda
 nsangu ya kumwangisa nsangu na tabernacle. Mpe mbasi na
 nkokila, beno nyonso yina me fungula masumu ya beno mpe
 me kuzwaka ntete ve mbotika, ya ke vwanda. . . kiziba ya maza
 ke vwanda ya kufunguka; beto ke botika bantu na Nkumbu ya
 Mfumu Yesu Klisto.

220 Beto nyonso kintwadi ntangu yayi, na yina beto ke yimba na
 ndinga ya ngolo. Mpangi Busty, nge zaba ve mutindu mu kele
 na kyese mpe ke vutula matondo na Nzambi. Beno zaba, yandi
 kwendaka na dokotolo. Mpe ba tubaka na munu ti dokotolo
 kutalaka yandi, mpe zabaka kaka ve yinki ya kubanza. Yandi
 kukwikilaka ve ti ya vwandaka muntu kaka yina. Oh, dinsweki
 kele ve na yina Nzambi lenda kusalaka. Ya kele kieleka ve?
 Mbote mingi.

Baka Nkumbu (Beno wakisa yawu!) ya Yesu na
 beno,
 Nge mwana ya mawa mpe ya kiadi;
 Yawu ke pesaka nsayi,
 Ntangu yayi, baka yawu bisika nyonso.
 Nkumbu ya ntalu (Nkumbu ya ntalu!), Oh
 Nkumbu ya mbote!
 Kivuvu ya ntoto mpe kiese ya Zulu;
 Nkumbu ya ntalu (Oh, Nkumbu ya ntalu!), Oh
 Nkumbu kitoko!
 Kivuvu ya ntoto mpe kiese ya Zulu.

²²¹ Mbote mingi. Mu ke pesa ntangu yayi kisalu na pasteur.
 Yandi ke kuzwa mwa bampova, to ke zonza na muntu na
 kusukisa samu beto manisa, nyonso yina ke na dibanza ya
 yandi.



BAKYUVU MPE BAMVUTU NA ZULU YA MPEVE-SANTU KNG59-1219

(Questions And Answers On The Holy Ghost)

Nsangu yayi ya Mpangi William Marrion Branham, kulongamaka na Kingelesi, na Kilumbu ya sambanu na nkokila, n kilumbu ya 19 ya Ngonda ya kumi na zole, na mvula 1959, na Branham Tabernacle na Jeffersonville, na Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org